

## DIŽA' GÜEN DAN' BZOJ SAN LUCAS

### Da' nga bzoj Lucasen' par Teófilo

**1** <sup>1-4</sup> Teófilo, naco' bene' zaca' na' chzoja' le' diža' quinga cont nezdo' da' li ca nac da' ba bosozejni'ide' le' che da' ca' ba gosac. Bene' zan bach bosozoje' che Jesúsén', goso'e diža' che da' ca' bene', con can' bosozejni'i bene' ca' neto', bene' ca' besele'ede' can' gwzolaon cate' goljte Jesúsén'. Na' bene' ca' gosende' na' besele'ede' can' goquen' bososed bosolo'ede' bene' yoble diža' güen che'. Na' neda' cate' beyož gwnabyoža' can' goquen' na' gwyazlaža' gwzojan' tcho'a cont nezdo', Teófilo.

### To angl gwdixjue'ede' galje Juan

<sup>5</sup> Ca tiemp caten' gwnabia' rey Herodes distritw gana' nzi' Judea, na' gwzoa to bxož che bene' Israel ca' bene' le Zacarías. Bene' žin len to xonj bxož bene' zjale Abías. Na' no'ol che Zacarías le Elisabet, na' naque' diaža che da' bxož Aarón. <sup>6</sup> Na' Zacarías len Elisabeten' zja'accze' to licha len Diosen' na' gosonyane' yogo'lol da' non Xancho Diosen' mandadw da'na' nyoj le'e ley che'na'. <sup>7</sup> Na' nono xi'ingaque' nita' neche Elisabeten' naque' no'ol güiž. Na' chopte' ba zjanaque' bene' gole.

<sup>8</sup> Na' goquen' beyala' Zacaríasen' len bene' lježe' ca' bene' ca' zjanaque' bxož cont yesone' da'na' besyeyale' yesone' yesonxene' Dios. <sup>9</sup> Na' bxož ca' yogo' ni'a chesone' rifa cont chata'bia' noe' choj gwzeye' yal lo' yodao' blao chegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bzeye' yala' lo' yodao'na'. <sup>10</sup> Na' šlac bzeye' yala' gosenita' yogo'lol bene' zan ca' chyo'ole bosol güiže' Diosen'. <sup>11</sup> Na' to angl bene' gwseła' Xancho Dios blo'elagüe' Zacaríasen', na' gwzecha angla' cuit mesa' lichale gan' chosozeye' yala'. <sup>12</sup> Na' cate' ble'e Zacaríasen' anglen', benit bechol lo' yichjlažda'ogüe' na' bžebchgüe'.

<sup>13</sup> Perw anglen' gože' le':

—Bitw žebo' Zacarías. Diosa' ba bzenague' che dan' gwnabdo'ne', na' no'ol chio' Elisabeten' sane' to xi'ino', na' gwsio'be' Juan. <sup>14</sup> Na' so' mbalaz na' yebedo' na' lecze bene' zan yesyebede' še ba goljbe'. <sup>15</sup> Gacbe' to bene' blao lao Diosen'. Bitw ye'ejbe' vino ne bichle da' chzože bene'. Na' cate' za' galjtebe' ba yo'o Spiritw che Diosa' lo' yichjlažda'obe' nabi'an lebe'.

<sup>16</sup> Na' gombe' cont zan bene' Israel ca' yosoša' yichjlažda'ogüe' na' yesonxene' Xancho Diosen' can' cheyala' yesonxene' le'. <sup>17</sup> Na' cuialaobe' lao Xancho', na' soa Spiritw che Diosen' len lebe' can' gwzoan len da' Elíasen', na' lecz ca' yela' guac che Diosen'. Na' bene' ca' bi nita' binlo len xi'ine' ca', gombe' ga yesenite' binlo len legacbe', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xancho' cate' yide'.

<sup>18</sup> Nach Zacaríasen' gože' anglen':

—¿Nac gac nezda' da' nga? Neda' naca' bene' gole na' lecz ca' no'ol chian' ba naque' bene' gole.

<sup>19</sup> Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonxena'ne', na' gwsele' neda' zedetixjue'eda' le' diža' güen qui. <sup>20</sup> Le' bi gac nio' na'a, le bi chejli'o xtiža' nga. Cate' žin ža gac da' nga, cana' gac yenio' da' yoble. Na' da' li gwžin ža gac can' gwnia'.

<sup>21</sup> Na' bene' ca' že' chyo'ole chesebeze' Zacaríasen' besyebande' da' gwžede' lo' yodao' blaona'. <sup>22</sup> Na' cate' bechoj Zacaríasen', bene' señw len ne'e da' bi goc nie'. Nach gosacbe'e bene' ca' ble'ebande' lo' yodao'na'.

<sup>23</sup> Na' cate' beyož bdelaze' dan' bene' žin lo' yodao'na', beyej liže'.

<sup>24</sup> Gwde na' no'ol che' Elisabeten' gwchendao' bidaon' lo' le'e. Na' gayo' bio' gwzoaze'. <sup>25</sup> Na' gwne':

—Güenchguan' ba ben Xancho Diosen' len neda'. Ba bžin ža beži'ilaže'de' neda', cont bich yeson benacha' xbab bibi zaca'.

### To angl gwdixjue'ede' galje Jesucriston'

<sup>26</sup> Goc xop bio' noa' Elisabeten' bidaon', Diosen' besele' anglen' ben' le Gabriel, gwyeje' to yež da'na' nzi' Nazaret gan' mbane distritw Galilea.

<sup>27</sup> Gwsele' le' gan' zoa to no'ol güego' le' María. Na' Marían' napši'ichgua cuine'. Na' to bene' le' José bach naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'. <sup>28</sup> Na' bžin to angl bene' za' yaban' gwyo'e gan' zoa María na' gože'ne':

—Patiox. Xancho Diosen' nži'ide' le' na' zoe' len le'. Na' gone' cont so' mbalazch ca yogo'lol' no'ole yezica'chle.

<sup>29</sup> Cate' ble'e Marían' anglen', bebanchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox. <sup>30</sup> Na' anglen' gože'ne':

—Bitw žebo' María, Diosen' nži'ide' le'. <sup>31</sup> Na'a gua' xi'ino' to bi' byo dao', na' sano'be', na' go'o labe' Jesús. <sup>32</sup> Na' Jesúsen' gaque' to bene' blao na' benachen' yososi'ene' Xi'iu Dios, Dios ben' naque' la'zelagüe bene' blao. Na' Xancho Diosen' gone' cont nabi'e nación Israel chele ca gwnabia' da' xozxta'ogüe' rey David. <sup>33</sup> Na' le' nabi'e nación Israelen' toli tocane, na' gwbat te yela' gwnabia' chen'.

<sup>34</sup> Nach gož Marían' angla':

—¿Nacxe gac sana' bdaon'? Bitw nžaga' bene' byo.

<sup>35</sup> Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe bene' blao. Da'nan' bidaon' za' galje gacbe' laždao' xilaže' na' yososi'ebe' Xi'iu Dios. <sup>36</sup> Na' bene' xna'o Elisabeten' lecze bach gwchendao' bidao' lo' le'e la'czla' ba naque' bene'

gole. Ba goc xop bio' no'e to bi' byo dao', len gosene' naque' no'ole güiž.

<sup>37</sup> Bibi de da' nacho da' cbi gac gon Dios.

<sup>38</sup> Nach gož Marían' anglen':

—Ni zoa' naca' xmos Xana' Diosen'. Gacšca chia' con can' ba gwnao'.  
Nach beza' anglen' gan' zoa Marían'.

### Marían' jañ'e Elisabeten'

<sup>39</sup> Gwde na' la' gweyete Marían' to yež da' žia to lo ya'a gan' mbane  
distritw Judean', <sup>40</sup> na' bžine' liž Zacaríasen'. Na' gwo'e bguape'  
Elisabeten' tiox. <sup>41</sup> Na' cate' Elisabeten' bende' chol güiž Marían' le', nach  
gocbe'ede' chxite' chžia bidaon' lo' le'e. Na' Spiritw che Diosen'  
gwnabian' yichjlaždao' Elisabeten' <sup>42</sup> na' gwne' zižje da' bebecgüede',  
gože' Marían':

—Zo' mbalazch ca yogo'lol' no'ole yezica'chle. Na' lecze bidaon' no'ona'  
soabe' mbalaz. <sup>43</sup> Chebanda' le' naco' xna' Xana' zedena'o neda'. <sup>44</sup> Con  
cate' benda' chguapo' neda' tiox, bidao' chian' lecze bebebe', bxite'  
bžiabe' lo' lian'. <sup>45</sup> Zo' mbalaz da' gweyeli'o gac can' gwna xtiža' Diosen'  
dan' gož anglen' le'.

<sup>46</sup> Nach Marían' gwne':

Chonxena' Xancho Diosen' do yichj do laža'.

<sup>47</sup> Na' do yichj do laža' chebecgüeda' Dios ben' bebeje' neda' lo da'  
malen'.

<sup>48</sup> Ba beyaše'de' neda' naca' xmose' la'czla' bibi zaca'.

Na' na'a bene' yesenita' toli tocanē yesene' neda' zoa' mbalaz.

<sup>49</sup> Dios ben' chac chon da' nono gac gon ba bene' da' güen juisyw len  
neda'.

Toz len' naque' bene' laždao' xilaže' juisyw.

<sup>50</sup> Na' note'teze bene' chesape' le' bala'an do yichj do laže', Diosen'  
cheži'ilaže'de' legaque'.

Cheži'ilaže'de' bene' že' na'a na' yeži'ilaže'de' xi'in diaža chegaque' ca'.

<sup>51</sup> Bach blo'e Diosen' benachen' yela' guac che'.

Na' ba bolague' bene' ya'laže' ca'.

<sup>52</sup> Ba bene' cont bene' gwnabia' ca' bich yesenabi'e.

Na' bene' bi naque' bene' blao, Diosen' ba bnežjue' latje yesaque'  
bene' blao.

<sup>53</sup> Na' bene' chesedon, Diosen' ba bnežjue' legaque' da' zan da' güen.

Na' bene' gwni'a ca', ba bose'e legaque', bibi bonežjue' legaque'.

<sup>54</sup> Nach ba goclene' chio' bene' Israel naccho ca' xmose'.

Ba blo'ede' bitw ganlaže' chio', san ba cheyaše' cheži'ilaže'de' chio'.

<sup>55</sup> Ba bene' can' gože' da' Abraham len yezica'chle da' xozxta'ocho.

Na' soacze' yeyaše' yeži'ilaže'de' xi'in diaža che da' Abrahanna' toli  
tocanē.

<sup>56</sup> Na' cate' ba goc šone bio' zoa Marían' len Elisabeten', nach Marían' beyej liže'.

### Golje Juan bene' bzoe' bene' nis

<sup>57</sup> Na' cate' bžin ža san Elisabeten', gwzane' bi' byo dao'. <sup>58</sup> Na' cate' goseneze bene' gualiž chegaquen' na' diaža chegaquen' Xancho Diosen' ba beyaše' beži'ilaže'de' Elisabeten', nach besyebchgüede' len le'. <sup>59</sup> Na' goc xono' ža goljbe' na' jasezoe'be' señw dan' že' circunciación can' gosone' len yogo' bi' byo dao' bi' gosaljbe' lo diaža che da' Abraham. Na' gosaclače' si' labe' Zacarías can' le xaben', <sup>60</sup> perw xna'be' gwne':

—Bi gac. Cheyała' si'be' Juan.

<sup>61</sup> Na' legaque' gose'ene':

—Notno diaža chele nita' bene' zjale ca', neca xozxta'ole.

<sup>62</sup> Na' gosone' señw gosenabde' xaben' nac che'nde' si' labe'. <sup>63</sup> Nach bene' señw gwnabe' to yagla' dao' da' bzoje': "Si' labe' Juan." Na' yogüe' besyebande'. <sup>64</sup> Beyož bzoje' da'na', la' gocte benie', nach la' gwzolaote be'e diža' benxene' Diosen'. <sup>65</sup> Na' besyebane bene' gualiž chegaquen'. Na' xtiža'gaquen' gos gwłaljen doxen yež ca' zjachi' lo ya'ana' gan' mbane distritw Judean'. <sup>66</sup> Na' yogo'lol bene' gosende' dižan' gosone' xbab lo' yichjlažda'ogüe' che da' ca', na' gosene':

—¿Bixe gon bdao'na'?

Gosene' ca' le gosenezde' zoacze Xancho Diosen' len lebe'.

### Diža' da' be' Zacarías

<sup>67</sup> Nach gwnabia' Spiritw che Diosen' yichjlaždao' Zacaríasen', nach be'e xtiža' Diosen', gwne':

<sup>68</sup> Chonxena' Xancho Dios ben' chonxen chio' bene' Israel.

Cheyaše' cheži'ilaže'de' chio' naccho nación che' na' ba chsele' bene' yebej chio' lo da' malen'.

<sup>69</sup> Na' bena' bač za' cont yebej chio' lo da' malen', naque' bene' gwnabia' gual,

na' naque' xi'in diaža che da' rey David ben' goc xmos Diosen'.

<sup>70</sup> Chac can' gwna Diosen' len cho'a da' bene' ca' gwsele' cani', bene' gosac lo ne'e goso'e xtižen'.

<sup>71</sup> Ba za' ben' gwne' yosle' chio' lo na' yogo' bene' chesegue'e chio'.

<sup>72</sup> Chac can' gože' da' xozxta'ocho ca' yeyaše' yeži'ilaže'de' legaque'. Bi chanlače', san chone' yogo' da' ba gwne' gone' gaclene' chio'.

<sup>73</sup> Diosen' chone' can' gwlo'e da' bałi lao da' xozxta'ocho da' Abraham gože'ne' gaccze can' gwnen'.

<sup>74-75</sup> Gwne' yosle' chio' lo na' bene' chesegue'ede' chio'.

Nach gac lažda'ochon' xilaže' lao le' na' gonxenchone' sin cbi žebcho, na' šejcho licha gonxenchone' šlac de yela' mban checho.

<sup>76</sup> Nach Zacaríasen' gože' bdao' chen':

Bdao' chia', benach yesene' chio' naco' bene' choe' xtiža' Dios, Dios  
ben' naque' la'zelagüe bene' blao.

Yesene' ca' da' cuialaguo' lao Xanchon' na' go'o xtižen' cont nita' bene'  
yosozenague' che' cate' yide'.

<sup>77</sup> Gwsed gwlo'edo' neto' can' chaclaže' Diosa' yebeje' chio' naccho  
nación che' lo da' mala' na' yezi'xene' xtoła'chon'.

<sup>78</sup> Diosen' cheyaše' cheži'ilaže'de' chio',

le len' gwlo'e be'ni' che' lo' laždao' chio' benach.

<sup>79</sup> Cue'e be'ni' che' lo' yichjlaždao' chio' naccho ca bene' chaš ga nac  
chol, chio' chžebcho gatcho.

Na' gwzejni'ide' chio' benach naquen' soa cuescho yežlio nga.

Can' be' Zacaríasen' xtiža' Diosen'.

<sup>80</sup> Na' Juanna' zej chcha'obe' zejte chac yichjlažda'oben' can' chazlaže'  
Diosen'. Na' jasoe' latje daš. Na'ate zoe' cate' gwzolagüe' gwduxjue'ede'  
xtiža' Diosen' len bene' Israel ca'.

### Caten' golje Jesúsen'

(Mt. 1:18-25)

**2** <sup>1</sup> Na' lecz šlac gwnabia' rey César Augusto, bene' mandadw gwyas  
to censo cont nezde' bal bene' že' to to yež da' zjachi' doxen yežlio  
gan' chnabi'e. <sup>2</sup> Na' lecz cana' Cirenio naque' gobernador gan' nzi' Siria.  
Na' naquen da' nechw bchele' bal bene' že' to to yež. <sup>3</sup> Na' yogo'lol bene'  
jaya'aque' lažgaque' jasyede cuent cuine' cont bosochele' le'. <sup>4</sup> Na' José  
naque' diaža che da' rey David. Da'nan' beze'e Nazaret gan' mbane  
distritw Galilea, beyeje' yež Belén dan' nac laž da' rey David. Na' chi' yež  
Belén gan' mbane distritw Judea. <sup>5</sup> Beyeje' jayde cuine' cuent na'  
zenche'e no'ol che' Marían' perw biṇa' yeseca'a lježe'. Na' Marían' ba no'e  
bdao'. <sup>6</sup> Na' šlac nite' Belén bžin ža sane'. <sup>7</sup> Na' gwxane' bi' nechw, to bi'  
byo dao', na' btobe'be' lache' na' gwlo'ebe' ga chesagw beyixe', da' bich bi  
latje yo'o mesónna' par legaque'.

### Angl ca' bosozende' bene' güeyoe xila' ba golje Jesúsen'

<sup>8</sup> Na' že'na' yixe' che yež Belén na'ate že' bene' güeyoe xila' chesape'  
xila' chen'. <sup>9</sup> Na' to angl bene' gwsela' Xancho Diosen' bžine' gan' nita'  
bene' güeyoe xila' ca', na' be'ni' che Xancho Diosa' gwyechjen bsenin'  
gan' nite'na'. Na' besežebchgüe'. <sup>10</sup> Na' gož angla' legaque':

—Bitw žeble. Na'a chixjue'eda' le'e to diža' güen da' yesebechgüe  
yogo'lol bene'. <sup>11</sup> Na'aža lo yež che rey David ba golje bena' gac yebeje'  
benachen' lo da' mal. Naque' Cristo, na' zeje diža' naque' ben' gwsela'  
Dios cont nabi'e, na' lecze naque' Xancho. <sup>12</sup> Cont yeželele bdao'na',  
quina naquen: bdao'na' ba ntobe'be' lache' na' debe' gan' chesagw  
beyixe' ca'.

<sup>13</sup> Beyož gwna angla' ca' la' besežinte bene' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

<sup>14</sup> iChonxencho Diosa' ben' zoa yaba,

na' lo yežlio yesezoa yesebez benachen' binlo, con bena' cheson can' chazlaže' Diosen'.

<sup>15</sup> Na' cate' besyeya'ac angl ca' zjaya'aque' yaba, na' bene' güeyoe xila' ca' gose' lježe':

—Yeyejcho Belén šjayna'cho dan' ba goc can' nac dan' gwsela' Xanchon' angl quinga bedesedixjue'ede' chio'.

<sup>16</sup> Na' beseya'aces bene' güeyoe xila' ca' jaya'aque' Belén. Na' besyeželde' Marían' len Josén' na' len bdao'na'. Na' bdao'na' debe' gan' chesagw beyixe' ca'. <sup>17</sup> Beyož besele'ede' can' ba goquen, na' goso'e diža' che bdao'na' len bene' ca' yezica'chle ca' nac dan' gož anglen' legaque'.

<sup>18</sup> Na' yogo'lol bene' ca' gosende' diža' dan' gosoe' bene' güeyoe xila' ca' besyebande'. <sup>19</sup> Na' lecze Marían' gwlo'o yichje' yogo'lol diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen. <sup>20</sup> Nach besyeya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba goc yogo'lol da' ba gosende' na' besele'ede' dan' gož anglen' legaque'.

### Diaža che Jesúsen' jasesane'be' lo' yodao' blaona'

<sup>21</sup> Cate' goc xono' ža golje bdao'na' jasezoe'be' señw da'na' nzi circuncisión, na' bososi'e labe' Jesús, can' ben anglen' mandadw cate' za' gua' Marían' lebe'.

<sup>22</sup> Na' cate' gwde ba beyac Marían' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'. <sup>23</sup> Gosone' can' nyoj ley che' dan' ža: “Yogo' bi' byo dao' bi' nechw cheyala' gacbe' lo' na' Dios.” <sup>24</sup> Nach gosonxene' Diosen', gosone' can' ža ley che Xancho Dios dan' žan: “”Cheyala' gotle chop ngolbex o chope plomxtil.”

<sup>25</sup> Na' Jerusalénna' gwzoa to bene' le' Simeón. Benan' gwyejcz'e bene' da' güen lao Diosen' na' benxene' le', na' gwleze' batcan' yid Cristo ben' sela' Xancho Diosen' cont yebeje' bene' Israel ca' lo' da' mal. Na' Spiritw che Diosen' gwyo'on lo' yichjlaždao' Simeón, <sup>26</sup> na' bzejni'in le' bi' gate' še biña' le'ede' Criston'. <sup>27</sup> Na' Spiriton' benen' cont gwyeje' yodao' blaona', na' zoe' yodao'na' cate' besežin xaxna' Jesúsen' zjano'ebe' cont yesone' len lebe' can' non ley chegaquen' mandadw. <sup>28</sup> Nach Simeónna' gwlene'be' nach benxene' Diosen', gože'ne':

<sup>29</sup> Xana' Dios, bačh goc can' gwnaon'.

Ben latje yeyeda' binlo gana' zo'na', neda' naca' xmoso'.

<sup>30</sup> Ba ble'eda' bena' zedyelej neto' lo' da' mal.

<sup>31</sup> Naque' bene' gwnalažo' gwselo' neche yogo'lol benach.

<sup>32</sup> Na' cue'e be'ni' che' lo' yichjlaždao' bene' cbi zjanaque' bene' Israel.

Na' gaque' la'zelagüe bene' zaca' len neto' bene' Israel.

<sup>33</sup> Nach xaben' len xna'ben' besyebande' ca diža' chebe' dan' be' Simeónna'. <sup>34</sup> Na' Simeónna' gwnabde' Diosen' cont gac güen chegaque'. Na' gože' Marían':

—Bene' Israel ca' yesejnilaže' xi'ino' nga yesenite' mbalaz, na' bene' Israel ca' cbi yesejnilaže'ne' bi yesenite' mbalaz. Zedelo'ede' benachen' can' chaclaže' Diosen' goncho, perw zane' bi yesejle'e che'. <sup>35</sup> Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguoñ' catequen' žaglaguo' len da' gac che'.

<sup>36</sup> Na' lecze yodao' blaona' gwzoa to no'ole le Ana, na' cho'e xtiža' Diosen'. Naque' xi'in da' ben' le' Faniel na' naque' diaža che da' Aser. Bšagne'e cate' naque' no'ol güego', perw na' gaž izga gwzoalene' bene' che' na' gote', na' bga'ane' güezebe. Na' Anan' ba naque' to bene' gole, <sup>37</sup> taplalj tap izde'. Bicze chechoje' yodao' blaona'. Leca chonxene' Xancho Diosen' do ža do yel, gwzoatie' tgüeje bene' gwbas na' con gwzoachgüe' boļ güiže' Diosen'. <sup>38</sup> Na' goquen' gwbiga' Anan' gan' zoa Josén' len Marían' lo' yodao'na' na' be'e yela' choxcen che Diosen' bach gwsele' Jesúsén'. Na' be'e diža' che Jesúsén' len yogo' bene' ca' že' Jerusalén ben' chesebeze' batca' seļa' Diosen' ben' yebeje' legaque' lo da malen'.

### Jaya'aque' Nazaret

<sup>39</sup> Nach Josén' len Marían' cate' beyož gosone' yogo'loļ dan' non ley che Xancho Diosen' mandadw yesone', jaya'ac lažgaque' Nazaret gan' mbane distritw Galilea. <sup>40</sup> Na' Jesúsén' zej chcha'ogüe' na' zej chchachlaže'. Na' ca zej chcha'ogüe' na' zej chejni'ichde', na' Diosen' nži'ilaže'de'ne'.

### Can' ben Jesúsén' chašil yodao' blaona'

<sup>41-42</sup> Na' xaxne'e ca' yogüiz chja'aque' lni da' chala' Jerusalén chjaseze'ede' can' goc cate' Diosen' betue' bi' nechw che yogo' bene' Egipto na' bosle' bene' Israel. Šižinw ize Jesúsén' cate' goseche' xaxne'en le' ja'aque' lnin' Jerusalén. <sup>43</sup> Na' cate' gwde lnina' besyeya'aque', perw Jesúsén' bega'ane' ciuda Jerusalén. Na' xne'ena' len Joséna' bi gosacbe'ede'. <sup>44</sup> Con gosacde' ba zjayde' txen len bene' ca' nžaggaque'. Na' tža nez ba gosa'aque' cate' gwzolao chesyeyiljue'ne' ladjo diaža chegaque' na' no bene' xmigüe', <sup>45</sup> perw bitw besyeželde' le'. Nach besyebi'e jaya'aque' Jerusalénna' da' yoble cont šjasyediljue' le'.

<sup>46</sup> Na' beyon žach besyeželde' Jesúsén' chašil yodao' blaona', chi'e gachol bene' ca' chososed chosolo'ede' dan' bzoj da' Moisés. Jesúsén' chzenague' xtiža'gaquen' na' zanen chnabde' legaque'. <sup>47</sup> Na' yogo'loļ bene' ca' chosozenague' xtiža' Diosen' da' cho'e chesyebande' can'

chejni'ide' na' can' choži'e xtiža' bene' ca' zjansed dan' bzoj da' Moisés.

<sup>48</sup> Na' cate' besele'e xaxne'en le', besyebande', na' xne'en gože' le':

—Xi'indagua', ¿bixchen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

<sup>49</sup> Jesús'en' gože' le'gaque':

—¿Bichen' beyiljwle neda'? ¿Bi nezele liž Xa' ngan' cheyała' soa'?

<sup>50</sup> Perw xaxne'e bitw gosejni'ide' bi zejen dan' gože' le'gaque'.

<sup>51</sup> Na' beyeje' yež Nazaret len xaxne'e bzenague' chegaque'. Na' gwlec yichj xne'ena' yogo'lol dan' goca'. <sup>52</sup> Na' ca' chac zej chejni'iche Jesús'en' na' zej gwcha'oche', na' Diosen' len benacha' zej chesazlaže'che' le'.

### Juan gwdixjue'ede' diža' güen che Diosa'

(Mt. 3:1-12; Mr. 1:1-8; Jn. 1:19-28)

**3** <sup>1</sup> Cate' lo iz šino' dan' chnabia' César Tiberio doxen ga mbane nación Roma, izna' goc Poncio Pilato gobernador che distritw Judea, na' goc Herodes gobernador che distritw Galilea. Na' bene' biše' Herodesen', ben' le Felipe, goque' gobernador che distritw Itorea na' che distritw Traconite. Na' goc Lisantias gobernador che distritw Abilinia. <sup>2</sup> Nach lecze izna' Anás na' Caifás gosacche' bxoz blao che bene' Israel. Izna' Juan ben' naque' xi'in Zacarías gwzoe' to latje daš. Nach Diosen' be'lene' Juanna' diža'. <sup>3</sup> Na' Juanna' gwyeje' yogo'lol yež dan' nita' gala'ze yegw Jordán, jatixjue'ede' yogo'lol bene' cheyała' yesyetenjde' xtoła'gaque' na' yesezoe' nis cont nitlao xtoła'gaquen'. <sup>4</sup> Juanna' bene' dan' bzoj da' Isaías ben' be' xtiža' Diosen' cani'te, gana' žan:

Bena' chne' zižje latje dašen', že':

“Le gonšagüe' yichjlažda'olen' cont soale gwzenagle che Xanchon' cate' yide',

le cuejyichj da' malen' chonle cont yichjlažda'olen' gaquen ca to nez da' ba gosonšagüe'.

<sup>5</sup> Gwžin ža cate' yogo' ya'a yegw ca' yesyeyaquen laše',

na' no nez da' nacchgua bxoca' yesyeyaquen licha,

na' no nez da' nžaš nche'ene yesyeyaquen ba'a.

<sup>6</sup> Na' yogo'lol bene' yesacbe'ede' can' chaclaže' Diosen' yebeje' benachen' lo da' mal.”

<sup>7</sup> Na' bene' zan ja'aque' gan' gwzoe' Juanna' cont gwzoe'ne' nis. Na' Juanna' gože' le'gaque':

—Le'e nacchguale bene' zgot na' bene' gwxiye'. ¿Chaquele guac yelale lao castigw dan' sela' Diosen' caten' gone' yela' justis che benachen'? <sup>8</sup> Še da' li ba betinjele xtoła'le, cheyała' gonle da' nac güen cont yesacbe'e bene' ba boša' yichjlažda'olen'. Na' bitw gonle xbab gaquele Diosen' bitw gone' le'e castigw che xtoła'len' lagüe da' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'. <sup>9</sup> Ca nac le'e, še bi



chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'.

<sup>10</sup> Nach bene' ca' chosozenag xtiže'na' gosenabde' Juanna', gose'ene':

—¿Bica' da' cheyała' gonto'?

<sup>11</sup> Na' gože' legaque':

—Ben' nape' chope camis cheyała' gwnežjue' ton che bene' bi de che'. Na' lecze ca' che ben' de da' gagüe', cheyała' gwnežjue' che ben' bi de gagüe'.

<sup>12</sup> Na' cate' to chope bene' güechixjw ca' jasebigue' cont gwzoa Juanna' legaque' nis, na' gose'ene':

—Maestrw, ¿bica' da' cheyała' gonto'?

<sup>13</sup> Na' gože' legaque':

—Bitw gwchixjwchle ca da' cheyała' yeseyixjue'.

<sup>14</sup> Na' to chope bene' ca' zjanac soldadw lecze gosenabde' le', gose'ene':

—¿Chix neto'? ¿Bica'ch da' cheyała' gonto'?

Na' Juanna' gože' legaque':

—Bitw ca'ale da' de che bene', na' neca gonlaže'le len da' yosbague'le bene' cont ca'ale xmechwgaque'. Le gon banez len laxjwle.

<sup>15</sup> Na' bene' ca' gosezoe' lez yid Cristo ben' naquen sela' Diosen' yedenabi'e, na' gosacde' še Juanna' naque' Cristo. <sup>16</sup> Na' Juanna' gocbe'ede' xbab chegaquen' na' gože' yogo'lole':

—Neda' da' li chzoa' le'e nis, perw za' yid bena' gon cont soa Spiritw che Diosen' lo' yichjlažda'olen' nabian' le'e. Na' Spiriton' naquen ca yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' bene' zaca' bitw zaca' gona' xmandadoe' lechja' no xele'.

<sup>17</sup> Benan' gone' len benačen' can' choncho cate' chdecho trigon' lo' rner. Chtobcho trigon' chgo'ošagüe'chon na' chzeycho yix beben'. Na' bene' chesejnilaže' Diosen', yotobe' legaque' cont šjasyenite' txen len le', na' bene' bi chesejnilaže' le', sele' legaque' lo' yi' gabilen' dan' cbi cheyol chenit.

<sup>18</sup> Da' zanch da' gwna Juanna' gwdixjue'ede' legaque' diža' güen, na' gwneyoede' legaque' yesejle'en. <sup>19</sup> Nach Juanna' gwdile' gobernador Herodes ca nac da' mal da' bene' beque'e Herodías ca xo'ole', le Herodíasna' naque' xo'ole Felipe bene' biše' Herodesen'. Na' Juanna' lecze be'e diža' yogo'loł da' mal dan' ba ben Herodes. <sup>20</sup> Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

### Can' goc caten' gwzoa Jesúsén' nis

(Mt. 3:13-17; Mr. 1:9-11)

<sup>21</sup> Nach šlac chzoa Juanna' bene' nis, bene' zan ja'ac cont bzoe' legaque' nis. Na' len Jesúsén' gwzoe' nis. Na' lo' hora' Jesúsén' bol' güiže' Diosen' na' la' byaljwte yaba gan' zoa Diosen'. <sup>22</sup> Na' betj Spiritw che

Diosen' bžinen gwzoan len le', na' ca hora' Spiriton' naquen ca to ngolbex. Na' gosende' gwne Dios ben' zoa yaban', gwne':

—Le' naco' Xi'ina' bene' chacchgüeda', na' chebe chezaquelaže'chgüeda' chio'.

### **Diaža che Jesúsen'**

(Mt. 1:1-17)

<sup>23</sup> Na' ca do šichoa ize Jesúsen' cate' gwzolao bene' yogo'loł da' zedeyene'. Na' bene' ca' gwnita' na' gosone' xbab še naque' xi'in Joséna'. Josén' naque' xi'in Elí, <sup>24</sup> na' Elí naque' xi'in Matat, na' Matata' naque' xi'in Leví, na' Levína' naque' xi'in Melqui, na' Melquin' naque' xi'in Jana, na' Janan' naque' xi'in yeto ben' le' José. <sup>25</sup> Na' Joséna' naque' xi'in Matatías, na' Matatíasen' naque' xi'in Amós, na' Amósen' naque' xi'in Nahum, na' Nahunna' naque' xi'in Esli. Na' Eslin' naque' xi'in Nagai, <sup>26</sup> na' Nagain' naque' xi'in Maat, na' Maata' naque' xi'in Matatías, na' Matatíasen' naque' xi'in Semei, na' Semein' naque' xi'in José, na' Josén' naque' xi'in Judá. <sup>27</sup> Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri, <sup>28</sup> na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosanna' naque' xi'in Elmodam, na' Elmodanna' naque' xi'in Er. <sup>29</sup> Na' Era' naque' xi'in Josué, na' Josuén' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat. <sup>30</sup> Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim. <sup>31</sup> Na' Eliaquinna' naque' xi'in Melea, na' Melean' naque' xi'in Mainán, na' Mainánna' naque' xi'in Matata, na' Matatan' naque' xi'in Natán. <sup>32</sup> Na' Natánna' naque' xi'in David, na' Davida' naque' xi'in Isaí, na' Isaín' naque' xi'in Obed, na' Obeda' naque' xi'in Booz, na' Boozen' naque' xi'in Salmón, na' Salmónna' naque' xi'in Naasón. <sup>33</sup> Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque' xi'in Esrom, na' Esronna' naque' xi'in Fares. Na' Faresen' naque' xi'in Judá, <sup>34</sup> na' Judán' naque' xi'in Jacob, na' Jacoben' naque' xi'in Isaac, na' Isaaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor. <sup>35</sup> Na' Nacoren' naque' xi'in Serug, na' Seruga' naque' xi'in Ragau, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala, <sup>36</sup> na' Salan' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in Sem, na' Senna' naque' xi'in Noé, na' Noén' naque' xi'in Lamec. <sup>37</sup> Na' Lamequen' naque' xi'in Matusalén, na' Matusalénna' naque' xi'in Enoc, na' Enoca' naque' xi'in Jared, na' Jareden' naque' xi'in Mahalaleel. Na' Mahalaleela' naque' xi'in Cainán, <sup>38</sup> na' Cainánna' naque' xi'in Enós, na'

Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

**Satanásen' goclažen' co'oyelan' Jesúsén' cont gone' da' mal**

(Mt. 4:1-11; Mr.1:12-13)

**4** <sup>1</sup> Na' Spiritw che Diosen' gwnabian' yichjlaždao' Jesúsén'. Na' Jesúsén' beze'e cho'a yegw Jordán, na' Spiritua' benen cont gwyeje' latje daš. <sup>2</sup> Čhoa ža gwzoe' latje dašen' na' lao čhoa žan' bicze bi gwdagüe'. Na' cate' gwde čhoa žan' gwdone'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. <sup>3</sup> Nach gož Satanásen' le':

—Še le' naco' Xi'in Dios, gož yej nga yeyaquen yetextil.

<sup>4</sup> Na' gož Jesúsén' len:

—Nyojcz Xtiža' Dios' žan: “Gague yela' guagw na'zen' chyažje chio' benach cont gac bancho, san lecze chyažjecho yogo'lol diža' dan' ža Diosen'.”

<sup>5</sup> Na' gwche' Satanásen' le' to lo ya'a sibe na' bedao'nez blo'en le' yogo'lol naciön da' zjachi' yežlio. <sup>6-7</sup> Nach gožen le':

—Doxen yela' gwnabia' da' de yežlio nga naquen lo na' cont gwnežjuan' con no che'nda'. Še le' gwzoe' xibo' gonxeno' neda', nach gona' le' yela' gwnabia' che naciön ca' zjachi' yežlio nga na' len yela' zaca' yela' xdan che naciön ca'.

<sup>8</sup> Nach Jesúsén' gože' Satanásen':

—Becuas ca'ale Satanás. Nyojcz Xtiža' Diosen' žan: “Cheyala' šejnilaže'cho Xancho Diosen' na' toz le' gonxencho.”

<sup>9</sup> Nach Satanásen' gozche'en le' ciuda Jerusalén. Na' bcuen le' yichjo' yodao' blao gan' nac la'zelagüe' sibe, na' gožen le':

—Še len' naco' dogualje Xi'in Dios, nga boslažo' cuino', <sup>10</sup> le' nyojcz Xtiža' Diosen', žan:

Sela' Diosen' bene' ca' zjanac angl che' yesaclene' le' na' yesape' le',

<sup>11</sup> yesoxe' le' cont bi chego' no yej.

<sup>12</sup> Nach Jesúsén' gožen':

—Lecz ca' nyoj Xtiža' Diosen' žan: “Bitw goncho Xancho Diosen' prueba še lede' can' žen'.”

<sup>13</sup> Beyož gota'bia' bi gwzoe' Satanásen' co'oyelan' Jesúsén' gone' da' mal, nach becuasen šlož len le'.

**Jesúsén' gwzologüe' chyixjue'ede' diža' güen che Diosen'**

**distritw Galilea**

(Mt. 4:12-17; Mr. 1:14-15)

<sup>14</sup> Nach Jesúsén' beyeje' distritw Galilea, na' yela' guac che Spiritw che Diosen' gwzoan len le'. Na' yogo'lol bene' že' yež ca' zjachi' doxen Galilea

gosenezde' che Jesúsén'. <sup>15</sup> Na' Jesúsén' bsed blo'ede' legaque' lo' yodao' chegaquen', na' yogo'lo' bene' ca' gosonxene' le'.

### Bežin Jesúsén' Nazaret

(Mt. 13:53-58; Mr. 6:1-6)

<sup>16</sup> Na' bežin Jesúsén' yež Nazaret gan' gwcha'ogüe', na' gwyo'e yodao' ža che Dios can' ba yolagüe' chone', na' gwzechede' cont gwlabé'. <sup>17</sup> Na' ben' yo'o lo' ne'e yodao'na' bnežjue'ne' yiš da' ndobe gan' nyoj dan' bzoj da' Isaías ben' be' Xtiža' Diosén' cani'te. Na' Jesúsén' bzaše' yišen' na' beželde' ga nyojen žan:

<sup>18</sup> Zoa Spiritw che Diosa' len neda',  
na' Diosén' gwleje' neda' zedeya' diža' güen len bene' yaše'.  
Na' gwsele' neda' zedeyena' cont yesyeyaclaže' bene' ca'  
chesacyaše'de'.

Na' za'a cont gwsana' bene' ca' zjade ližya.

Na' zedeyena' cont yesyele'e bene' lchol.

Na' bene' chy chzaca', zedeyena' cont noch no yosoči yososaque'  
legaque'.

<sup>19</sup> Na' zedetixjue'eda' ba bžin ža gaclen Diosén' benachen'.

<sup>20</sup> Jesúsén' botobe' yišen' na' bonežjuen' ben' yo'o lo' ne'e yodaon' na' gwchi'e. Na' yogo' bene' ca' nita' yodaon' la' gosenatie' le'. <sup>21</sup> Nach gwzola' be'e diža' gwne':

—Ža na'aža ba chac can' ža Xtiža' Diosén' dan' ba benele nga.

<sup>22</sup> Na' yogo' bene' ca' gosende' diža' dan' be'e besyebande' catec mba nac xtiža' Jesúsén'. Na' gosenie' güen che' na' gose' lježe':

—¿Gague benga xi'in Josén'?

<sup>23</sup> Nach gož Jesúsén' legaque':

—Ye'ljale neda' can' ža diža' dan' de: "Bene' güen rmed le', beyon cuino'." Na' lecze ye'ljale neda': "Dan' chesene' beno' yež Capernaum da' bebane bene', lecz can' cheya'la' gono' lažcho nga."

<sup>24</sup> Nach goze'e legaque':

—Da' li chnia' le'e, bene' gualaž che note'teze bene' choe' xtiža' Diosén' bitw chesezi'e che'. <sup>25</sup> Ca tiemp che da' Elías ben' be' xtiža' Diosén' cani', bibi yejw goc šon iz yo gašje na' goc gwbin juisyw chegaque' doxen gan' zelao mbane Israel. Naquen da' li gwnita' zan no'ol güezebe yež ca' gan' mbane Israel ca' tiempa', <sup>26</sup> perw Diosén' bi gwsele' Elíasén' cont gaclene' ne to bene' güezeb ca'. Gwsele' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe. <sup>27</sup> Na' lecz ca' tiemp che da' Eliseo ben' be' xtiža' Diosén' cani', gwnita' zan bene' Israel bene' gosacšene len yižgüe' da' nzi' lepra. Ne to legaque' bi beyon Eliseon'. Toz bene' zito' bene' Siria, ben' le' Naamán, beyon Eliseon'.

<sup>28</sup> Na' yogo' bene' ca' že' yodao'na' cate' gosende' dan' gwna Jesúsén' beseža'achgüe'. <sup>29</sup> Na' la' besyezoža'te' na' besyebeje' Jesúsén' yežen', na'

goseche'ene' to lo ya'a da' zoa gala'ze, gosaclaže' yososlažoe'ne' lo ya'a na'ate, <sup>30</sup> perw bibi goc yesonde' le'. Con beza' Jesúsen' bedie' gachol gaque'.

**Jesúsen' bebeje' da' xigüe' dan' yo'o yichjlaždao' bene'**

(Mr. 1:21-28)

<sup>31</sup> Na' jasoe' yež Capernaum gan' mbane Galilean', na' ža che Dios bsed blo'ede' bene' ca' že' lo' yodao'na'. <sup>32</sup> Na' bene' ca' besyebande' ca' nac dan' bsed blo'eden', le bzejni'ide' cacze to bene' nezde' cayanen' nac xbab che Diosen'.

<sup>33</sup> Lo' yodao'na' gwzoo to bene' yo'o nyaze' da' xigüen'. Na' bosye'e gwne':

<sup>34</sup> —¿Bixchen' chgoša' chlaže' chio' len neto', Jesús bene' Nazaret? ¿Zedežiayo'o neto'? Neda' nombi'a le' na' nezda' naco' bene' laždao' xilaže' juisyw ben' gwseła' Diosen'.

<sup>35</sup> Nach Jesúsen' gwđile' da' xigüen' na' gožen':

—iSšago! Bechoj yichjlaždao' benga.

Na' bchix da' xigüen' bena' gachol bene' ca' že'na' nach bechojen. Perw bitw benen le' zi'. <sup>36</sup> Na' leca besyebane yogo' bene' ca', nach gose' lježe':

—¿Bixen' chac? ¿Bixe da' coben' chlo'e benga? Nacbia' nape' yeła' chnabia' na' yeła' guac, le chone' mandadw na' la' chechojte da' xigüe' da' yo'o nyaz bene'.

<sup>37</sup> Na' ca' nac dan' ben Jesúsen' gos gwłalje dižan' doxen lagüe yež ca' zjachi' do na'.

**Jesúsen' beyone' taobi'in che Simónna'**

(Mt. 8:14-15; Mr. 1:29-31)

<sup>38</sup> Na' cate' beze'e yodao'na', na' gwyeje' liž Simón. Na' taobi'in che Simónna' chacšende', yo'e da' la. Na' bosol güiže' Jesúsen' cont yeyone' le'. <sup>39</sup> Na' Jesúsen' gwzeche' cuite' gan' die', na' bcheque' gwđile' da' lan' cont bechojen. Nach taobi'in che Simónna' la' gwyastie' na' bsini'e da' gose'ej gosagüe'.

**Jesúsen' beyone' bene' zan**

(Mt. 8:16-17; Mr. 1:32-34)

<sup>40</sup> Na' cate' ba chxoa gwbižen' goseche'e con yogo' bene' chese'e yižgüe' jasesane' legaque' lao Jesúna'. Na' Jesúsen' gwxo'a ne'e yichj to toe' na' beyone' legaque'. <sup>41</sup> Na' lecz ca' bebej Jesúsen' da' xigüe' da' yo'o yichjlaždao' bene' zan. Na' besyechojen gosenen zižje, gosenan:

—Le' naco' Xi'in Dios.

Na' Jesúsen' gwđile' legaquen na' bitw be'e latje bi yesenan, le gosenezen naque' Cristo ben' gwlej Diosen' cont yedenabi'e.

**Jesúsna' gwde' doxen Galilean' bsed blo'ede'**

(Mr. 1:35-39)

<sup>42</sup> Na' beteyo cate' gwyeni', beze'e na' beyeje' to latje ga nono nla'. Na' bene' ca' besyeyiljue'ne' na' ja'aque' gan' zoen'. Na' gosaclačže' yosozague' Jesúsena' cont bi yeze'e. <sup>43</sup> Na' Jesúsena' gože' legaque':

—Lecz ca' bene' ca' nita' yež yoble cheyala' šjalo'eda'ne' cont yosozenague' che Diosena' na' nabi'e yichjlažda'ogaque'. Diosena' gwsele' neda' cont šjatixjue'eda' legaque' xtižen'.

<sup>44</sup> Ca' goquen', Jesúsena' gwde' to to yež che distritw Galilea na' bsed blo'ede' bene' ca' lo' yodao' chegaquen'.

**Gosezene' be zan bel' ya'a**

(Mt. 4:18-22; Mr. 1:16-20)

**5** <sup>1</sup> Na' šlac zecha Jesúsena' cho'a nisdao' da'na' nzi' Genesaret, besežag bene' zan na' bosochite' Jesúsena' da' gosaclačže' yosozenague' xtiža' Diosena' dan' bi'e cho'a nisdan'. <sup>2</sup> Na' Jesúsena' ble'ede' chope barcw dao' cho'a nisdan'. Na' bene' gwxcen bel' ca' ba besyežaše' lo' barcon' ba chesyeyibe' yixjw bel' chegaquen'. <sup>3</sup> Na' Jesúsena' gwyo'e lo' barcw che Simónna' na' gwnabde' le' bosožigue' barcon' yelate' lo' nisen'. Na' Jesúsena' gwchi'e lo' barcon' blo'ede' bene' ca' že'na'. <sup>4</sup> Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwzala' yixjw chelen' na' senle belen'.

<sup>5</sup> Nach Simónna' gože' Jesúsena':

—Maestrw, ba bento' žin do yel na' ne to nono bdoła'. Perw le' ba gwnao' yezolaoto', na' gwzala'to' yixjw ca' da' yoble.

<sup>6</sup> Na' beyož bosozala' yixjw chegaquen' zjanyicoco'ten belen', yeleze ca' yesyecheza'ten. <sup>7</sup> Na' bene' ca' zjanita' lo' barcw che Simónna' gosone' señw gosaxe' bene' lježen' že' yeto lo' barcw yoble cont yesaclene' legaque' yesyebeje' yixjon'. Yelez ca' gwdebe nisen' chopte barcw ca' dan' gosegüe'e bel' zan lo'enna'. <sup>8</sup> Nach Simónna', ben' lecz le' Pedro, cate' ble'ede' da'na' goquen' na' bzoa xibe' lao Jesúsena' gože' le':

—Xana', neda' naca' to bene' mal, bibi zaca' par so' nga len neda'.

<sup>9</sup> Gwne' ca' le le' txen len bene' lježe' ca' že' lo' barcon' besyebanchgüede' da' gosezene' bel' zanna'. <sup>10</sup> Lecz ca' besyebane xi'in ben' le' Zebedeo, zjanac chop biše'tie', Jacobo len Juan. Bene' ca' chesone' žin len Simónna'. Nach Jesúsena' gože' Simónna':

—Bitw žebo'. Le' naco' bene' gwxcen bel', na' chebejo' belen' lo' nisen'; perw na'a gona' cont gaxle bene' yesyechoje' lo' da' malen'.

<sup>11</sup> Na' cate' besyežinlene' barcon' yo biž, nach gosebejyichje' barcon' len yogo' xšinlaže' ca' na' ja'aclene' Jesúsena'.

**Jesúsen' beyone' to bene' che'ede' yižgüe' dan' nzi' lepra**

(Mt. 8:1-4; Mr. 1:40-45)

<sup>12</sup> Na' šlac Jesúsen' zoe' to yež na' bžin to bene' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' boł güiže'ne' gože'ne':

—Xana', še chaclažo', guac yeca'o yižgüe' dan' che'eda' nga.

<sup>13</sup> Nach Jesúsen' bli ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'. <sup>14</sup> Nach Jesúsen' bene' mandadw gože' le' notno ye'e can' ba beyone' le'. Na' gože' le':

—Con gwyey jaṅa' bxoza' cont le'ede' bach beyacdo'. Na' bnežjo da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

<sup>15</sup> Na' tža tža gos gwłalje diža' ca nac yela' guac dan' ben Jesúsen'. Na' besedob bene' zan cont bosozenague' xtiža' Jesúsen' na' cont beyone' legaque' len bite'teze yižgüe' da' chese'ede'. <sup>16</sup> Nach Jesúsen' bchoje' to ši'i güeje jal güiže' Diosen' to latje daš.

**Jesúsen' beyone' to bene' bi chda šla'a ni'a ne'e**

(Mt. 9:1-8; Mr. 2:1-12)

<sup>17</sup> Nach to ža zoa Jesúsen' to yo'o gan' chsed chlo'ede' bene'. Na' gala'ze zjanita' zan bene' Israel bene' zjanzi' fariseo. Na' lecze zjachi' yeto cuen bene' ca' chososed chosolo'ede' dan' bzoj da' Moisés. Bene' ca' že'na' za'aque' yogo'loł yež ca' gan' mbane distritw Galilea len distritw Judea, na' lecze bale' za'aque' ciuda Jerusalén. Na' bosozenague' diža' da' be' Jesúsen'. Na' yela' guac che Xancho Diosen' zoan len Jesúsa' na' beyone' bene' güe' ca'. <sup>18</sup> Na' besežin xonj bene' zjanlene' to bene' xinj, bene' bi chda šla'a ni'a ne'e, zjanxoe' le' to lo cam dao'. Na' gosacłáže' yesedie' šjasesane' le' lao Jesúsa'. <sup>19</sup> Na' da' že'chgua bene' zan bi goc latje yesedie' šjasesane' bene' güen' lao Jesúsen'. Nach bene' ca' gosepe' yichjo'ole gosesaljue' goseque'e tej na' beseletje'ne' len xcame'na' gachol bene' ca' že' lo' yo'ona' cont bžine' lao Jesúsen'. <sup>20</sup> Cate' gocbe'e Jesúsen' gosejnilaže' le' na' gože' bene' güe'na':

—Xi'ina', ba bezi'xena' xtołon'.

<sup>21</sup> Na' bene' ca' chososed chosolo'e dan' bzoj Moisésa' na' bene' fariseo ca' gosene':

—¿Non' chaque benga naque' chne' ca'? Chon cuine' ca' Dios. Le nono zoa bene' gac yezi'xene' xtoła' benachen'. Toz Diosen' gac yezi'xenen'.

<sup>22</sup> Jesúsen' gocbe'ede' ca' nac da' cheseza'laže' na' gože' legaque':

—¿Bichena' chza'laže'le' ca' lo' yichjlažda'ole? <sup>23</sup> Še yapa'ne': “Ba bezi'xena' xtołona'”, bi nezele še napa' yela' gwnabia' cont yezi'xena' xtole'na'. San še yapa'ne': “Gwyas na' gwda”, na' nacbia' še napa' yela'

guac gac can' gwnian'. <sup>24</sup> Na'ach gona' cont gacbe'ele napa' yela' gwnabia' cont yezi'xena' xto<sub>l</sub>a' be<sub>n</sub>ach, neda' naca' bena' gwse<sub>l</sub>a' Diosen' golja' be<sub>n</sub>ach.

Nach gože' bene' xinja':

—Chapa' le' beyas, beyoa' xcamon', na' beyej ližo'.

<sup>25</sup> Nach la' beyaste bene' xinja', chesena'te bene' ca' nita'na'. Nach beyoa' xcamen' na' beze'e zjayda liže' chonxene' Diosen'. <sup>26</sup> Na' yogo'lol bene' ca' že'na' besyebande' yela' guac che Jesús'en' dan' bene'na'. Nach gosonxene' Diosen', na' do chesežebe' gose' lježe':

—Da' yebanecho da' ca' ba ble'echo na'aža.

### Jesús'en' gwleje' Leví cont goque' le' txen

(Mt. 9:9-13; Mr. 2:13-17)

<sup>27</sup> Gwdena' beza' Jesús'en' na' ble'ede' to bene' güechixjw bene' le' Leví, chi'e latje gan' chchixjue'. Na' Jesús'en' gože' le':

—Da len neda'.

<sup>28</sup> Nach gwzoža' Levín' gwlejyichje' yogo' xšinlaze' na' gwyejlene' Jesús'en'.

<sup>29</sup> Nach Levína' bene' to lni xen ližen' par Jesús'en', na' ja'ac bene' zan bene' güechixjw ca' na' bene' yezica'chle na' gosebe'lene' le' cho'a mesen' gosagüe'. <sup>30</sup> Na' bene' ca' chososed chosolo'ede' dan' bzoj Moisés'en' na' len bene' fariseo ca' gosacyožlene' bene' ca' zjanaque' Jesús'en' txen, gose'e legaque':

—¿Nacxechen' che'ej chagwle txen len bene' güechixjw na' yebale bene' güen da' xinj ca'?

<sup>31</sup> Jesús'en' gože' legaque':

—Bene' cbi chesacšene bitw cheseyažjde' bene' güen rmed. Bene' ca' chesacšene, legaquen' cheseyažjde' bene' güen rmed. <sup>32</sup> Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xinj. Legaque' zjanaque' ca' bene' cheseyažjde' bene' güen rmed.

### Gosenabde' Jesús'en' bixchen' cbi gwleje' tgüeje ža gwbas

(Mt. 9:14-17; Mr. 2:18-22)

<sup>33</sup> Nach ba<sub>l</sub> bene' gose'e le':

—Bene' ca' zjanaque' txen len Juan na' bene' zjanaque' txen len bene' fariseo ca' chesonchgüe' gwbas chosol güiže' Diosen'. Perw na' bene' ca' zjanaque' le' txen chese'ej chesagüe'. ¿Bixchen'?

<sup>34</sup> Nach gož Jesús'en' legaque':

—¿Guac yesezoa gwbas bene' chaxe' to ga chac yela' güešagna' šlac ben' bšagnan' zoalene' legaque'? Bi gac. <sup>35</sup> Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.



<sup>36</sup> Na' Jesúsen' be'e jempl nga bzejni'ide' legaque':  
 —Notno zoa bene' cheza' xe' da' cobe na' yode'en de'exo'. Še gone' ca' gwžiaye'e xe' da' coben' na' xe' de'exon' bitw gac leben len lache' coben'.  
<sup>37</sup> Na' neca zoa bene' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen. <sup>38</sup> Cheyala' yesegue'e vino coben' lo' yid cobe cont bibi gaquen. <sup>39</sup> Na' ca nac bene' bach yolagüe' che'eje' vino golen', bitw ye'nde' ye'eje' vino coben', san že': “”Vino golen' nacchen güen.”

**Bene' ca' zjanaque' Jesúsen' txen goselechje' trigon'**  
**gosagüen' ža che Dios**  
*(Mt. 12:1-8; Mr. 2:23-28)*

**6** <sup>1</sup> Na' to ža nac ža che Dios, Jesúsen' gwdie' gan' nyaž trigw len bene' ca' zjanaque' le' txen. Nach bene' ca' zjanaque' le' txen goselechje' trigon' na' gosexoben' gosagüen'. <sup>2</sup> Na' besele'e bal' bene' fariseon' can' gosone' na' gose'e legaque':

—¿Bichen' chonle da' bi de lsens goncho ža che Dios?

<sup>3</sup> Na' Jesúsen' gože' legaque':

—¿Bina' gwlable can' ben da' rey David to ža cate' le' na' bene' lježe' ca' gosedone'? <sup>4</sup> Gwyo'o Davin' liž Dios na' jaxi'e yetextil da' nac che Dios da' bi chac gagw bene' bi nac bxoz, na' gwdagüen', na' lecze bnežjue' che bene' zja'ac len le'.

<sup>5</sup> Na' lecz ca' gwna Jesúsen':

—Naquen lo na' nia' bi da' nac güen goncho cate' nac ža che Dios, neda' naca' ben' gwsela' Diosen' golja' benach.

**Beyac to bene' nxo'on šla'a taque'**  
*(Mt. 12:9-14; Mr. 3:1-6)*

<sup>6</sup> Na' yeto ža che Dios gozeje' lo' yodaon' na' bsed blo'ede' bene' ca' že'na'. Na' ladjo bene' ca' zjaže'na' yo'o to bene' nxo'on taque' licha. <sup>7</sup> Na' bene' ca' chososed chosolo'e dan' bzoj da' Moisés na' bene' fariseo ca' chosogüia chesene'e Jesúsen' še yeyone' bena' ža che Dios cont de da' yosode'ede' yesagüe' xya che'. <sup>8</sup> Na' gocbe'e Jesúsen' can' chesone' xbaben', na' gože' ben' nxo'on taque':

—Gwzoža' na' gwzecha nga gachol.

Nach bena' bžine' gwzeche' lagüen'. <sup>9</sup> Na' Jesúsen' gože' bene' ca' že'na':

—¿Bi da' cheyala' goncho ža che Dios? ¿Goncho da' güen, še goncho da' mal? ¿Cheyala' yoslacho bene', še gwžiayi'chone'?

<sup>10</sup> Jesúsen' gwne'e yogo'te ben' že'na', nach gože' ben' nxo'on taque':

—Bli naon'.

Nach blien' na' taquen' beyaquen binlo. <sup>11</sup> Na' bene' ca' chososed chosolo'e leyna' na' len bene' fariseon' leca beseže'e na' gwzolao bosoxi'e nacle yesone' len Jesúsen'.

**Jesúsen' gwleje' šižinw postlw***(Mt. 10:1-4; Mr. 3:13-19)*

<sup>12</sup> Na' to ža gwey Jesúsen' to lo ya'a jel güiže' Diosen'. Na' do yel be'lene' Diosen' diža'. <sup>13</sup> Na' cate' gwe'ni', goxe' bene' ca' zjanaque' le' txen, nach gwleje' šižinue' na' bsi'e legaque' postlw. <sup>14</sup> Bene' qui gwleje': Simón ben' bsi'e Pedro, na' bene' biše' Andrés, na' Jacobo, na' Juan, na' Felipe, na' Bartolomé, <sup>15</sup> na' Mateo, na' Tomás, na' Jacobo xi'in Alfeo, na' Simón ben nac cananista, <sup>16</sup> na' Judas bene' biše' Jacobo, nach Judas Iscariote ben' bdie' Jesúsen' lo na' bene' chesegue'ede' le'.

**Jesúsen' bzejni'ide' bene' zan***(Mt. 4:23-25)*

<sup>17</sup> Na' beyetje' lo ya'an len legaque' na' gwzeche' ga nac to laše' len bene' ca' zjanaque' le' txen. Na' lecze nita' bene' zan bene' za'ac doxen Judean', do ciuda Jerusalénna' na' do gan' mbane yež ca' zjanzi' Tiro na' Sidón. Na' Tiro len Sidón zjachin' cho'a nisdao'. Na' len bene' ca' nita' chosozenague' xtiža' Jesúsen' zjančixe bal bene' chese'e yižgüe'. Na' Jesúsen' beyone' legaque'. <sup>18</sup> Na' bene' ca' zjajo'o zjanyaz da' xigüen' yichjlažda'ogaque', Jesúsen' bebejen'. <sup>19</sup> Na' yogo' bene' goseyiljue' nacle yesone' cont yeselapa' na'gaquen' le', le gosenezde' nape' yela' guac cont yega'a yižgüe' čhegaquen' še yeseche'ne'.

**Non' zoa mbalaz na' non' cbi zoa mbalaz***(Mt. 5:1-12)*

<sup>20</sup> Na' Jesúsen' gwlis lagüe' gwne'e bene' ca' zjanaque' le' txen na' gože' legaque':

—Mbalaz zoa le'e bene' yaše', le'e chzenagle čhe Diosen' cont chnabi'e yichjlažda'olen'.

<sup>21</sup> 'Mbalaz zoa le'e chdonle na'a, gwžin ža cate' bich tonle.

'Na' mbalaz zoa le'e chbežle na'a, gwžin ža cate' gwxižle.

<sup>22</sup> 'Neda' naca' ben' gwsela' Diosen' golja' benač. Na' mbalaz soale še dan' chejnilaže'le neda' chesegue'e bene' le'e, na' chesyebeje' le'e lo' yodao' čhegaque', na' cheseneye'e čhele, na' chesene' nacle bene' mal.

<sup>23</sup> Le yebechgüe cate' chac da' quinga, na' le soa mbalaz, le Diosen' gone' cont gacchgua da' güen čhele cate' yežinle gan' zoe'na'. Can' chesonde' le'e, ca'czen' goson da' xozxta'ogaque' len da' bene' ca' goso'e xtiža' Diosen' cani'.

<sup>24</sup> 'Na' nyaše'chguaze nac le'e bene' gwni'a. Chac güen čhele na'a, perw gague toli tocanen' gac čhele ca'.

<sup>25</sup> 'Nyaše'chguaze nac le'e dechgua da' chagwle na'a. Gwžin ža cate' bich bi gata' čhele.

'Nyaše'chguaze nac le'e chxižle ña'a. Gwžin ža cate' yegüine'le na' cuežyaše'le.

<sup>26</sup> 'Nyaše'chguaze nac le'e chesonxen yogo'loł bene' le'e. Ca'czen' goson da' xozxta'ogaque', gosonxene' bene' ca' goseziye'e gosene' cheso'e xtiža' Diosen' cani'.

### **Cheyała' gaquecho bene' chesegue'ede' chio'**

(Mt. 5:38-48; 7:12)

<sup>27</sup> 'Le'e chzenagle chia', cheyała' gaquele bene' chesegue'ede' le'e. Cheyała' gonle da' güen len bene' ca' chesegue'ede' le'e. <sup>28</sup> Le ñab cont bene' chesegue'ede' le'e ñite' mbalaz. Le soa le ñabe Diosen' gaclene' bene' chososaca'zi' le'e. <sup>29</sup> Še to bene' chaze' šla'a xaga'le, le güe' dan' yešla'a. Še to bene' que'e xadon chele, le güe' latje lechje' len xcamisle. <sup>30</sup> Note'teze bene' bi dan' ñabde' le'e, le gwnežjon. Še to bene' que'e bite'teze da' de chele, bitw yenablen. <sup>31</sup> Con yogo' da' güen da' chaclaže'le yeson benachen' len le'e, lecze ca' cheyała' gonle len legaque'.

<sup>32</sup> 'Še chaquele šinze bene' chacde' le'e na' bi chaquele bene' yoble, žbixchen' chaquele chebe Diosen' can' chonle? Ca'cze cheson bene' güen da' mal ca'. <sup>33</sup> Lecze še chonle da' güen len bene' ca' cheson da' güen len le'e na' bi chonle güen len bene' yoble, žbixchen' chaquele chebe Diosen' can' chonle? Ca'cze cheson bene' güen da' mal ca'. <sup>34</sup> Še chbejle bi da' chbejle len bene' chaquele yesyeyonen' le'e, žbixchen' chaquele chebe Diosen' can' chonle? Ca'cze cheson bene' güen da' mal ca', chesebeje' bi dan' chesebej lježgaque', na' nite' lez yosyonežjuen'. <sup>35</sup> Perw na' le'e, le soa le gaque bene' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyonen'. Še gonle ca' dan' ba gwnia' le'e, gwlo'ele nacle xi'in Dios ben' nac la'zelagüe bene' blao, na' Diosen' güebi'icze' güen len le'e. Le'na' naque' bene' šagüe' len bene' ca' bi cheso'e yela' choxcen che' na' len yezica'chle bene' güen da' mal ca'. <sup>36</sup> Na' ca' Xacho Diosen' ben' zoa yaba cheyaše' cheži'ilaže'de' yogo' benachen', ca'cze cheyała' yeyaše' yeži'ilaže'le ljež benachen'.

### **Bitw zaca'cho ñacho bene' zjanape' doła'**

(Mt. 7:1-5)

<sup>37</sup> 'Bitw gonle xbab zaca'le ñale bene' zjanape' doła'. Še ñale che bene' zjanape' doła', ca'cze Diosen' ñe' le'e ñale doła'. Na' bibi yosbaga'le bene' cont Diosen' bibi yosbague'de' le'e. Le soa le yezi'xen che bene' cont Diosen' yezi'xene' chele. <sup>38</sup> Le soa le gwnežjo bi da' gwnežjwle bene' na' Diosen' güeyoncze' chele. Bał bene' leca nała' chosochixe' bi dan' chesote', chosočiše' lao yagarm chegaquen' na' chesebiben' na' chosozaaya'aten'. Ca'czen' cheyała' gonle gwnežjwle bi dan' cheseyažje bene' na' lecz ca' gon Diosen' len le'e.

<sup>39</sup> Nach Jesúsen' be'lene' bene' že'na' to jempl, gwne':

—¿Guaque to bene' lchol cue'e nez yeto bene' lchol? Bi gac. Le nezecho chopte' šjasebixe' to lo' yechw. <sup>40</sup> Ca nac cate' to bene' chsede' len to maestrw, bi nacho naque' bene' blaoch ca maestraa'. Na' la'czla' še ben' chseda' gwda' yichje' yogo'lol dan' blo'e maestron' le', bitw naque' bene' sina'ch ca maestraa'.

<sup>41</sup> '¿Bixchen' chna'le beb dao' dan' yo'o lo' yejlao bene' lježle, na' bi chacbe'ele naquech beb xen dan' yo'o lo' yejlaolen'? <sup>42</sup> Na' še le'e yo'o to da' xen lo' yejlaolen' ¿nacxechen' che'le bene' lježlen': "Ben yebeja' beb dao' dan' yo'o lo' yejlaguon"? iBene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao bene' lježle.

### Dan' choncho chlo'en bin' yo'o lo' yichjlažda'ochon'

(Mt. 7:17-20; 12:34-35)

<sup>43</sup> 'Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen. <sup>44</sup> Con can' nac da' chbia to to yaguen' nezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas. <sup>45</sup> To bene' laždao' ži'ilaže' chone' da' güen, le ca ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ocho nan' za'aquen.

### Chope bene' na' yo'o da' chon to toe'

(Mt. 7:24-27)

<sup>46</sup> '¿Bichen' che'le neda': "Xana", na' bi chonle can' nona' mandadw? <sup>47</sup> Na'a nia' nac zaca'lebe bene' nao' neda' na' chzenague' xtiža' na' chone' can' nona' mandadw. <sup>48</sup> Naque' ca to bene' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoachachchguan. <sup>49</sup> Na' yogo' bene' chende' xtiža'na' na' bi chone' can' žia'na' naque' ca yeto bene' ben yo'o, con benen' lo' yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiyi'te yo'on.

### Jesúsen' beyone' xmos to xan soldadw

(Mt. 8:5-13)

**7** <sup>1</sup> Na' cate' beyož be' Jesúsen' diža' len bene' ca', beyeje' yež Capernaum. <sup>2</sup> Na' zoa to xan soldadw bene' bitw naque' bene' Israel. Na' zoa to xmose' chacšenchgüede', na' yelez ba de' par gate'. Na' xan soldadon' chacchgüede' le'. <sup>3</sup> Na' cate' xan soldadon' bende' diža' che Jesúsen', gwsele' bal bene' gole blao che bene' Israel cont jasenabde' Jesúsen' šeje' liže' yeyone' xmose'. <sup>4</sup> Nach cate' besežine' gan' zoa Jesúsen', gosenabde' le' gaclene' xan soldadon'. Na' gose'e Jesúsen':

—Xan soldadon' naque' to bene' zaque' gacleno', <sup>5</sup> le chacde' chio' bene' Israel, na' le' bene' yodao' cheto' nga len xmechue'.

<sup>6</sup> Nach gwyej Jesús'en' len legaque', perw za' yesežine' liže'na' cate' gwsela' xan soldadon' bal' bene' migw che' lao Jesús'en' na' gose'ene':

—Xan soldadon' že' bitw gwša'a yichjo' yido' liže'na', le nezde' bitw zaque' cont šo' liže'na'. <sup>7</sup> Da'nan' bitw beyaxjde' yide' nabde' le' gacleno'ne'. Con che'nde' gonšco' mandadw yeyaque xmosena'. <sup>8</sup> Xan soldadon' že' zoa bene' chnabia' le' perw lecze nita' soldadw che' na' chnabi'e legaque'. Na' cate' che'e toe': "Gwyej", na' cheje', na' cate' che'e yetoe': "Da", na' chide', na' cate' che'e xmosen': "Da' nga gono", na' chonen'. Na' nezde' con nao' yeyac xmosena' na' yeyacde'.

<sup>9</sup> Na' Jesús'en' cate' bende' diža' dan' gose' bene' migw che' xan soldadon' le', bebande' na' beyechje' gože' bene' zan ca' zjanao' le':

—Žia' le'e ne toze bene' Israel bina' šejnilaže' neda' ca chejnilaže' benga bi naque' bene' Israel.

<sup>10</sup> Nach jaya'ac bene' ca' gwsela' xan soldadon'. Cate' besyežine' liže'na' ba beyaque xmosen'.

### Jesús'en' bosbane' xi'in to no'ole güezebe

<sup>11</sup> Jesús'en' gwyeje' to yež dan' nzi' Naín len bene' ca' zjanaque' le' txen na' zan bene' yoble. <sup>12</sup> Ba zja'aque' gala'ze par yesežine' cho'a puert che yežna' cate' besele'ede' chesechoj xonj bene' cho'a puerten' zjanlene' to bene' guat. Na' ben' goten' naque' bene' tliša', na' xne'en naque' no'ole güezebe. Na' bene' zan bene' lo yeža' zja'aclene' xna' bene' guaten'. <sup>13</sup> Na' cate' ble'e Xanchon' no'olen', beyaše'de' le' na' gože'ne':

—Bitw cuežo'.

<sup>14</sup> Nach gwyeje' jaxoa ne'en lo yagla' gan' xoa bene' guata'. Nach bene' ca' zjanlen le' gosebeze'. Na' gože' bene' guata':

—Bene' güego', neda' žia', beyas.

<sup>15</sup> Nach bene' guaten' gwchi'e na' gwzolagüe' benie'. Na' Jesús'en' beyone' le' lo na' xne'e. <sup>16</sup> Na' yogo'lol bene' ca' besežebe' dan' beban bene' guata' nach gosonxene' Diosen' gosene':

—Ba bla' to bene' blao ga zoacho, bene' choe' xtiža' Diosen', na' Diosen' ba gwsele'ne' cont gaclene' chio' naccho nación che'.

<sup>17</sup> Ca nac dan' ben Jesús'en' gos gwla'lj diža' chen' doxen Judea na' yogo'lol yež ca' dan' zjanita' gala'ze.

### Juanna' gwsele' chope ben' gosaque' le' txen gan' zoa Jesús'en'

(Mt. 11:2-19)

<sup>18</sup> Nach bene' ca' zjanaque' txen len Juanna' jaseye'lene' le' diža' yogo'lol ca' nac dan' chon Jesús'en'. Nach gox Juanna' chope bene' ca'

<sup>19</sup> nach gože' legaque':

—Le šja'ac gan' zoa Jesúsen' na' ye'lne': “¿Len' naco' ben' chbezto' sela' Diosen' o še cheyała' cuezchto' yid bene' yoble?”

<sup>20</sup> Nach bene' ca' chope cate' besežine' gan' zoa Jesúsen' gose'ene':

—Juan ben' chzoa bene' nis gwsele' neto' laguo' nga nabeto' le' še len' naco' ben' chbezto' sela' Diosen' o še cuezchto' yid bene' yoble.

<sup>21</sup> Šlacte ne' nita' chope bene' ca', Jesúsen' beyone' bene' zan bene' ca' chesacšene na' bene' chese'ede' yižgüe' gual. Lecze bebeje' da' xigüe' da' zjajo'o zjanyaz yichjlaždao' bene' zan. Na' bene' cont besyele'e zan bene' lchol. <sup>22</sup> Nach Jesúsen' boži'e xtiža' bene' ca' gwseła' Juanna' lagüe'na', gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. Ba ble'ele chona' cont chesyete'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen len bene' yaše' ca'. <sup>23</sup> Mbalaz zoa bene' chejle'e chia' na' bi chdebde'.

<sup>24</sup> Na' cate' besyeya'ac bene' ca' gwseła' Juanna', nach Jesúsen' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Šayichj šayen chaque'? Bi naque' ca'. <sup>25</sup> ¿Nac naque' caten' jale'elne'? ¿Nyaze' lache' šagüe'? ¿še bitw? le bene' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o güenchgua, ca no liž bene' gwnabia'. <sup>26</sup> ¿Noxen' jale'ele? ¿Naque' to bene' choe' xtiža' Diosen'? Da' li naque' to bene' choe' xtiža' Dios, perw chnia' le'e, zaca'che' ca note'teze bene' choe' xtiža' Dios. <sup>27</sup> Che benga nyojen le'e Xtiža' Diosen' žan:

Neda' Dios sela' to bene' cuialagüe' laguo' güe'e xtižon' cont cate' yido' ba nita' bene' yesonxene' le'.

<sup>28</sup> Chnia' le'e, notech no beñač na' soa bene' naquech bene' blaoch ca Juanna'. Perw na' note'teze bene' gwzenague' che Diosen' cont Diosen' nabi'e yichjlažda'ogüe', la'czła' bi naque' bene' blao, gwžin ža cate' šejni'ichde' chia' clel ca Juanna'.

<sup>29</sup> Ba bzoa Juanna' bene' zan nis na' len bał bene' güechixjw. Na' yogo' bene' ca' gosacbe'ede' Diosen' zejcze' to liča dan' gwsele' Juanna' jatixjue'ede' legaque' yesyetinjde' xtoła'gaque'. <sup>30</sup> Perw na' bene' fariseo ca' na' bene' ca' chososed chosolo'e dan' bzoj da' Moisés, goson yichjlaogaquen' cbi besyetinjde' xtoła'gaquen' can' goclaže' Diosen'. Bi gosaclaže' gwzoa Juanna' legaque' nis. <sup>31</sup> Nach Jesúsen' gože' legaque':

—¿No gwsaca'lebda' le'e zoale na'a? ¿No chon can' chonlen'? <sup>32</sup> Nacle ca bidao' neče bicze bi de chlebele. Can' zjanac bidao' ca', cate' nita'be' gan' chac ya'a chese' lježbe': “Ba bcuežto' bžejo, neca bya'ale, na' ba bilyaše'to', neca gwchežle.” <sup>33</sup> Juan ben' chzoa bene' nis bide' laole nga, bitw güe'ej gwdagwšagüe' can' chese'ej chesagw bene' yoble, na' neca

güe'eje' vino, nach gwnale che': "Yo'o nyaz da' xigüen' yichjlažda'ogüe'." <sup>34</sup> Na' neda', chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw, neda' naca' ben' gwsela' Diosen' golja' benach. Na' lecze žale naca' migw che bene' güechixjw ca' na' migw che nochle bene' güen da' xinj. <sup>35</sup> Perw na' bene' chosozenag che Diosen' zjanape' to yela' sina' na' chesone' cont nacbia' Diosa' naque' la'zelagüe' bene' sina'.

### Jesúsen' gweje' liž Simón bene' fariseo

<sup>36</sup> To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'. <sup>37</sup> Na' to no'ole lo ciudan', no'ole zle', gwnezde' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze chla' zix. <sup>38</sup> Na' jabigue' gala'ze xni'a Jesúsen' na' gwcheže' na' nis xchež chen' bžonen ni'a Jesúsen' gwbišen. Na' bxie' ni'ena' len yiša' yichje' na' bnopen' na' gwdeben' set zixen'. <sup>39</sup> Na' ben' goxe' Jesúsen' ližen', cate' ble'ede' can' chon no'ola' na' gocde': "Šaca' benga naque' to bene' choe' xtiža' Dios, guache'ede' no'olen' chgan ni'ena' naque' no'ole zle'". <sup>40</sup> Nach Jesúsen' gože'ne':

—Simón, de to da' che'nda' yapa' le'.

Nach Simónna' gože' Jesúsen':

—Gwnan Maestrw.

<sup>41</sup> Jesúsen' gože'ne':

—Gwzoa to bene' na' nita' chope bene' chesale' xmechue'. Toe' chale' gayo' gayoa mechw da' nzi' denario, na' ben' yeto chale' šiyon mechw lecze denario. <sup>42</sup> Na' chopte bene' ca' ne toe' ca de chegaque' cont yesyeyixjue' xyan'. Na' ben' gwlej mechon' gwlejiyichje' dan' chesale' chen'. Gwnašc neda', čnoe' bene' ca' chope' gosacchde' che'?

<sup>43</sup> Nach Simónna' gože'ne':

—Šeca ben' goc xya chen' da' xench na' gwlejiyichjen'.

Jesúsen' gože'ne':

—Da' li can' ba gwnao'na' naquen.

<sup>44</sup> Nach Jesúsen' gweychje' gwne'e no'ola' na' gože' Simónna':

—Čhle'edo' no'ole nga? Neda' ba gwyo'a ližo' nga na' bi beño' nis chib ni'a, perw no'ole nga ba gwdibe' ni'an' len nis xchež chen' bxien' len yiša' yichje'. <sup>45</sup> Bi bnopo' neda', perw na' no'ole nga cate' bla'atia' gwzolagüe' chnope' ni'a nga. <sup>46</sup> Bi gwdebo' set yichja', perw no'ole nga ba gwdebe' set zix ni'a nga. <sup>47</sup> Na' žia' le', xtole'na' gosaquen da' zan, perw ba bezi'xena' che'. Da'nan' chacchgüede' neda'. Bene' bi žinlaže' xtolen' ca xtoła' no'ole nga, cate' yezi'xena' che' bitw gactecde' neda'.

<sup>48</sup> Nach gože' no'olen':

—Ba bezi'xena' xtoło'na'.

<sup>49</sup> Nach bene' ca' chesagw len Jesús'en' txen lo mesen' gwzolao chese' lježe':

—¿Nox benga chacde' le'na' chezi'xene' xtoła' benachen'?

<sup>50</sup> Nach gož Jesús'en' no'ola':

—Dan' chejnilažo' neda' da'nan' ba de yela' mban chio' toli tocane.

Beyej to šagüe' to güen.

### No'ol ca' gosaclene' Jesús'en'

**8** <sup>1</sup> Na' gwdechle gwey Jesús'a' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' bene' yosozenague' che'. Na' zja'aclen bene' šižinw ca' le', bene' ca' zjanzi' postlw. <sup>2</sup> Nach to xonj no'ole lecze zja'aclene' Jesús'en' bene' ca' ba beyone'. Bale' ba bebeje' da' xigüe' da' zjajo'o zjanyaz lo' yichjlažda'ogaque' na' yebale' ba beyone'ne' cate' gosacšende'. Na' toe' lie' María bene' Magdala, bebej Jesús'en' gaže da' xigüe' gwo'o gwyaz yichjlažda'ogüe'na'. <sup>3</sup> Nach lecze len ben' le Juana, xo'ole ben' le Chuza, na' Chuzan', gwo'o lo ne'e liž rey Herodes na' yežlio che' ca'. Na' lecze len ben' le Susana gwejlene' Jesús'en', na' yezan bene' yezica'chle. Na' no'ol ca' bosochine' bite'teze da' gota' chegaque' cont bosonežjue' dan' byažje Jesús'en' len bene' ca' zjanaque' le' txen.

### Jempl che bene' goz trigon'

(Mt. 13:1-9; Mr. 4:1-9)

<sup>4</sup> Na' bene' zan besežag gan' zoa Jesús'en' bene' za'ac to to yež ca'. Na' be'e to jempl, gwne':

<sup>5</sup> —To bene' güen žin jeze' trigw na' šlac zeje' chose' trigon' late' bin jasechazen do cho'a nezen', na' bosolej bosošošj bene' len, na' be žia xil be chaš le'e yaba gosagwban'. <sup>6</sup> Yelaten' jasechazen ga nac lo yej, na' cate' beselan' na' gosebizen, le gague bi gopa' den'. <sup>7</sup> Yelaten' jasechazen ga nac lo yag yeše', na' gosecha'on txen, na' bosolole' yag yeše' ca' len. <sup>8</sup> Perw na' yelaten' jasechazen ga nac yo šagüe' na' beselan', na' balen gosebian to gayoa güeje.

Na' beyož be'e diža' quinga gwne' zižje gože' legaque':

—Le'e žia nagle da' chene, le gwzenag xtiža'na'.

### Jesús'en' gwne' bixchen' bi'e jempl cate' bzejni'ide' bene'

(Mt. 13:10-17; Mr. 4:10-12)

<sup>9</sup> Nach bene' ca' zjanaque' Jesús'en' txen gosenabde' le' bi zejen jempl da' ba bi'e. <sup>10</sup> Na' gož Jesús'en' legaque':

—Nono na' neze can' nac yela' gwnabia' che Diosen'. Perw ba chone' cont le'e chejnilaže'lene' nezelen. Perw bene' bi chesaclaže' yesejnilaže'ne', chzejni'igacda'ne' len jempl. Chona' ca' cont yesele'ede'



can' chonan' na' bitw yesacbe'ede' bi zejen, na' cont yesende' xtižan' na' bi yesejni'iden'.

**Jesúsen' bzejni'ide' bi zejen jempl che bene' goz trigon'**

(Mt. 13:18-23; Mr. 4:13-20)

<sup>11</sup> 'Na' ca nac jempl nga zejen quinga: Ca dan' byažen zejen xtiža' Dios.  
<sup>12</sup> Na' bin dan' besego'onen chanezen', zejen bene' ca' chesende' xtiža' Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejnilaže' le' na' bi gata' yela' mban chegaque' toli tocane. <sup>13</sup> Na' bin dan' besego'on ga nac lo yej zjanaquen ca bene' chesyebede' xtiža' Diosen', perw zjanaque' ca to da' bibi loe chon, šložga chesejle'e che xtiža' Diosen', na' cate' chac bi da' mal chegaque' la' chesebejyichjte' xtižen'. <sup>14</sup> Na' bin dan' besego'onen ga nac lo yag yeše', zejen ca bene' ca' ba gosende' xtiža' Diosen', perw šlac zjambane' chesyelal chesyěžjde' na' chese'nde' yeseni'e, na' chesede' chesonteze' con da' žazen chegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'n'an' bi chesejnilaže' le' ca cheyala'. <sup>15</sup> Na' da' ca' besego'onen lo yo šagüen', zejen ca bene' cate' chesende' xtiža' Diosen' chesezi'en chesonen' chegaque', na' chesejnilaže' le' do yichj do laže', na' chesechejde' bite'tez dan' chac chegaque' cont chesone' can' che'ne Diosa'.

**Jempl che yi' dan' chguala'cho**

(Mr. 4:21-25)

<sup>16</sup> Na' Jesúsen' gwne':

—Notno gwguala' to yi' na' gw dosen' to yeso', na' neca gwcuase' yin' xan xcame'. San chde'en le'e ze'e cont gwsenin' len yogo'lol bene' yeso' lo' yo'o. <sup>17</sup> Le yogo'lol da' ngaše' chia' neda', lenna' gwlo'elaon, na' yogo'lol da' nono na' neze chia', žin ža yesenezden' na' yesejni'iden'.

<sup>18</sup> 'Le gwzenag da' quinga da' chzejni'ida' le'e, le note'teze bene' chzenague' xtiža' Diosen' gwzejni'ich Diosen' le', perw na' note'teze bene' bi chzenague', da' daon' chacde' ba nezde', yeca'a Diosen' len.

**Xna' Jesúsen' len bene' biše' ca' besežine' gan' zoe'**

(Mt. 12:46-50; Mr. 3:31-35)

<sup>19</sup> Na' xna' Jesúsen' len bene' biše' ca' besežine' gan' zoa Jesúsen', gosaclače' yeso'e, perw catec bene' zan že' gague goc latje yesežine' lagüe' na'ate. <sup>20</sup> Na' to ben' ze na' gože' Jesúsen':

—Xna'o len bene' bišo' ca' zjanite' chy'o na' chesacláže' yedesene'e le'e.

<sup>21</sup> Na' Jesúsen' gože' legaque':

—Bene' ca' chosozenag xtiža' Diosen' na' chesezi'e cho'alao xtižen', bene' can' zjanaque' xna'a na' biša'.

**Jesúsen' bcueze' be' bdono' lo nisdao'**

(Mt. 8:23-27; Mr. 4:35-41)

<sup>22</sup> Na' goc to ža Jesúsen' gwyo'e to lo barcw len bene' ca' zjanaque' le' txen. Na' gože' legaque':

—Laga'cho yešla'ale nisdaon'.

Nach bosose'e barcon'. <sup>23</sup> Šlac zejen lo nisen' gwtas Jesúsen'. Nach gwzolao gwyechj to be' bdono' lo nisdaon', na' gwzolao cheyož nis lo' barcon'. Na' besexožde' yesebiaye'e. <sup>24</sup> Nach bosyosbane' Jesúsen' gose'e le':

—iMaestrw! iMaestrw! Bač chbiayi'cho.

Nach gwyase' na' gwdile' be' bdono' len nisdaon', na' la' gosebe'žiten.

<sup>25</sup> Na' gože' legaque':

—¿Nacxečen' bi chejle'le chia'?

Nach legaque' besežebe' len besyebande'. Nach gose' lježe':

—¿Noxe benga? lente be' bdono' na' len nisdaon' chosozenaguen che da' že'.

**To bene' Gadara yo'o nyaze' da' xigüe'**

(Mt. 8:28-34; Mr. 5:1-20)

<sup>26</sup> Na' besežine' laž bene' Gadara ca', to yež da' chi' šla'a distritw Galilean', laga'cho nisdao'. <sup>27</sup> Na' cate' bechoj Jesúsen' lo' barcoa', to bene' lo yežna' jašague' le'. Ba gwža yo'o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do capsantwle. <sup>28-29</sup> Na' bene' gualaž che' ca' bosocheje' ni'a ne'e len gden na' gosape' le'. Na' da' xigüe' ca' gosonen cont bzojx btine' gdenna' zan ni'a. Na' gosonen cont gwyeye' ga nono bene' zjanla'. Na' bena' cate' ble'ede' Jesúsen' na' bzoa xibe' lagüen'. Na' bosye'e zižje gwne':

—¿Bixčen' chgoša' chlaže' chio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chneyoeda' le' bi gwsaco' neda'.

Gwne' ca' dan' ben Jesúsen' mandadw yechoj da' xigüen' yichjlažda'ogüen'. <sup>30</sup> Nach Jesúsen' gože' da' xigüen' yo'o nyaz yichjlaždao' bena':

—¿Bi lio'?

Nach da' xigüen' gwnan:

—Legión lia'.

Gwnan ca' le' zjanaquen da' zan zjajo'on yichjlažda'ogüen'. <sup>31</sup> Nach da' xigüe' ca' gosata'yoen Jesús'a bi yeselen' lo yi' gabil. <sup>32</sup> Na' to ya'a da' zoa gala'ze chesaš zan coš chesagwba'. Nach da' xigüe' ca' gosata'yoen Jesúsen' gwnežjue' latje šjaseyo'on yichjlaždao' coš ca'. Na' Jesúsen' bnežjue' latje. <sup>33</sup> Nach besyechojen yichjlaždao' bena' na' jaseyo'on

yichjlaždao' coš ca'. Na' besyeyetjses coš ca' le'e ya'a gan' nita'ba' na' jaselažo'ba' lo' nisdao' ga gosatba' gose'ejba' nis.

<sup>34</sup> Na' bene' ca' chosoyoe' cošen' besele'ede' dan' ba goquen' bosyoxonje' jasyeyeže' bene' lagüe yež len bene' chaš yixe', gose'e legaue' can' ba goquen. <sup>35</sup> Nach ja'ac bene' jasene'e bixen' goc. Na' cate' besežine' gan' zoa Jesúsen' besele'ede' bena' ba gwyo'o gwyaz da' xigüen', na'a ba chi'e gala'ze cuit Jesúsen' nyaz xalane', na' ba bezoa yichjlažda'ogüe' binlo. Na' besežebe'. <sup>36</sup> Na' bene' ca' besele'ede' can' goquen' goso'e diža' che dan' goc che bena' gwyo'o gwyaz yichjlažda'ogüe' da' xigüen' na' can' ba beyaque'. <sup>37</sup> Nach yogo'lol bene' ca' že' gan' mbane yež Gadaran' jaseta'yoede' Jesúsen' yeze'e lažgaquen', le besežebchgüe'. Nach Jesúsen' beyo'e lo' barcon' cont yeze'e. <sup>38</sup> Na' bena' beyaque cate' Jesúsen' bebeje' da' xigüe' ca' goso'o gosazen yichjlažda'ogüe', gota'yoede' le' gwnežjue' latje šejlene'ne'. Perw Jesúsen' bi be'e latje, san gože'ne':

<sup>39</sup> —Beyej ližo' na' jayež bene' lo' yo'o chio' yogo' da' güen da' ba ben Diosen' len le'.

Nach beza' ben' na' gwzologüe' cho'e diža' doxen yežen' yogo' can' ba ben Jesúsen' len le'.

**Jesúsen' beyone' xi'in Jairo na' beyone' yeto no'ole bene' gwdane' xe'**  
(Mt. 9:18-26; Mr. 5:21-43)

<sup>40</sup> Na' cate' Jesúsen' belague' nisdan', bene' zan ba nita' chesebeze' le'. Chesyebechgüede' da' bežine' na'. <sup>41</sup> Na' bžin to bene' le' Jairo, ben' nac to bene' gwnabia' che yodao' che yežna'. Na' bzoa xibe' lao Jesúsen' gota'yoede' le' šejlene' le' liže', <sup>42</sup> le ba zoa gat bi' no'ol che'. Nacbe' bi' tliša', na' šižinw izguebe'. Na' šlac zej Jesúsen' len le', bene' zan gosebiadi'e le' na' bosochichgüe' le'.

<sup>43</sup> Na' len to no'ole ba goc šižinw iz chzoe' gwba'o na' ba benditje doxen xmechue' len bene' güen rmed ca'. Na' notno goc gon le' rmed.

<sup>44</sup> Na' gwbiga' no'olen' cože' Jesúsen' na' gwdane' lox xen', nach la' gwlezte gwba'o dan' zoen'.

<sup>45</sup> Na' gwna Jesúsen':

—¿Non' gwdan neda'?

Na' ne toe' ca' gosechebe' še ba gosegane' le'. Nach Pedron' len bene' ca' zja'aclen Jesúsen' gose'e le':

—Maestrw, bene' zan bene' za'ac nga chosochie' le' na' chosožigue' le' nile na'le. ¿Bixchen' chnabo' no gwdan xaon'?

<sup>46</sup> Nach Jesúsen' gože' legaue':

—To bene' ba gwdane' neda'. Chacbe'eda' ba beyacde' len yela' guac chia'na'.

<sup>47</sup> Nach no'olen' cate' gocbe'ede' cbi bgaše' dan' benen', nach gwbigue' lao Jesúsen' do chaž chžebe' na' bzoa xibe' lagüe'na', be'e diža' lao yogo'

bene' ca' že'na' bixchen' gwdane' le' na' can' goc la' beyactede'. <sup>48</sup> Nach gož Jesúsa' no'ola':

—Xi'ina', ba beyacdo' dan' chejnilažo' neda'. Beyej binlo.

<sup>49</sup> Ne' choe'te Jesúsa' dižan' ca' cate' bžin to bene' gwza' liž Jairo ježe' le':

—Ba got bi' no'ol dao' chion'. Bich gondo' Maestroa' zed.

<sup>50</sup> Perw cate' bene' Jesúsen', na' gože' Jairo:

—Bitw žebo', con gwejnilaže' neda' na' yeyaquebe'.

<sup>51</sup> Na' cate' besežine' liž Jairona', Jesúsen' bi be'e latje yeso'o zan bene' ca' zja'aclen le', san Pedro, len Juan, len Jacobo, na' len xaxna' bi' guat na'ze goso'o. <sup>52</sup> Na' ba chi'chgua žaš na' yogo' bene' ca' že'na' chesebežchgüe'. Na' Jesúsen' gože' legaque':

—Bitw cuežle. Biña' gatbe', san chtasbe'.

<sup>53</sup> Na' bosoxiže' gosonle' che' da' zjanezde' ba gotbe'. <sup>54</sup> Perw Jesúsen' beḡue' taca' bi' no'ol guaten' na' boḡ güiže'be' gože'be':

—No'ol dao', beyas.

<sup>55</sup> Nach bebambe', la' beyastebe'. Na' Jesúsen' bene' mandadw yeso'ebe' da' gagwbe'. <sup>56</sup> Na' xaxna'be' besyebanchgüede'. Perw Jesúsen' bene' mandadw bi yeso'e diža' can' goca'.

### Jesúsa' gwsele' bene' šižinw ca' jasedixjue'ede' xtižen'

(Mt. 10:5-15; Mr. 6:7-13)

**9** <sup>1</sup> Jesúsen' botobe' bene' šižinw ca' gwleje' cont zjanaque' le' txen na' bnežjue' legaque' yela' gwnabia' na' yela' guac cont goc besyebje' da' xigüe' lo' yichjlaždao' bene', na' lecze ca' besyeyone' bene' ca' chesacšene. <sup>2</sup> Na' lecze bene' mandadw šjasedixjue'ede' Diosa' nabi'e yichjlaždao' bene' yosozenag che'. Na' bene' mandadw yesyeyone' no bene' güe'. <sup>3</sup> Na' gože' legaque':

—Bibi goḡe'le tnez. Bitw goḡe'le xis da' gwchiše'le, neca gua'le bzod, ne yet, ne mechw, na' bitw gua'le yeto xcamisle. <sup>4</sup> Cate' žinle to liž bene', na'ze yega'anle šlac zoale lagüe yeža'; cate'ch yeza'le yeža', cana'ch yeza'le latja'. <sup>5</sup> Na' še zoa ga bi yosolebe' le'e, cate' yeza'le na', le cuibe ni'alen' yo bište cont nacbia' malen' chesone' bi chosozenague' xtiža' Diosen'.

<sup>6</sup> Nach bene' šižinw ca' ja'aque' to to yež, na' gate'teze ja'aque' jasedixjue'ede' diža' güen che' Jesúsen' na' besyeyone' no bene' güe'.

### Ba gosote' Juan ben' bzoa bene' nis

(Mt. 14:1-12; Mr. 6:14-29)

<sup>7</sup> Na' gobernador Herodes goque' tole bende' yogo'lol da' güen da' chon Jesúsen'. Gocžejlaže', le baḡ bene' gose'e le' ba beban da' Juan ladjo bene' guat ca'. <sup>8</sup> Na' yebaḡe' gosene' šeca da' Elías ben' be' xtiža' Diosen' cani' ba

bela' yežlio nga da' yoble. Yebale' chesene' yeto bene' be' xtiža' Diosen' cani'te ba bebane' ladjo bene' guat ca'. <sup>9</sup> Na' Herodesen' gwne':

—Neda' bena' mandaw gosehogue' yen Juanna', perw inoxen' chon da' güen ca dan' chesoe' bene' diža'?

Na' gw diljwlaže' nacle gone' cont le'ede' Jesúsén'.

### **Bguagw Jesúsén' gayo' mil bene'**

(Mt. 14:13-21; Mr. 6:30-44; Jn. 6:1-14)

<sup>10</sup> Na' cate' besyežin postlw ca' gan' zoa Jesúsén' nach gose'e le' can' ba gosonen'. Na' gwchi'e legacze' na' ja'aque' to latje gan' mbane yež Betsaida. <sup>11</sup> Cate' gosacbe'e bene' ca' nita' gan' zoa Jesúsén' ba gosa'aque' len bene' ca' zjanaque' le' txen, nach zja'aque' zjana'ogüe' legaque'. Jesúsén' blebe' legaque' na' bsd blo'ede' legaque' Diosen' nabi'e yichjlaždao' bene' yosozenag che', na' beyone' bene' ca' chesacšene.

<sup>12</sup> Cate' gwzolao gwxa gwbižen', nach bene' šižinw ca' zjanaque' Jesúsén' txen gose'ene':

—Besela' bene' quinga cont šjaya'aque' ga že' bene' do ranšw na' do yež ca' dan' nyechj mbi'i cont yeseyiljue' ga yesetase' na' yeseyiljue' da' yese'ej yesagüe', le ca nac latje gan' zoacho nga, naquen to latje daš.

<sup>13</sup> Perw na' gož Jesúsén' legaque':

—Le'e le güe'e da' yesagüe'.

Na' gose'e le':

—Gayo'ga yetextil na' yechopga bel ya'a de checho, lete še si'chon cont gaquen yesagw yogo'lol bene' quinga.

<sup>14</sup> Gosene' ca' le že' ca gayo' mil bene' byo, bi cuent no'ol ca' len bidao'. Nach Jesúsén' gože' bene' ca' zjanaque' le' txen:

—Le gon mandaw yesebe' šiyon güej bene' ca'.

<sup>15</sup> Nach gosone' mandaw gosebe' yogo' bene' ca', <sup>16</sup> na' Jesúsén' gwxi'e gayo' yetextilen' na' chope bel ya'ana', na' gwne'e yabale, be'e yela' choxcen che Diosen' na' bzojnen' na' be'en bene' šižinw ca' cont goso'e che to to bene' ca'. <sup>17</sup> Na' gosagüen' ca' goseljde'. Nach bososše'e šižinw žome len yetextil bixjw na' len late' güeje bel da' bega'an.

### **Pedron' gwne' Jesúsén' naque' bene' gwseła' Dios**

(Mt. 16:13-19; Mr. 8:27-29)

<sup>18</sup> Na' gozac yeto, bene' ca' zjanaque' Jesúsén' txen zjanite' len le' lchojiže, na' Jesúsén' chol güiže' Diosen'. Nach gože' legaque':

—¿Bi chesena bene'? ¿Non' naca' neda'?

<sup>19</sup> Na' gose'e le':

—Bale' chesene' naco' da' Juan ben' bzoe' bene' nis. Na' yebale' chesene' naco' Elías ben' be' xtiža' Diosen' cani'. Na' yebale' chesene' naco' yeto bene' be' xtiža' Diosen' cani' ben' ba beban ladjo bene' guat ca'.

<sup>20</sup> Nach gože' legaque':

—¿Chixe le'e? ¿No žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

### Jesúsen' gwdixjue'ede' gate'

(Mt. 16:20-28; Mr. 8:30 - 9:1)

<sup>21</sup> Nach Jesúsen' gože' legaque' nono yese'e naque' ben' gwlej Diosen' cont yedenabi'e. <sup>22</sup> Na' gože' legaque':

—Da' zan da' saca'zi'a, neda' naca' ben' gwsela' Dios golja' benach. Na' bene' gole blao ca' chesenabia' nación chechon' na' b<sub>x</sub>oz gwnabia' ca', na' bene' ca' chososed chosolo'e ley dan' bzoj da' Moisés, bi yesele'ede' neda' güen dan' bi gosejle'e chia', na' yesote'nda', perw yeyon ža yebana' ladjo bene' guat ca'.

<sup>23</sup> Nach gože' yogo' bene' ca' zjanaque' le' txen:

—Note'tez bene' še chaclaže' gaque' neda' txen, cheyala' cuejyichj cuine' yogo' ža, la'czla' saca'zi'e, na' gone' can' nia' neda'. <sup>24</sup> Note'tez bene' chacde' gone' cont bi saca'zi'e o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda', ba de yela' mban che' toli tocanē. <sup>25</sup> ¿Bixe zejenna' to bene' nabi'e doxen yežlion' še cuiaye'e na' bi gata' yela' mban che' toli tocanē? <sup>26</sup> Na' note'tez bene' še cheto'ede' par ye'e lježe' chejnilaže' neda' na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' benach. Yeto'eda' che' cate' yida' da' yoble nsa'a yela' zaca' juisyw chia' na' yela' zaca' juisyw che Xa' Diosen' na' che ben' zjanac angl che'. <sup>27</sup> Da' li žia' le'e, balle nita'le nga na'a bina' gatle cate' žin ža le'ele gwlo'e Diosen' yela' gwnabia' chen'.

### Jesúsen' goque' ca to be'ni'

(Mt. 17:1-8; Mr. 9:2-8)

<sup>28</sup> Nag goc to xman gwna Jesúsen' ca', gweje' to lo ya'a jel güiže' Diosen' na' gwche'e Pedro len Juan len Jacobo. <sup>29</sup> Na' šlac choj güiže' Diosen' goc cho'alagüen' ca da' bža'. Na' xalanen' beyaquen šiš xila' na' goctiten. <sup>30</sup> Na' lo hora' besežin chop bene' gan' zoa Jesúsen', toe' da' Moisés na' yetoe' da' Elías bosošaljlene' le'. <sup>31</sup> Goso'e diža' gosene' ba zoa gat Jesúsa' Jerusalén. Na' be'ni' che Diosen' gwyechjen bsenin' legaque'. <sup>32</sup> Na' Pedron' len bene' ca' yechope leca gosac ša tase' perw bi gosetase' na' besele'ede' Jesúsen' chactit cho'alagüen' na' zeche' choe'lene' da' Moisésen' len da' Elíasen' diža'. <sup>33</sup> Na' cate' ba cheza' da' Moisésen' len da' Elíasen', Pedroa' gože' Jesúsen':

—iMaestrw, leca güenna' zoacho nga! Gonto' šone ranšw, to chio', to che Moisés, na' yeto che Elías.

Con gwne' ca' sin ca bene' xbab. <sup>34</sup> Ne' choe'te Pedron' diža' cate' to bejw gwyechjen legaque' na' besežebe' lagüe dan' goc ca'. <sup>35</sup> Na' lo' bejon' gosende' gwne Diosen', gwne':

—Benga Xi'ina' ben chacda'. Le gwzenag che'.

<sup>36</sup> Na' cate' beyož gwna Diosen' ca', besele'ede' yetoze Jesúsén'. Na' ca' beyoža' bibi diža' gosoe'lene' bene' ca' yezica'chle can' nac dan' ba gosende' na' dan' ba besele'ede'. Con gosenita'teze' šižize.

### Beyon Jesúsén' to bi' gwyo'o gwyaz da' xigüe'

(Mt. 17:14-21; Mr. 9:14-29)

<sup>37</sup> Na' beteyo cate' ba besyeyetje' ya'ana' bene' zan jasešague' legaque' gan' nite'na'. <sup>38</sup> Na' toe' gwne' zižje, gože' Jesúsén':

—Maestrw, chata'yoeda' le' gaclenšco' xi'ina' nga. Nacbe' xi'ina' tliša'.

<sup>39</sup> Chniz da' xigüen' lebe' na' la' chgosya'aten lebe', chonen cont chazbe' šon na' cont chžia bžina' cho'abe' na' chonen lebe' zi', na' cane chsanen lebe'. <sup>40</sup> Ba gota'yoeda' bene' ca' zjanaque' le' txen cont yesyebeje' da' xigüen' yo'o nyazbe', perw bitw gosezaque'de'.

<sup>41</sup> Nach Jesúsén' gože' bene' ca' že' na':

—iLe'e bene' bi chejnilaže', chonchguale clele! ¿Šna chyažjen soalena' le'e cont šejnilaže'le? ¿Batca' zelao na'lagua' le'e?

Nach gože' xa bidao'na':

—Ben bidao' chion' nile.

<sup>42</sup> Na' šlac zjasane'be' lao Jesúsén', da' xigüen' benen cont gwyazbe' šon, na' bchix btole' lebe' lo yo. Na' Jesúsén' gwdile' da' xigüen' cont bechojen lo' yichjlažda'obe'. Nach beyaquebe'. Gwdena' beyone'be' lo na' xabe'. <sup>43</sup> Na' yogo' ben' že'na' besyebande' cate' besele'ede' yela' guac che Diosen'.

### Da' yoble Jesúsén' gwdixjue'ede' gate'

(Mt. 17:22-23; Mr. 9:30-32)

Na' besyebande' che yogo'lol dan' chon Jesúsén', na' šlac nite' ca', Jesúsén' gože' bene' ca' zjanaque' le' txen:

<sup>44</sup> —Le gon cont diža' nga šo'on yichjlažda'ole, na' bi ganlaže'len. Neda' gaca' lo na' ben' chesegue'enda', neda' naca' ben' gwsela' Diosen' golja' benach.

<sup>45</sup> Perw legaque' bitw gosejni'ide' diža' dan' be' Jesúsén', le naquen ca to da' ngaše' len legaque'. Na' besežebe' yesenabde'ne' bi zejen dan' gože' legaquen'.

**Gosacyože' noe' nacch blao***(Mt. 18:1-5; Mr. 9:33-37)*

<sup>46</sup> Na' bene' ca' zjanaque' Jesúsén' txen gosacyože' noe' nacch blao.

<sup>47</sup> Jesúsén' gocbe'ede' xbab dan' chesonen', na' be<sub>xue</sub>' to bidao' na' bzeche'be' cuite'na' <sup>48</sup> na' gože' legaque':

—Note'teze bene' chone' güen len to bidao' ca bi' nga ne<sub>che</sub>' da' chejnilaže' neda', choncze' güen len neda'. Na' note'teze chon güen len neda' choncze' güen len Dios ben' gwse<sub>la</sub>' neda'. Na' note'tez le'e cate' chon<sub>le</sub>' xbab che cuin<sub>le</sub>' bibi zaca'tecle, canan' ba nacle bene' blao.

**Bene' bi chon contr chio' txenczen' chone' len chio'***(Mr. 9:38-40)*

<sup>49</sup> Nach Juanna' gože'ne':

—Maestw, bežagto' to bene' cho'e lao' na' chebeje' da' xigüe' da' yo'o nyaz bene'. Na' bžonto' gone' ca', le bi chone' chio' txen.

<sup>50</sup> Nach Jesúsén' gože'ne':

—Bitw gwžon<sub>le</sub>' gone' ca', le še to bene' bi chone' contr chio', txenczen' chone' len chio'.

**Jesúsén' gwdile' Jacobo len Juan**

<sup>51</sup> Na' lagüe' ba zoa bagwze yezi' yeca'a Diosen' le', bechoglaže' šeje' Jerusalén. <sup>52</sup> Na' gwse<sub>le</sub>' to chope bene' gosebialao lagüe'na'. Na' ja'aque' to yež gan' mbane distritw Samaria cont šjasesin<sub>i</sub>'e gan' soa Jesúsén' len bene' ca' zjanaque' le' txen. <sup>53</sup> Perw bene' Samaria ca' bi bosolebe' Jesúsén' len bene' ca' nžague', le gosacbe'ede' zja'aque' Jerusalén. <sup>54</sup> Na' chope bene' ca' zjanaque' Jesúsén' txen, Jacobon' len Juanna', cate' besele'ede' can' goson bene' Samaria ca', nach gosen<sub>abde</sub>' Jesúsén':

—Maestw, ¿che'ndo' gonto' can' ben da' Elías ben' be' xtiža' Diosen' cani', nabeto' Diosen' se<sub>le</sub>' yi' gwzeyen bene' qui?

<sup>55</sup> Nach Jesúsén' gwyechje' gwdile' legaque' gwne':

—Le'e bitw nezele non' chnabia' yichjlažda'ole. <sup>56</sup> Neda' bitw za'a cont gwžia<sub>ya</sub>'a ben<sub>ach</sub>, san za'a cont gwnežjua'ne' yela' mban toli tocan<sub>e</sub>, neda' naca' ben' gwse<sub>la</sub>' Diosen' golja' ben<sub>ach</sub>.

Nach ja'aque' yež yoble.

**Can' gož Jesúsén' bene' ca' gosac<sub>laže</sub>' yesaque' le' txen***(Mt. 8:19-22)*

<sup>57</sup> Šlac zja'aque' na', to bene' gože' le':

—Sa'lena' le' gate'teze šejo'.

<sup>58</sup> Nach gož Jesúsén' le':



—Nita' xišna' beza' na' lecz chesyežin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwsela' Diosen' golja' benach.

<sup>59</sup> Nach Jesúsen' gože' yeto bene':

—Yo'o len neda'.

Perw bena' gože' le':

—Xana', za' got xa'. Benšca latje zgua'tec šjaycuaša'ne'.

<sup>60</sup> Na' gož Jesúsen' le':

—Bene' ca' zjanac yichjlažda'ogüe' ca che bene' guat, legaque' guaccze yosocuaše' yezica'chle bene' guat. Perw le', jatixjue'e bene' Diosa' nabi'e yichjlaždao' bene' yosozenague' che'.

<sup>61</sup> Nach lecze yetoe' gože' Jesúsen':

—Sa'lena' le' Xana', perw zgua'tec šjayzenda' xaxna'a len diaža chia'.

<sup>62</sup> Jesúsen' gože' le':

—Bene' ba gwzolao nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to bene' chne'e coscože'le šlac chgua'ane' go'ñ.

### Jesúsen' gwsele' gayonši bene' šjasedixjue'ede' xtiže'

**10** <sup>1</sup> Na' gwdechle Xancho Jesúsen' gwleje' yegayonši bene' na' bene' mandadw yesebialagüe' šja'ac chope güeje' to to yež ga za' šej le'. <sup>2</sup> Na' cate' za' yesa'aque' gože' legaque':

—Chyažje bene' zan yeseyixjue'ede' xtiža' Diosen', perw to chopga bene' nita' yeseyixjue'eden'. Na' bene' yosozenag che Diosen' zjazaca'lebe' ca to coseš xen da' chyažje yedobe. Da'nan' le nabe Xancho Diosen' sela'che' bene' yesaclene' chio' yotobcho coseš chen'. <sup>3</sup> Le šja'ac, le neda' chsela' le'e šjatixjue'ele xtižen' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. <sup>4</sup> Bitw gua'le bzod, ne mechw, ne yel, na' bi šele guaple bene' tiox bene' yežagle chanez. <sup>5</sup> Note'tez liž šo'le zgua'tec nale: “Chnablaže'šca' soa cuezle binlo len xbab dan' yo'o lo' yichjlažda'ole, le'e nita'le nga.” <sup>6</sup> Na' še zoa to bene' chaclaže' soa cueze' binlo len yichjlažda'ogüe'na', nach gac can' gwnablaže'le cont soa cueze' binlo; perw še nono zoa bene' chaclaže' soa cueze' binlo len yichjlažda'ogüe', bi gac dan' ba gwnablaže'len'. <sup>7</sup> Na' lo' yo'o na'teze yega'anle. Bitw tale to to yo'o. Le ye'ej le gagw bite'teze da' chesone' ye'ej gagwle. Ca to bene' güen žin cheyala' si' laxjue', lecz ca' le'e zaca'le yesone' da' ye'ej gagwle. <sup>8</sup> Na' cate' žinle to yež ga chesonxene' le'e, le ye'ej le gagwteze da' yesone' le'e. <sup>9</sup> Le yeyon bene' güe' bene' nita' yež gan' žinle, na' le' ye'e: “Ba bžin ža gwzenagle che Diosen' cont nabi'e yichjlažda'ole.” <sup>10</sup> Perw na' cate' žinle to yež ga bi yosolebe' le'e, le šja'ac la cay na' le ye'e: <sup>11</sup> “Bište che lažle nga da' žia ni'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont nabi'e

yichjlažda'olen'." <sup>12</sup> Da' mal xen goson bene' ciuda Sodoma cani', perw žia' le'e, žan' gac juisyw bene' ca' bi bosolebe' le'e ližen', yesa'le'chde' clel ca bene' Sodomán'.

### **Bene' ca' bi chosozenag xtiža' Jesúsén'**

(Mt. 11:20-24)

<sup>13</sup> Nach gozna Jesúsén':

—iNyaše'chguaze gac che le'e bene' Corazín! iNyaše'chguaze gac che le'e bene' Betsaida! Bene' ca' nita' Tiro na' Sidón ba' besyetingde' xtola'gaque' šaca' blo'egacda'ne' yela' guac chia' ca da' ba blo'eda' le'e. Na' bosoše'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogüen'. <sup>14</sup> Saca'zi'chle clel ca bene' že' Tiro na' Sidón cate' žin ža gac juisyw. <sup>15</sup> Le'e nita'le yež Capernaum chonle xbab šeca Diosen' gonchgüe' le'e yela' bala'an. Bi gone' le'e yela' bala'an san gone' le'e castigw toli tocanē dan' bi chejle'le chia'.

<sup>16</sup> Nach Jesúsén' goze'e bene' gayonši ca':

—Bene' gwzenag xtiža'len' lecze gwzenague' xtiža'na', na' bene' goncze yichjlagüe' bi gwzenague' xtiža'len', lecze bi gwzenague' chia' neda'. Na' bene' goncze yichjlagüe' bi gwzenague' xtiža'na', lecze bi gwzenague' xtiža' Diosen' ben' gwsela' neda'.

### **Besyěžin bene' gayonši ca'**

<sup>17</sup> Bene' gayonši ca' cate' beyož jasedixjue'ede' xtiža' Jesúsén', besyěžine' gan' zoen' na' besyebchgüede'. Nach gose'e Jesúsén':

—Xanto', chebechgüeto' can' goquen', le da' xigüe' ca' chosozenaguen cheto' cate' chonto' mandadw yesyechojen lo' yichjlaždao' bene' choe'to' lao'.

<sup>18</sup> Na' gože' legaque':

—Ble'eda' bedao'nez gwnit yela' gwnabia' che Satanásen' dan' chnabia' da' xigüe' ca'. <sup>19</sup> Ba beña' le'e yela' guac cont gwlej gwšošjle no bel' znia na' no bexjoni' na' cont soele Satanásen' bi gonen le'e gan. Na' bibi de da' gonen le'e zi'. <sup>20</sup> Perw bi yebele neche da' xigüen' chosozenaguen chele, san le yebe da' ba bzoj Diosen' lale le'e libr gan' nyoj la yogo'lol' xi'ine' ca'.

### **Bebechgüe Jesúsén'**

(Mt. 11:25-27; 13:16-17)

<sup>21</sup> Za' beyožte gwna Jesúsén' ca' nach ben Spiritw che Diosen' cont bebechgüede' na' bol' güiže' Diosen', gwne':

—Xa', le' chnabi'o bene' ca' že' yaba na' yežlion'. Na' chona' yela' choxc'clen chio' ba bzejni'ido' bal' bene'. Ba bzejni'ido' bene' ca' gosacbe'ede' cheseyažjde' no gwsed gwlo'e legaque'. Na' bitw bzejni'ido'

bene' ca' cheson xbab zjanaque' bene' sina' na' bene' zjanejni'i. Beno' ca' Xa', le can' gwyazlažo'.

<sup>22</sup> Nach gože' bene' ca' že'na':

—Xan' ba bene' lo na' chona' cont chombia' bene' le'. Le' nombia'yane' neda', na' neda' nombia'yana' le'. Na' bene' ca' ba gwleja' ba zjanombi'e Xan'. Na' nono nochle zjanombia' Xa' ne neda'.

<sup>23</sup> Na' gwyečhj Jesúsén' gwne'e bene' ca' zjanaque' le' txen na' gože' legaque':

—Mbachgua zoale chle'ele neda' na' chle'etele da' ca' chona'. <sup>24</sup> Na' chnia' le'e zan bene' ca' goso'e xtiža' Diosén' cani' len bene' zan rey gosaclačže' yesele'ede' dan' chle'ele na'a, perw bitw goła' yesele'eden', na' gosaclačže' yesende' dan' chenelen', perw bitw goła' yesenden'.

### Jempl che to bene' güen, bene' Samaria

<sup>25</sup> Na' gwzoža' to bene' nsedchgüe' ley dan' bzoj da' Moisés, goclačže' cueje' Jesúsén' diža' da' gwčhine' contr le' na' gože'ne':

—Maestrw, ¿bi da' cheyała' gona' cont gata' yela' mban chia' toli tocane?

<sup>26</sup> Na' gož Jesúsén' le':

—¿Bi nyoj le'e leyna'? ¿Nac žan?

<sup>27</sup> Na' ben' chejni'ichgüe' leyna' boži'e xtiža' Jesúsén', gože' le':

—Ley che Diosa' žan: “Cheyała' gaquecho Xancho Diosén' con ca zelao chejni'icho, do yichj do laže'cho, do fuers valor checho, na' gaque lježcho ca chaque cuincho.”

<sup>28</sup> Nach gož Jesúsén' le':

—Da' licze can' ba gwnao'na'. Can' cheyała' gono' cont bano' toli tocane.

<sup>29</sup> Na' bena' goclačže' gwlo'ede' choncze' can' ža leyna', na' gože' Jesúsén':

—¿Non' nac bene' lježa' ben' cheyała' gacda'?

<sup>30</sup> Na' Jesúsén' gože' le':

—To bene' beza' Jerusalén par yežine' yež Jericó, jasyexen bene' gwban le'. Na' goseyine' xalane' na' gosot goseyine' le'. Nach besyeya'aque' bosocua'ane' le' cacze to bene' guat. <sup>31</sup> Na' to bxož che bene' Israel ca' gwdie' lo neza', na' cate' ble'ede' bena' dena', nach gwcuase' to šla'ale neza' na' con gwdeze'. <sup>32</sup> Lecz ca' ben to diaža che da' bene' Leví ca'. (Xi'in diaža che da' Leví yo'o lo na'gaque' chesone' mandadw lo yodao' blao.) Bena' zeje' tnez na' cate' ble'ede' ben' dena', na' gwcuase' to šla'ale neza' na' con gwdeze'. <sup>33</sup> Nach to bene' Samaria ngüe'e neza' nlague' xpurrue' na' bžine' gan' de bena', perw na' le' cate' ble'ede' ben' beyaše'laže'. <sup>34</sup> Na' gwbigue' gan' de' na' bene' le' rmed, bšone' set len vino lao güe' che'na' na' bchejen' lache'. Na' božie' le' cože' xpurrue' na' beche'e le' ga zoa to mesón ga gwne'e le'. <sup>35</sup> Na' beteyo cate'

beza' bene' Samaria, gwleje' mechw da' zaca' ca chop ža žin na' bnežjuen' xan mesónna' ca laxjue', na' gože' le': "Gwna' bengna na' še žan bichle da' gono' gastw na' chixjuan' cate' zeza'a."

<sup>36</sup> Beyož be' Jesúsen' diža' can' goc che ben' jasyexen bene' gwban ca', nach gože' bena' chsed chlo'e leyna':

—¿Nac chono' xbab? ¿No bene' ca' šone godde'ne' ca' bene' lježe'?

<sup>37</sup> Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyexen gwban ca'.

Nach gož Jesúsen' le':

—Lecze ca' cheyała' gono' le', yeyaše' yeži'ilaže'do' yogo'lol bene'.

### Jesúsa' jañe'e Marta na' María

<sup>38</sup> Na' gosego'oche' nez na' besyežine' to yež ga zoa to no'ole lie' Marta, na' Jesúsen' gwyeje' liže'na'. <sup>39</sup> Na' zoa to bile' le' María. Na' Marían' gwchi'e cuit Jesúsen' bzenague' xtiže'na'. <sup>40</sup> Perw na' Martan' belalchgüede' bsini'e da' yesagüe'. Na' gwyeje' lao Jesúsen' na' gože' le':

—Xana', ¿bi chacdo' median can' bcua'an bene' bilan' neda' toza' len mandadua'? Benšca mandadw gaclene' neda'.

<sup>41</sup> Xancho Jesúsen' gože' le':

—Marta, chi'chgua yichjo' mandadua' na' chacžejlažo' dan' nyanchguan. <sup>42</sup> María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyała' gonle.

### Jesúsen' blo'ede' can' yosoł güiže' Diosen'

(Mt. 6:9-15; 7:7-11)

**11** <sup>1</sup> Na' gwzoa Jesúsa' to latje choł güiže' Diosen'. Cate' beyož bol güiže'ne' to bene' ca' zjanaque' le' txen gože' le':

—Xanto', bzejni'i neto' nac cheyała' yoł güižto' Diosen', can' bzejni'i da' Juanna' bene' ca' gosaque' txen len le'.

<sup>2</sup> Na' Jesúsen' gože' le'gaque':

—Cate' yoł güižle Diosen', quinga nale:

Xato' bene' zoa yaba,

chnabto' yogo'lol bene' yesonxene' le'.

Zelaže'to' nabi'o yichjlaždao' yogo' neto' benach.

Gacšca can' chazlažo' yežlio nga can' chac yabana'.

<sup>3</sup> Ca nac dan' che'ej chagwto' tža tža, benšca cheto' na'a.

<sup>4</sup> Na' bezi'xenšca cheto', le lencze neto' chezi'xento' che ljež benachto' bite'tez da' chesonde' neto'.

Na' bitw go'o latje soa da' gwžigan' neto' gonto' da' mal, san bcuase bcue'ejšca neto' len da' mala'.

<sup>5</sup> Nach gož Jesúsen' le'gaque':

—Le gon xbab še šejle liž bene' migw chele do chel na' ye'lnē': "Migw chia', beñšca neda' šone yetextil. <sup>6</sup> Ba bla' to bene' migw chia' bene' za' zito', na' bibi de chia' da' gua'ane' gagüe'." <sup>7</sup> Na' chixe še migw chelen' yo'e lo' yo'ote yož'i'e xtiža'len': "Bitw gondo' neda' zed, le ba nyeyjw cho'a yo'o na' ba deto' chtasto' len bi' cheto' ca'. Bi gac chasa' gona' dan' chyažjdo'." <sup>8</sup> Chnia' le'e, la'czla' naque' migw chele, bitw ye'nde' chase' gone' dan' chyažjele, perw še gata'yoelne' sša na' chasšaze' gone' bite'tez da' chyažjele. <sup>9</sup> Na' chnia' le'e, še žan bi da' chyažjecho, chnabchon. Še žan to da' chaclaže'cho želecho, chyiljwchon. Še žan chaclaže'cho saljw bene' cho'a yo'o che', na' necho cho'a yo'on cont saljue'. Na' ca'cze cheyała' ye'le Diosen' cate' bi da' chyažjele o bi da' chaclaže'le gone'. <sup>10</sup> Na' note'tezle še bi da' nabelene', gonczen'. Na' še bi dan' che'nele gwzejni'ide' le'e, gwzejni'iczen'. Na' note'tezle še žan chaclaže'le gac to da' gac, yoł güižle Diosen' can' chon to bene' chnie' cho'a yo'o, nach Diosen' gone' cont gacczen.

<sup>11</sup> Na' le'e nacle xa bidao', še xi'inle nabebe' le'e yetextil, ¿gwnežjwlebe' to yej? Na' še nabebe' le'e yid beł gagwbe' ¿gwnežjwlebe' to be xigüe'? <sup>12</sup> Na' še nabebe' le'e to žit gagwbe' ¿gwnežjwlebe' to be xjoni'? Cabi gonle ca'. <sup>13</sup> La' nacle bene' mal, nezczzele gwnežjo xi'inle to da' güen. Nacchxe güen gon Xacho Diosen' ben' zoa yaba gwnežjue' Spiritw chen' soan lo' yichjlaždao' bene' chnab len.

### Gosene' Jesúsen' bebeje' da' xigüe' len yela' guac che Beelzebú

(Mt. 12:22-30; Mr. 3:19-27)

<sup>14</sup> Gwzoa to bene' gwyo'o gwyaz da' xigüe' yichjlažda'ogüe' na' benen cont bi goc nie'. Na' Jesúsen' bebeje' da' xigüe' lo' yichjlažda'ogüe'na'. Na' cate' bechoj da' xigüen', na' goc benie'. Na' bene' ca' že'na' besyebanchgüede'. <sup>15</sup> Perw bale' gosene':

—Beelzebú dan' chnabia' da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' bene'.

<sup>16</sup> Na' yebale' cont gosagüe' xya che' gosenabde'ne' gone' to yela' guac da' yesele'ede' le'e yaban' cont yeseñezde' še da' licze Diosa' gwsele' le'.

<sup>17</sup> Perw Jesúsen' gocbe'ede' xbab dan' gosone', na' gože' legaque':

—Ša to gobiern choje' chop šon cuen na' yeyoža' yesedile' legacze', gobiernna' bi sibi'e. Na' še bene' to lo' yo'o yesechoje' chople na' yesedile' legacze', gague sša yesenite' txen. <sup>18</sup> Na' še Satanásen' dan' chnabia' da' xigüen' len da' xigüe' chen ca' yesechojen chople na' yesedilen, lecze bi sibian', san na' yeyož yedon. Le'e chnale Beelzebún' dan' chnabia' da' xigüe' ca' chaclenen neda' cont chebeja' da' xigüe' zjajo'o zjanyaz yichjlaždao' bene'. <sup>19</sup> Šaca' naquen can' žalen', lecze zejen dan' chnabia' da' xigüe' ca' chaclenen bene' lježle ca' chesybeje' da' xigüe' zjajo'o zjanyaz yichjlaždao' bene'. Bene' lježle ca' yese'e le'e clelen' žale. <sup>20</sup> Neda'

chebeja' da' xigüe' len yela' guac che Dios, na' dan' chona' ca' chlo'en ba bžin ža Diosen' nabi'e yichjlaždao' bene' yosozenag che'.

<sup>21</sup> 'Satanásen' naquen ca to bene' gual, na' neda' naccha' bene' gualch. Na' nezele cate' to bene' gual chape' ližen' len spada, bibi gac che da' de che'. <sup>22</sup> Perw cate' žin to bene' gualch ca le' na' tillene' le', nach ben' nac bene' gualch gon gan. Na' que'e spada che ben' da'na' zoe' lez gaclen le' na' ca'atie' bichle da' de che' na' chisen' len bene' migw che' ca'.

<sup>23</sup> 'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

**Da' xigüe'na' yeyo'on da' yoble lo' yichjlaždao' bene'**

(Mt. 12:43-45)

<sup>24</sup> 'Na' še to da' xigüe' da' gwyo'o gwyaz lo' yichjlaždao' bene' yechojen, nach lažen nile na'le yeyiljon ga soan mbalaz. Na' še bibi latje želen, nach nan: "Da' yoblecze šjajo'a lo' yichjlaždao' ben' gan' ba gwyo'a." <sup>25</sup> Nach yeyejen da' yoble gan' zoa ben'. Cate' le'en bač cheyone' güen, na' ba zoache' binlo, <sup>26</sup> nach šjaytoben yegaže da' xigüe' ca' da' zjanacch malech ca len, na' txen yeso'on lo' yichjlažda'ogüe'na'. Na' še bač goc ca', gacch mal che bena' clel ca dan' ba goc che' da' nechw.

**Mbalaz nita' bene' ca' chosozenag xtiža' Diosen'**

<sup>27</sup> Šlac be' Jesúsén' diža' quinga, gwzoa to no'ole gachol bene' ca' že' gan' bsed blo'ede', na' no'ola' gwne' zižje, gože'ne':

—Mbalaz zoa no'ola' gwxa le' na' bguaže' le'.

<sup>28</sup> Perw na' Jesúsén' gože'ne':

—Nacchxe mbalaz nita' bene' ca' chosozenag xtiža' Diosen' na' chesone' can' žanna'.

**Bene' bi chosozenag che Diosen' chesenabe' gon Jesúsén' to yela' guac**

(Mt. 12:38-42; Mr. 8:12)

<sup>29</sup> Na' bene' zan gosebigue' gosehjde' Jesúsén', nach Jesúsén' gwne':  
—Le'e zoale na'a nacchgual bene' laždao' xi'a. Chnable gona' yeto yela' guac da' le'ele cont nezele še Diosa' gwsele' neda', perw bi gona' ca dan' chnablana', le ba ble'ele da' ca' chona'. Lete gac chia' can' goc che da' Jonás ben' be' xtiža' Diosen' cani'. <sup>30</sup> Na' ca dan' goc che Jonásén' blo'en bene' Níneve ca' Diosen' gwsele' le', ca'cze dan' gac chia' gwlo'en le'e zoale na'a Diosen' gwsele' neda' golja' benach. <sup>31</sup> Cate' žin ža gon Diosen' castigw che yogo'lol bene' cheson da' mal, da' no'olen' gwnabi'e bene' Seba ca' yedecuiše' le'e mbanle na'a. Le' gwze'e gan' nac zito'chgua na' bide' nga cont bedezenague' diža' sina' dan' be' da' rey Salomón len le', na' neda' zoa' nga naccha' bene' blaoch ca da' Salomón na' bitw

chzenagle chia'. <sup>32</sup> Na' cate' žin ža gon Diosen' castigw che yogo'lol bene' cheson da' mal, lecze žana' yesyeban bene' Nínive ca' na' yosocuiše' le'e nita'le ža na'aža. Le legaque' besyetingde' xto'la'gaque' cate' da' Jonásen' gwduxjue'ede'ne' can' gwna Diosen'. Na' neda' zoa' nga naccha' bene' blaoch ca da' Jonása' na' bi chzenagle chia'.

**Dan' bsed blo'e Jesúsen' naquen ca to yi'**

(Mt. 5:15; 6:22-23)

<sup>33</sup> 'Notno gwguala' to yi' na' gw dosen' caj, na' neca gwcušaen' ga yoble ga nono le'e len, san chde'en le'e ze'e cont gwsenin' len yogo'lol bene' yeso'o lo' yo'ona'. <sup>34</sup> Žia yejlaocho cont le'echo. Con še bibi chaquen chle'eczecho binlo. Perw še ncholcho, bi chle'echo. Ca'czen' naquen len yichjlažda'ochon'. Še naccho bene' laždao' güen, yo'o be'ni' che Diosen' lo' yichjlažda'ochon'. Perw še naccho bene' mal, chol nac yichjlažda'ochon'. <sup>35</sup> Da'nán' le gon cont gacle bene' laždao' güen, na' šo' be'ni' che Diosen' yichjlažda'ole. <sup>36</sup> Še nyeni' yichjlažda'olen' na' bibi da' mal yo'on, gwseni'czen xnezle can' chseni' to yi' ga nac chol.

**Jesúsen' gože' bene' fariseo ca' zjanape' dola' na' len bene' ca' chososed chosolo'e ley**

(Mt. 23:1-36; Mr. 12:38-40; Lc. 20:45-47)

<sup>37</sup> Cate' beyož be' Jesúsen' diža' quinga, to bene' fariseo gwche'e le' liže' cont yesagüe'. Na' gwyo'o Jesúsen' liž bene' fariseon' na' gwchi'e cho'a mesen'. <sup>38</sup> Na' bene' fariseon' bebande' ble'ede' bitw bona' Jesúsen' cate' za' gagüe' can' cheson legaque' chesacde' chebe Diosen' legaque' dan' chesone' ca'. <sup>39</sup> Na' Xancho Jesúsen' gože' le':

—Le'e bene' fariseo nacle ca xiga' ye'en da' chchin bene' na' chyibe' cožen' binlo perw bi chyibe' do lo'en. Chonle cont chesaque bene' nacle bene' güen, perw chebele chca'ale bi da' de che bene' na' nacle bene' mal juisyw. <sup>40</sup> Bicze bi chejni'ile. Chi' yichjle gacle xilaže' len cuerp chelen'. Lecz ca' cheyala' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'. <sup>41</sup> Le yeyaše' bene' na' le gwnežjo bi da' cheseyažjde'. Še gonle ca', nacia' nacle bene' laždao' xilaže'.

<sup>42</sup> 'iNyaše'chguaze gac che le'e bene' fariseo! La'czla' chnežjwle Diosen' to part lao ši part che yixe'güej, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquele Diosen'. Da' nac da' žialao gonle, gonle da' nac güen na' gaquele Diosen'. Perw bi cuejyichjle gwnežjwle da' ca' chnežjwle Diosen'.

<sup>43</sup> 'iNyaše'chguaze gac che le'e bene' fariseo! Chzelaže'le cue'le lo' yodao' txen len bene' blao ca', na' cate' chejle do gan' chac ya'a chaclaže'le yesonxen bene' le'e.

<sup>44</sup> 'iNyaše'chguaze gac che le'e chsed chlo'ele da' bzoj da' Moisés na' len le'e bene' fariseo! Chonle cont nacbia' gan' xoa ba che bene' guaten', le ley chechon' žan zjanaquen zban na' bi cheyala' gwlejchon. Perw le'e nacle ca ba da' bi zjanacbia'. Chosozenag bene' chele na' bi chesacbe'ede' nacle bene' laždao' zban.

<sup>45</sup> To bene' chsed chlo'e ley boži'e xtiža' Jesúsén', gože'ne':

—Maestrw, lagüe da' žo' da' quinga, chaqueton' zi'.

<sup>46</sup> Na' gož Jesúsén' legaque':

—Lecze ca' le'e chsed chlo'ele ley da' bzoj da' Moisés, inyaše'chguaze gac chele! Da' žale da' zan da' cheyala' yeson bene', chonle leyna' ca to yoa' da' nocze no do'e, to yoa' da' chaclaže'le yesoa' bene' yoble, perw le'e ne late'ze bi chaclaže'le gua'len.

<sup>47-48</sup> 'iNyaše'chguaze gac che le'e chonšagüe'le cho'a ba che da' bene' ca' gosoe' xtiža' Diosén' cani'! Chacle toze len da' xozxta'ole ca' ben' gosote' legaque'. Na' dan' chonle ca', zejen chazlaže'le dan' gosote' legaquen'.

<sup>49</sup> 'Da'nan' Diosén' lao yela' sina' che' gwne' sele' bene' yesoe'lene' le'e xtižen' na' sele' postlw che' ca' len le'e. Na' gwne' gotle bale' na' gwchi gwsaca'le yebale'. <sup>50</sup> Na' da' li ba chonle can' gwnen'. Da'nan' si'le castigw che yela' got che yogo' bene' ca' gosoe' xtižen' gwzolaon caten' gwxcete yežlion' chžinten ža na'aža. <sup>51</sup> Zan bene' gosot bene' yoble legaque' gwzolaozen len da' Abel ben' beyot da' biše' Caín le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chyo'o yodao' gan' chesote' beyixe' cont chesonxene' Diosén'. Na' le'e mbanle na'a si'le castigw che yela' got che yogo' bene' ca'.

<sup>52</sup> 'iNyaše'chguaze nac le'e chsed chlo'ele ley che Diosén'! Bitw chzejni'ile bene' leyna' to licha can' naquen, neca chzenagle chen. Na' bene' chesacbaže' yosozenaguen', neca choe'le latje yosozenaguen'.

<sup>53</sup> Na' cate' beyož be' Jesúsén' diža' quinga, nach bene' fariseo ca' na' bene' ca' chososed chosolo'e ley gosacyožchgüe' len le'. Na' gosacbaže' yesebeje' le' diža' <sup>54</sup> le gosacbaže' choj dižan' cho'e da' yosode'ede' yesagüe' xya che'.

### Yela' güexoayag che bene' fariseo

**12** <sup>1</sup> Na' goc zan mil bene' besežague' gan' zoa Jesúsén', catec bene' zan besežag bosolej bosošošjte ni'a lježe'. Na' Jesúsén' zgua'tec gwzolaügüe' be'e diža' len bene' ca' zjanaque' le' txen, gože' legaque':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca levadura dan' chchixede' yetextil. Bitw gonle can' chesonen'. <sup>2</sup> Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'. <sup>3</sup> Da'nan' bite'teze da' gwnale bagaše'ze, bene' zan



yesenden'. Na' dan' ba gwnale šižize lo' yo'o chelen', yogo'ze bene' yesenezden'.

### Non' cheyała' žebcho

(Mt. 10:28-31)

<sup>4</sup> 'Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e. <sup>5</sup> San zoa ben' cheyała' žeble, cheyała' žeble Diosen', le cate' bačh beque'e yela' mban chele, lecze nape' yela' chnabia' cont yesele' le'e gabil. Da' yoble chnia' le'e, cheyała' žeble Diosen'.

<sup>6</sup> 'Nezecho byiñ dao' ca' bibi zjazaca'tecba', perw na' Diosen' ne toba' bi chanlaže'. <sup>7</sup> Na' ca' nac chio', da' leca chaque Diosen' chio' neztede' bal yiša' yichj to tocho žia. Da'nan' bitw žeble, le zaca'ch le'e clal ca' yogo' byiñ dao' ca'.

### Cheyała' ye'cho bene' nombia'czcho Jesucriston'

(Mt. 10:32-33; 12:32; 10:19-20)

<sup>8</sup> 'Na' chnia' le'e, note'tez bene' še cho'e diža' len benachen' che'ene' chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' naque' neda' txen, neda' naca' ben' gwsela' Diosen' golja' benačh. <sup>9</sup> Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' bitw naque' neda' txen.

<sup>10</sup> 'Na' note'teze bene' še ne' yela' ya' chia' neda' naca' ben' gwsela' Diosen' golja' benačh, Diosen' yezi'xene' che' še yetinjde'. Perw note'teze bene' še ne' yela' ya' che Spiritw che Diosen', gwbat yezi'xen Diosen' che'.

<sup>11</sup> 'Na' cate' yeseche'exoxje' le'e lao bene' gwnabia' che yodaon' o lao justis o še lao nochle bene' gwnabia', bi cuec yichjle nac yoži'ile xtiža'gaquen' o še nacle nale. <sup>12</sup> Lo hor na'teze gwzejni'i Spiritw che Diosen' le'e bin' cheyała' nalen'.

### Bitw cheyała' cuec yichjcho tlaoze bi da' de checho

<sup>13</sup> To bene' bchoje' ladjo bene' zan juisyw ben' zjanžag na', na' gože' Jesúsén':

—Maestw, gonšco' mandadw cont bene' bišan' gone' neda' bien che da' xaxna'to' da' cheyała' si'a.

<sup>14</sup> Na' Jesúsén' gože' le':

—Bitw naca' neda' juez chele. Bi cheyała' gua' neda' laze da' de chele.

<sup>15</sup> Nach gože' yogo'lol bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o la' bibi de checho bi da' chyažj chchinecho, gague da' can' nac yela' mban checho.

<sup>16</sup> Na' be'lene' legaque' to jempl, gwne':

—To bene' gwni'a gocchgua coseš che', <sup>17</sup> na' bene' xbab lo' yichjlažda'ogüe' gwne': “¿Nacxe gona'? Bich bi latje de ga gwžešagua' coseš chian'.” <sup>18</sup> Nach gozne': “Quinga gona', yochinja' yo'o gan' že' coseš chia' quinga na' gona' yo'o xench. Na' gwžešagua' cosešen' na' bichle da' de chia'. <sup>19</sup> Na' lagüe ba de da' yažjda' da' zan iz, bich gona' žin. Ye'ej gagwteza' con da' chaclaža' na' gona' legr.” <sup>20</sup> Perw Diosen' gože' bena': “Chono' xbab da' bibi zaca'. Na'aže' bžin hor gato', na' ĩnola lo na' gac yogo' da' de chio'?” <sup>21</sup> Can' gac che note'tez bene' še con chbec yichje' tlaoze da' de che' šlac mbane' na' bi chone' da' chazlaže' Dios.

### Diosen' chapši'e xi'ine' ca'

(Mt. 6:25-34)

<sup>22</sup> Na' gož Jesúsen' bene' ca' zjanaque' le' txen:

—Da'nan' žia' le'e, bi gacžejlaže'le bi da' gagwle šlac mbanle, na' lecz ca' bi gacžejlaže'le che xalana'le. <sup>23</sup> Zaca'ch yela' mban chelen' ca yela' guagw. Lecze ca' cuerp chelen', zaca'chen ca xalana'le. <sup>24</sup> Le gon xbab che bechj ca', bitw chesazba', bitw chesyelapba', neca zoa da'a xoa' chegacba', neca zoa ga ncu' no goš chegacba' ga že' da' yesagwba', perw na' Diosen' chguagwcze'ba'. iNacchle zaca' le'e ca be ca' zjažia xil! <sup>25</sup> Na' ne tole bi gac yoston cuinle gašje metr še con cue' yichje tonle. <sup>26</sup> Nezele bitw gac yoston cuinle, na' neca naquen da' zaca'. Da'nan' bi gacžejlaže'le che bica'chle da' chyažjele.

<sup>27</sup> Le gon xbab ca nac yej ca' da' zjaze yixe'. Chesecha'oczen, bibi žin chesonen, neca chesaljen do. Na' chnia' le'e, da' rey Salomón gocue' lache' güen juisyw, perw bitw bžinlaže' xalane'na' ca yela' xdan che yej ca'. <sup>28</sup> Diosen' none' xdan da' ca' ze yixen' la'czla' to chop žaze nitan' na' chosozeyen'. iNacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che! <sup>29</sup> Da'nan' bitw güe'laže'le cont gata' da' ye'ej da' gagwle. Bitw gacžejlaže'le chen. <sup>30</sup> Bene' ca' bi chesonxene' Diosen' con chesoe'laže' che bi da' gata' yese'ej yesagüe' na' che xalana'gaque'. Perw Xacho Diosen' nezczede' bi da' ca' chyažjele. <sup>31</sup> Cheyala' güe'laže'le gwzenagle che Diosen' cont nabi'e yichjlažda'olen', na' yogo' da' ca' chyažjele, goncze Diosen' len.

### Da' zaca'ch gata' checho yežincho yaba

(Mt. 6:19-21)

<sup>32</sup> Bitw žeble la'czla' nac to chople. Diosen' chbede' chnabi'e yichjlaždao' le'e chzenagle che' na' chaclene' le'e. <sup>33</sup> Le yeyote' da' de chele cont gata' da' gwnežjwle bene' ca' cheseyažje. Še gonle ca', Diosen' gone' le'e da' zaca'ch na' da' cbi te chen cate' yežinle yaba gan' zoe'na'. Na' bitw gac šo' bene' gwban que'en, na' neca gac šo' be dao' gwžiyai' len. <sup>34</sup> Gan' de dan' chaquele nan' zoa yichjlažda'olen'.

**Cheyała' soa cuezcho batcan' yide Criston' yeto**

<sup>35-36</sup> 'Le soa le cueze batcan' yida' yeto. Le soa can' nita' bene' chesape' liž xangaquen' šlac zeje' to yela' güešagna'. Zjanyaz xalana'gaque' na' čala' yi'. Nach cate' yežine' na' nie' cho'a yo'on, na' la' yesesaljwte' cont yeyo'e. <sup>37</sup> Mba gac che bene' ca' chesebeze' batcan' yežin xangaquen'. Še nite' chesebeze' le' caten' yežinen', nach gwsini'e da' yesagüe' na' cuine' gwnežjue' legaque' dan' yese'ej yesagüe'. <sup>38</sup> Mba gac čhegaque' še chesebeze' batcan' yežine' la'czla' yežine' do chel o do šbal. <sup>39</sup> Le gon xbab che da' nga. Šaca' neze xan yo'on baten' žin bene' gwban liže'na', le gwña'ze' cont bi güe'e latje šo' bena' liže'na' cuane' xšinlazen'. <sup>40</sup> Le soa le cueze batcan' yida' da' yoble, le cate' bi chonle xbab yida', canan' yida', neda' naca' bena' gwsela' Diosen' golja' benach.

**Mos ben' chon güen, na' mos ben' bi chon güen**

(Mt. 24:45-51)

<sup>41</sup> Pedroa' gože' Jesúsen':

—Xanto', čcho'o jempl nga par neto'ze o še par yogo'lol benach?

<sup>42</sup> Nach gož Xanchon' Pedroa':

—Naquen par note'tez bene' še chone' can' chon mos blao ben' chejni'i, ben' chon can' cheyała' gone'. Ben' chon ca', co' xane' lo ne'e ližen' cont ne'e mos ca' yezica'chle. Na' gone' da' yesagw to toe' cate' žin hor yesagüe'. <sup>43</sup> Še to bene' mos chonteze' can' ben xanen' mandadw gone', mba soe' cate' yežin xanen'. <sup>44</sup> Da' li chnia' le'e, xanen' cue'e lo na' mosen' yogo'lol da' de che'. <sup>45</sup> Perw na' še mosen' gone' xbab na' ne': "Ba gwže xanan'", na' solagüe' got čhine' mosa' yezica'chle na' ye'ej gagwxate' na' sožde', <sup>46</sup> nach xane'na' yežine' to ža senyale' le' cate' bi gacbe'ede'. Na' da' bi chon mosen' can' cheyała' gone', xane'na' got čhinchgüe' le' na' gone' cont si'e castigw txen len yezica'chle bene' bi cheson can' cheyała' yesone'.

<sup>47</sup> 'Na' mos ben' nac bene' güedenag, la'czla' ba nezde' can' che'ne xanen' gone', bi chone' ca'. Bi zoe' chbeze' batcan' yežin xanen', na' da'nan' xanen' got čhinchgüe'ne'. <sup>48</sup> Na' bene' bi nezde' bin' non xanen' mandadw gone' na' da'nan' chone' da' zaca' čhine' le', na' xanen' bi čhinteque' le' zi'. Note'teze bene' zjanye'chgua xbab, chesego'o bene' lo na'gaque' da' zan da' yesone', na' chonen byen yesone' yogo' da' ca' zjajo'o lo na'gaque' yesone'.

**Yesedił bene' neče da' bid Jesúsen'**

(Mt. 10:34-36)

<sup>49</sup> Nach gwna Jesúsen':

—Dan' zedeyena' yežlio nga naquen ca to yi' da' cuec bene'. Na' yebeda' šaca' ba chi' yi'na'. <sup>50</sup> Za'a cont saca'zi'a na' gata'. Na' chžaglagua'

šlac chbeza' žin ža yeyož gaquen. <sup>51</sup> ¿Chonle xbab bene' že' yežlio yesezoa yesebeze' binlo len lježgaque' na'a dan' ba bidan'? Chnia' le'e, bi yesezoa yesebeze' binlo len lježgaque' na'a ba bida', san yesedile' na' yosošaše'. <sup>52</sup> Quinga solao gac na'a, še žan nita' gayo' bene' to lo' yo'o, yesedil legacze', chope' contr šone' na' šone' contr chope'. <sup>53</sup> Yesedil bene' byo len xi'ine' na' xi'ine' len le'. Na' yesedil no'olen' len xi'ine' no'ole, na' xi'ine' no'olen' len le'. Na' yesedil no'olen' len xo'oliže' na' xo'oliže' len le'.

### Bitw gosacbe'ede' bi zeje da' ca' chon Diosen'

(Mt. 16:1-4; Mr. 8:11-13)

<sup>54</sup> Nach lecze gož Jesúsen' bene' ca' nita' na':

—Cate' chle'ele chi' bejw gan' chxoa gwbiža' na' žale: “Gac yejw”, na' chac ca'. <sup>55</sup> Na' cate' chechj be' da' za' ži'le na' žale: “Guac zeye”, na' chac zeye'. <sup>56</sup> Bene' gwxiye' le'e. Cate' chle'ele nac chac le'e yaban' na' lo yežlion' nezele še gac yejw o še gac zeye'. ¿Bixchen' bi chacbe'ele bi zejen da' ca' chon Diosen' tiemp nga zoacho na'a?

### Cheyała' goncho cont yezoacho binlo len bene' che'e chio' lao justis

(Mt. 5:25-26)

<sup>57</sup> ¿Bixchen' bi chonle xbab cont nezele can' cheyała' gonle? <sup>58</sup> Cate' to bene' gonle xya che' na' che'e le'e lao justis, šlac ngo'ole nezen' le yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo na' bene' ca' yoseyjue' le'e ližya. <sup>59</sup> Chnia' le'e bitw yebeje' le'e še bina' chixjwle doxen da' čala'le.

### Cuiayi'cho še bitw yetinjecho xtoła'chon'

**13** <sup>1</sup> Na' len bene' ca' že'na' gwnita' bal bene' gosoe'lene' Jesúsen' diža', gose'ene' Pilaton' gwsele' soldadw che' ca' jasetue' to xonj bene' Galilea ca' na' bchixde' xchengaquen' len che beyixe' ca' ba gosote' cont yesonxene' Diosen'. <sup>2</sup> Nach boži'i Jesúsen' xtiža'gaquen' gože' legaque':

—¿Chonle xbaba' gosac chegaque' ca' lagüe dan' gosonche' da' malech clel ca' bene' Galilea ca' yezica'chle? <sup>3</sup> Chnia' le'e, bi naquen ca'. Še bitw yetinjele xtoła'le ca', lecze gwžin ža cate' cuiayi'le. <sup>4</sup> Nezele che bene' šino'šone ca', šlac zjanite' yež Siloé gwbiže to campanaryw na' gwdenen legaque' na' gosate'. ¿Lecze chonle xbab goc ca' dan' zjanacche' bene' mal clel ca' bene' ca' zjaže' Jerusalén? <sup>5</sup> Chnia' le'e, gague can'. Še le'e bi yetinjele xtoła'le, lecze gwžin ža cate' cuiayi'le.

### Jempl che yag yixgüigw da' bibi chbia

<sup>6</sup> Na' be'lene' legaque' jempl nga, bzejni'ide'ne' cheyała' yesyetinjde' xtoła'gaque', na' gože' legaque':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' jane'e še de toga yixgüigw gagüe', perw bitw bi bželde'.<sup>7</sup> Na' gože' ben' chape' yag che' ca': “Ba chac šon iz chedena'a yag nga še chbian yixgüigw, perw bitw bi chbian. Gwchoguen, lažjw con zoan nlanen, na' neca bi chbiazen.”<sup>8</sup> Na' gož ben' le': “Xana', jayenna', za' zoašazen yetgüiz, che'ena' xanenna' na' cuecan' yo beb.<sup>9</sup> Na' še cuian yixgüigw do yetgüiz, bitec da' güen, perw še bicze bi cuian, nach chogchon.”

### Jesúsen' beyone' to no'ole ža che Dios

<sup>10</sup> Na' to ža che Dios bsd blo'e Jesúsen' bene' že' to lo' yodao'.<sup>11</sup> Na' zoa to no'ole bene' ba goc šino'šone iz yo'o nyaz da' xigüen' yichjlažda'ogüe'na'. Na' ben da' xigüen' cont bdohe cuerp che'na', na' gague gocch se' to licha.<sup>12</sup> Na' cate' ble'e Jesúsen' le', goxe'ne' na' gože'ne':

—No'ole, na'a yeyacdo' yižgüe' chio' nga.

<sup>13</sup> Na' gwxo'a ne'e cuerp che no'ola', na' la' bezete' to licha. Na' no'ola' benxene' Diosen'.<sup>14</sup> Perw na' bene' gwnabia' che yodao'na' bloque' da' beyon Jesúsen' no'ole güen' ža che Dios. Na' gože' bene' ca' nita' lo' yodaon':

—De xop ža cont gonle žin. Le da lo ža ca' cont yeyone' yižgüe' chelen' perw bitw yidle ža che Dios cont yeyacle.

<sup>15</sup> Nach Xancho Jesúsen' gože'ne':

—Bene' gwxiye' le' len bene' lježo'. ¿Gague lo ža che Dios bia'cze chsežle go'n chele o burr chele ga zjada'ba' chjasanlba' güe'ej nis?

<sup>16</sup> No'ole nga naque' xi'in diaža che da' Abraham, na' Satanásen' dan' chnabia' da' xigüe' ca' benen cont ba bdohe cuerp chen' šino'šone iz. Da'nán' nacczen licha ba beyona'ne' ža che Dios.

<sup>17</sup> Cate' gwne' ca', bene' ca' chesegue'e le' gosacde' zto', perw yogo'lol bene' ca' yezica'chle nita'na' besyebanchgüede' len yogo' dan' ben Jesúsen', le leca güen zjanac dan' benen'.

### Yela' gwnabia' che Diosen' naquen ca biñ che xomdas

(Mt. 13:31-32; Mr. 4:30-32)

<sup>18</sup> Nach gwna Jesúsen':

—Na'a gwlo'eda' le'e cont nezele šanch bene' yosozenag che Diosen' cont nabi'e yichjlažda'ogaque'.<sup>19</sup> Da'nán' yela' gwnabia' che Diosen' naquen ca biñ che xomdas. To bene' gozen' na' cate' blan' gwcha'on goquen yag cha'o na' be ca' zjazoa xil goson ližgacba' lo xoze' yaga'.

### Yela' gwnabia' che Diosen' naquen ca levadura

(Mt. 13:33)

<sup>20</sup> Nach da' yoble gozne':

—Na'a n̄ia' le'e yelate' nac nac yel̄a' gwnabia' c̄he Diosen'. <sup>21</sup> Naquen ca levadura dan' gwlec no'olen' len to rob yezj cont gwcha'o doxenen.

**Cheyal̄a' ch̄iljwlaže'cho nac goncho cont soacho bin̄lo len Diosen'**

(Mt. 7:13-14, 21-23)

<sup>22</sup> Na' gwda Jesúsen' b̄sed blo'ede' bēne' ca' že' ciuda ca' na' yež ca' gan' bedie' cont bežine' Jerusalén̄na'. <sup>23</sup> Na' to bēne' gože' Jesúsen':

—X̄anto', ¿con to c̄hopze bēne' šjasyenite' len Diosen'?

Nach Jesúsen' gože' legaque':

<sup>24</sup> —Chnia' le'e, bēne' zan chese'nde' yesenite' bin̄lo len Diosen', perw gwžin ža cate' bich gac yesone' cont yesenite' bin̄lo len le'. Da' nac žialao gonle, ch̄iljwlaže'le nac gonle cont soale bin̄lo len Diosen' <sup>25</sup> cont bi gone' len le'e ca ben to x̄an yo'o cate' bžin hor gwseyjuen'. Gwzože'e bseyjue', na' gwdechle besežin bēne' bososiže' le'e puert c̄he'na' na' bich gwsaljue' cont yeso'e. Na' gose'ene': "Gwsaljwšca cont šo'to'." Na' gože' legaque': "Bitw nombi'a le'e, n̄eca n̄ezda' ga za'acle." <sup>26</sup> Can' gac c̄he balle. Nach solaole ye'ln̄e': "Güe'ej gwdagwto' len le' na' b̄sed blo'edo' neto' la cay lažto'." <sup>27</sup> Perw na' da' yoble ye'e le'e: "Bitw n̄ezda' ga bēne' le'e. Le šjaya'ac yogo' le'e bēne' güen da' mal." Can' ye'e le'e. <sup>28</sup> Na' le'ele Abraham na' Isaac na' Jacob na' yogo'lōl bēne' ca' gosoe' xtiža' Diosen' cani' nite' yaba gan' zoa Diosen' chnabi'e. Na' le'e bitw gac šo'l̄ena'. Nach cuežyaše'le na' gagwxejte layle dan' leca žaglaole cate' gacbe'ele bich gac šo'le. <sup>29</sup> Bēne' zan bēne' za'ac doxen yežlio yesyežine' yaba gan' zoa Diosen' chnabi'e na' yesebi'e cho'a mes yesagüe'. <sup>30</sup> Nita' bēne' zjanaque' bēne' bzebe n̄a'a perw gwžin ža cate' yesaque' bēne' žialao. Na' nita' bēne' zjanaque' bēne' žialao n̄a'a, perw gwžin ža cate' yesaque' bēne' bzebe.

**Begüine' Jesúsen' n̄eche xtol̄a' bēne' Jerusalén ca'**

(Mt. 23:37-39)

<sup>31</sup> Lo ža na'teze bal̄ bēne' fariseo ca' besežine' gan' zoa Jesúsen' gose'ene':

—Cheyal̄a' yoxonjo' nga gan' chnabia' rey Herodes, le chaclaže' gote' le'.

<sup>32</sup> Jesúsen' gože' legaque':

—Herodesen' naque' ca to beza' yel̄a' gwxiye' c̄hen'. Le šja'ac na' ye'ln̄e' yeto c̄hope žazen' soa' yebejcha' da' x̄igüe' ca' zjajo'o zjanyaz yich̄jlaždao' bēne' na' yeyoncha' bēne' chesacšene. Ba zoa yeyož gona' dan' cheyal̄a' gonan'. <sup>33</sup> Perw ca nac dan' chona' n̄a'a gonchczan' gwxe güižj. Gague ngan' chesote' bēne' ca' chesoe' xtiža' Diosen', san Jerusalén chesote' bēne' ca'.

<sup>34</sup> 'Le'e bēne' Jerusalén, chotle bēne' ca' chesoe' xtiža' Diosen' na' ca nac nochle bēne' ca' chsel̄a' Diosen' len le'e, ch̄chellene' yej. Zan n̄i'a

goclaža' yotoba' le'e ca to jed xcaca' be nche' xi'in na' chyežba' legacba', perw bitw goclaže'le. <sup>35</sup> Na' na'a ba gwlejšyichj Diosen' le'e. Na' chnia' le'e, bich le'ele neda' na'a. Cate'ch žin žana' nale: “Mbalaz ben' za' nga nseła' Xancho Diosen' le' cont nabi'e”, cana'ch le'ele neda' da' yoble.

### Jesúsen' beyone' to bene' de yi

**14** <sup>1</sup> Na' to ža che Dios Jesúsen' gweje' jatagüe' liž to bene' fariseo ben' nac bene' blao. Na' yezica'chle bene' fariseo ca' chosogüia chesene'e bixen' goncze' cont gata' da' yosode'ede' yesagüe' xya che'. <sup>2</sup> Na' lagüe'na' zecha to bene' chacšene, de cuerp chen' yi. <sup>3</sup> Na' gož Jesúsen' bene' fariseo ca' na' bene' ca' chososed chosolo'e ley dan' bzoj da' Moisés: —¿De lsens len ley chechon' yeyoncho to bene' güe' ža che Dios o še bitw bi lsens de?

<sup>4</sup> Perw notno boži'i xtiže'na'. Nach Jesúsen' bešue' na' bena' na' beyone' le', na' gože'ne':

—Guac yeyejo'.

<sup>5</sup> Nach gož Jesúsen' bene' ca' že' liž bene' fariseon':

—Le'e še zoa to burr o to go'n chele na' lažo'ba' to lo' yechw sitjw, ¿cabi la' yebejteleba' lašaze nac ža che Dios?

<sup>6</sup> Na' nono goc yoži'i xtiža' Jesúsen'.

### Bene' ca' gosaxe' gan' chac güešagna'

<sup>7</sup> Na' ble'e Jesúsen' can' cheson bene' ca' gosaxe' liž bene' fariseon', gosebeje' gan' zjachi' bene' blao ca' cont gosebi'ena'. Na' Jesúsen' be'e to jempl, gože' legaque':

<sup>8</sup> —Cate' to bene' gaxe' le'e gan' chac güešagna', bitw cue'le gan' cheyała' cue' bene' blao ca', le še cue'le na', guacte yid bene' nacch bene' blao <sup>9</sup> na' xan yo'ona' ye'e le'e: “Le soža' cont cue' benga.” Nach do chaquele zto' soža'le cue'le ga yoble len bene' ca' bitec bi zjazaca'. <sup>10</sup> Na' cate' gan' gaxe' le'e cue'le len bene' bitec bi zjazaca', na' cate' yid xan yo'ona' na' ye'e to tole: “Bene' migw chia', da cui'o len bene' blao ca'.” Nach gacxenle lao bene' ca' zjachi' len le'e cho'a mesen'. <sup>11</sup> Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gacxene'.

<sup>12</sup> Na' lecze gož Jesúsen' ben' goxe' le' ližen':

—Cate' gono' to lni na' gaxo' bene' yesagüe' len le', bitw gaxo' bene' biše' lježo', bene' migw chio' o bene' zjanaque' bene' gwni'a. Legaque' lecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'. <sup>13</sup> Cate' gono' to lni gox bene' yaše' na' bene' nchog no ni'a na'gaque', bene' nxinj ni'e, na' bene' lchol. <sup>14</sup> Še gaxo' legaque', Diosen' gone' so' mbalaz, le bene' ca' bi gac yesyegüe'e gwzon chio'. So' mbalaz cate' Diosen' yosbane' le' ladjo bene' guat ca' txen len yezica'chle ben' ja'ac to licha cate' gosebane'.

### Jempl che to bene' ben lni xen

<sup>15</sup> Na' to bene' chi' cho'a mesen' txen len Jesús'en' bende' xtiže'na' na' gože'ne':

—Mbalaz soacho gagwcho lo lni da' gac caten' ba chnabia' ben' seła' Diosen'.

<sup>16</sup> Nach Jesús'en' gwne':

—To bene' bene' to lni xen, na' goxe' bene' zan šja'ac ližen' cont yesagüe'. <sup>17</sup> Na' cate' bžin hor yesagüe', na' xan yo'ona' gwsele' xmosen' cont šjatobe' legaque' yesagüe'. Na' cate' jane' to toe', gože' legaque': “Le šo'o, ba bsini'e dan' gagwchon'.” <sup>18</sup> Na' yogo'lole' gose'e ben' bi zjazoe' latje šja'aque' gan' chone' lnin'. Bene' nechon' gwne': “Za' gwxia' to yežlio, na' cheyala' šjana'an. Na' yešco' xanon' bitw gac yida'.” <sup>19</sup> Na' yetoe' gwne': “Za' gwxia' gayo' cue' goñ na' na'a šjengaca'ba' prueba. Yešco' xanon' si'xene' chia', bitw gac yida'.” <sup>20</sup> Na' yetoe' gože'ne': “Za' bšagna'. Da'nan' bitw gac yida'.” <sup>21</sup> Na' mosen' beyeje' na' jayeže' xanen' can' gose' bene' ca' le'. Nach xan yo'ona' ben' chon lnin' bže'e. Nach gože' xmosen': “Gwyej jata to to cay na' to to nez lo ciudan', na' gwtobo' bene' yaše' na' bene' nchog ni'a na'gaque' na' bene' nxinj ni'e, na' bene' lchol cont yeside' yesagüe'.” <sup>22</sup> Gwde bene' ca' nach gože' le': “Xana', ba jatoba' bene' ca' ba gwnaon', na' ne' dehcze latje par bene' yoble.” <sup>23</sup> Nach xane'na' gože' le': “Bchoj lo' ciudan' na' gono' byen yesid ben' nita' chanez. Na' šjaxi'o bene' ca' zjaže' yixe'. Gono' byen yeside' liža' nga yesagüe' cont yežan' bich bi latje šo'. <sup>24</sup> Na' ca' nac bene' ca' goxa' da' nechw, bich gua' latje yesagw legaque' dan' ba bsini'ana'.”

### Dan' cheyala' goncho cont gaccho txen len Jesucriston'

<sup>25</sup> Na' bene' zan juisyw zjana'ogüe' Jesús'en', na' gwyechje' gože' legaque':

<sup>26</sup> —Note'teze bene' še chaclaže' šejnilaže' neda' na' gwzenague' chia', še bi gacchde' neda' clcl ca' xaxne'e, no'ol che', xi'ine', biše', zane', na' lente cuine', bi gac gone' neda' txen. <sup>27</sup> Na' note'teze bene' bi chzanlaže' cuine' saca'zi'e o gate' ne' chia' neda', lecze bitw gac gone' neda' txen. <sup>28</sup> Še tole che'nele gonle to campanaryw, zgua'tec cue'le na' gonle xbab gwsaca'le ca do gaca' da' chyažjele cont gonlen, še gaque xmechwle cont yeyož campanaryon'. <sup>29</sup> Še bi gwchix gwtole xbab chelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožen, na' yogo' bene' yesele'ede' lenenna' yesezi'diže' le'e, <sup>30</sup> yesene': “Benga gwzolao chone' to campanaryw perw bitw beyož xšinen'.” <sup>31</sup> Na' še to rey chone' xbab tile' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw. <sup>32</sup> Na' še chacbe'ede' bi gone' gan, šlac ne' zoa ben' yeto, zito', sele' ben' šjasedie' xtižen' lao rey ben' yeto yesenabe' yesyenite' binlo.



<sup>33</sup> Ca' naquen len le'e, note'tezle še bi cuejyichjle yogo'lol bi da' de chele, bitw gac gonle neda' txen.

### Cate' zeden' bich naquen zxi'

(Mt. 5:13; Mr. 9:50)

<sup>34</sup> 'Zeden' naquen güen, perw na' še bich naquen zxi', ¿nacxe goncho cont yeyaquen zxi' da' yoble? <sup>35</sup> Bibi zacan', neca gaclenen yežlio, neca gaquen par beb, lete cho'onchon. Le'e žia nagle da' chene, le gwzenag xtiža'na'.

### Jempl che xila' ben' gocžeje

(Mt. 18:10-14)

**15** <sup>1</sup> Na' bene' güechixjw ca' na' yebale bene' güen da' xinj, yogüe' gosebigue' gan' zoa Jesúsen' cont gosende' xtiže'na'. <sup>2</sup> Na' bene' fariseo ca' na' bene' ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' bene' güen da' xinj ca' na' chagwlene' legaque'.

<sup>3</sup> Nach Jesúsen' be'e to jempl, gože' legaque':

<sup>4</sup> —Še nita' to gayoa xila' chele na' gacžeje toba', ¿bi yocua'anle be ca' taplalj togalj gan' že'ba' latje daša' na' šjaydiljwle ben' ba gocžejena' cont yeželba'? <sup>5</sup> Na' cate' yeželban' yebechgüele na' yexoalba' ya'axichjle yeyoa'lba'. <sup>6</sup> Na' cate' yežin ližle, gwtoble bene' migw chele na' bene' gualiž chele na' ye'lne': “Le yebe len neda'. Ba bežel xila' chia' ben' gocžeje.” <sup>7</sup> Chnia' le'e, gwbeche Diosen' txen len angl che' ca' cate' to bene' chon da' mal yetinjde' xtole' clal ca' yesyebede' che taplalj togalj bene' zjanaque' bene' güen bene' bitw de xtoła'gaque' da' yesyetinjde'.

### Jempl che mechw dan' gwnit

<sup>8</sup> 'Na' le'e no'ole še de ši mechw plata chele na' še nit ton, la' gwguala'tele to yi' na' gwloale lo' yo'o chele na' yeyiljwyožlen cont yeželen. <sup>9</sup> Na' cate' yeželenna', na' yotoble no'ole migw chele ca' na' bene' gualiž chele na' ye'le legaque': “Le yebe len neda', le ba beželda' mechw chia' dan' gwnit.” <sup>10</sup> Chnia' le'e lecze chesyebe chesyezaque' angl che Diosen' bene' zoa yaba cate' to bene' chon da' xinj chetinjde' xtole'na'.

### Jempl che ben' benditje xi'inen' xmechue'

<sup>11</sup> Na' lecze gože' legaque':

—Gwzoa to bene' na' gwnita' chop xi'ine' bene' byo. <sup>12</sup> Na' bžin ža bene' xcuiden' gože' xen': “Xa', beñ neda' dan' cheyala' sia' da' de chio'.” Nach xen' bnežjue' dan' cheyala' si'en. <sup>13</sup> Goc to chop ža nach bene' xcuiden' btobe' yogo'lol bi da' de che' na' gwze'e gwyeje' nación zito' na' zlez da' bi zaca' jene'. Na' benditjde' xmechue'na' zejlene' da' malen'.

<sup>14</sup> Na' cate' beya xmechuen', goc to gwbin juisyw doxen naciónna', na'

bich bi gota' xmechue' cont si'e da' ye'ej gagüe'. <sup>15</sup> Da'nan' gwyeje' gan' zoa to bene' naciõnna' gwñabe' žin, na' bena' gwsele' le' yixe' ga že' be zan xcoše' na' jayoe'ba'. <sup>16</sup> Na' catec gwdone' goclaže' gagüe' dan' chosonežjue' chesagw coš ca', perw ne len ca bosonežjue' le' gagüe'. <sup>17</sup> Na' beyone' to xbab šagüe', gwne': "Nita' mos zan che xan' na' dechgua da' chesagüe', na' neda' gatda' yela' chdon. <sup>18</sup> Yeza' nga na' yeya'a gan' zoa xa' na' yapa'ne' bena' da' mal lao Diosen' na' lao le', <sup>19</sup> na' bich zaca' gone' neda' cuent ca xi'ine', con še gone' latje gaca' ca to xmose'." <sup>20</sup> Nach beze'e beyeje' gan' zoa xen'. Na' zito'le za' yežine' cate' ble'e xen' le' na' beyaše'de' le' na' gwza'sese' jašague'ne'. Na' gwdele'ne' bnope'ne'. <sup>21</sup> Nach gož xi'ine'na' le': "Xa', ba bena' da' mal lao Diosen' na' lagu' le'. Bich zaca' gono' neda' cuent ca xi'ino'." <sup>22</sup> Na' xe'na' gože' xmose' ca': "Le šjalej tgot lache' šagüe', le guacwben', na' le šjaxi' to niy na' le co'on xbembe', na' le šjaxi' šcue' yel na' gwdelen ni'abe'. <sup>23</sup> Na' le šjaxi' go'n dao' ben' chane' na' le gotba' cont gagwchoba', le goncho lni. <sup>24</sup> Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejyichjbe' chio', perw na'a ba bela'be'." Na' gosezolaogüe' chesone' lni.

<sup>25</sup> Na' xi'ine' bene' nechon' zeje' yixe' cate' bežin xi'inen' yeto ben' benditje xmechuen', na' cate' zeza' ben' gwyej yixen', ba zoa yežine' liž xen' cate' bende' chosocueže' na' chosoye'e. <sup>26</sup> Na' goxe' to mosen' na' gwñabde' le' bixchen' chesone' lni. <sup>27</sup> Na' mosen' gože'ne': "Bi' bišo'na' ba bela' na' xaon' ba betue' go'n daon' ben' chane'chgua da' bela'be' to šagüe' to güen." <sup>28</sup> Nach xi'ine' nechua' bže'e na' bi goclaže' yeyo'e liž xen'. Na' bchoj xen' na' gota'yoede' le' yeyo'e yo'o. <sup>29</sup> Perw xi'ine' bene' nechua' gože' xen': "Zan iz ba chac zoa' nga chonteza' žin con can' žo' le', na' bina' gaca' bene' güedenag. Na' ne to šib dao' cana' gono' neda' cont gota'ba' gona' lni len bene' migw chia' ca'. <sup>30</sup> Na' na'a ba bela' xi'ino' nga benditjbe' yogo'lol da' bnežjo'be' gwdalembe' no'ole zle', na' beto' par lebe' go'n dao' ben' chane'." <sup>31</sup> Na' xe'na' gože'ne': "Xi'indagua', le' zoatezo' len neda', na' yogo'lol da' de naquen chio'. <sup>32</sup> Perw cheyala' goncho lni nga na'a da' chbechgüecho ba bela' bi' bišon', le ba bena'be' cuent ca to bi' guat, perw na'a zoabe' mbambe'; gwlejyichjbe' chio', perw ba bela'be'."

### Jempl che to mos blao ben' benditjde' da' de che xane'

**16** <sup>1</sup> Nach gož Jesúsen' bene' ca' zjanaque' le' txen:  
 —Gwzoa to bene' gwñi'a na' gwzoa to mos blao che' ben' gwo'o lo ne'e yogo'lol da' de che'. Na' bene' gwñi'ana' bende' rson xmose' blaon' ba benditjde' bi da' de che'. <sup>2</sup> Na' xanen' goxe' le' na' gože'ne': "Ba benda' diža' can' chonon'. Cheyala' yodio' cuent yogo'lol da' ba benditjedo' chia'. Bich gac gono' xšinan' na'a." <sup>3</sup> Nach mosen' bene' xbaben': "¿Bixe gona' na'a? Xanan' ba cholague' neda'. Bich gac gona'

xšinen', na' nēca gac goncha' žin gual, na' gacda' zto' še naba' carida.  
<sup>4</sup> Nezdā' bi gona' cont nita' beñe' yesene'e neda' cate' bich chona' žin che xanan'." <sup>5</sup> Nach goxe' yogo'lol beñe' ca' chesala' xmechw xane'na' tgiuej tgiueje' na' gože' beñe' nechw: "¿Gaca' chalo' che xana'?" <sup>6</sup> Na' bena' gože'ne': "Chala' che tap mil litrw set." Nach gož mos blaona' le': "Bedao'nez gwche'edo' na' bzoj lo cuenten' bzoan chalo' che chop mil litrwze seten'." <sup>7</sup> Gwde na' gože' beñe' gwchopen': "¿Gacan' chalo' che xanan'?" Nach bena' gože'ne': "Chala' che to mil rob trigw." Nach mosen' gože' bena': "Gwche'edo' na' bzoj lo cuent chio'na' bzoan chalo' che xono' gayoa robze trigon'." <sup>8</sup> Na' xan mos gwxiyen' gocbe'ede' xmosen' leca nye'e xbab da' beyiljwlaže' nacle gone' soe' binlo len lježe' beñe' ca' chesala' che xanen'. Le beñe' ca' zjachi' yichje' to zleze dan' chac lo yežlion' chesonchgüe' xbab nacle yesone' len dan' zjade chegaque', perw zan beñe' ba zjajo'o be'ni' che Diosen' lo' yichjlažda'ogaque' bitw chesone' xbab naclen' yosochine' dan' de chegaque'.

<sup>9</sup> Na' chnia' le'e, dan' de chele yežlio nga da' te chen', perw le gwchinen cont nita' migw chele. Na' cate' ba beya bi dan' de chele yežlio nga, nach nita' beñe' yosolebe' le'e cate' yežinle yaba gan' soale toli tocanē.

<sup>10</sup> Še to beñe' chone' can' cheyala' gone' len da' bibi zaca'tec, lecz ca' gone' len da' zaca'chgua. Na' beñe' bi chone' can' cheyala' gone' len da' bibi zaca'tec, lecz bitw gone' can' cheyala' gone' len da' zaca'chgua. <sup>11</sup> Še le'e bi chonle can' cheyala' gonle len dan' de chele yežlio nga da' te chen', bitw gon Diosen' le'e da' zaca'ch da' bi te che. <sup>12</sup> Dan' de chele yežlio nga, che Diosen' gague chelen'. Na' še bitw chonle can' cheyala' gonle len da' nac che', bitw gone' le'e da' zaca'ch da' bi te chen.

<sup>13</sup> Nono mos gac gone' žin len chop xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonen' do chža'alaže'ze'. Lecze ca' le'e, bitw gac gonle xšin Diosen' do yichj do laže'le na' gonte xšinle cont gacle beñe' gwñi'a.

<sup>14</sup> Na' lecze nita' beñe' fariseo ca' chesende' xtiža' Jesúsēn', na' gosezi'diže' le', le gosaclaže' yesaque' beñe' gwñi'a. <sup>15</sup> Na' gož Jesúsēn' legaque':

—Le'e chonle cont benachen' chesacde' chdaczle licha, perw Diosen' neze nle'ede' yichjlažda'ole, na' Diosen' chgue'ede' bal da' chesaque benachen' zjanaquen da' žialao xen.

**Ley che Diosen' na' beñe' ca' chnabia' Diosen' yichjlažda'ogaque'**

<sup>16</sup> Na' gozna' Jesúsēn':

—Gwzolaon cani'te bžinten cate' bla' Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle beñe' gosoe' xtiža' Diosen' bzejni'in chio' che Diosen'. Na' na'a gwzolaon len Juanna',

ne' nita'cze bene' cheseyixjue'ede' Diosen' nabi'e yichjlaždao' bene' yosozenague' che'. Na' bene' zan cheseyiljue' nacle yesone' cont nabia' Diosen' yichjlažda'ogaque'.

<sup>17</sup> 'La'czla' še yežlion' len da' ca' zjažia le'e yaban' yesede chegaquen, ca nac Xtiža' Diosen' dan' nyojen, ne late' daon' cbi te chen.

**Bi cheyała' yela'acho len no'ol chechon' cont soalencho no'ole yoble**

(Mt. 19:1-12; Mr. 10:1-12)

<sup>18</sup> 'Note'teze bene' chele'e len no'ol che' na' cheque'e no'ole yoble chone' da' xinj, tozcze ca naquen šaca' gata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca da' xinj gone' len dan' chon bene' chata'lene' no'ol che bene' yoble.

**Bene' gwni'a na' Lázaro**

<sup>19</sup> Nach gozna' Jesúsena':

—Gwzoa to bene' gwni'a na' xdanchgua goc xalane'na', na' leca gwdagwšagüe' yogo' ža. <sup>20</sup> Na' to bene' yaše' le' Lázaro, yogo' ža jasedixjue' le' cho'a puert zaguan che bene' gwni'ana' cont gwñabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp chen'. <sup>21</sup> Na' catec gwdone' goclaže' gagüe' bla'a dao' yela' guagw da' beselažo' cho'a mes che bene' gwni'an'. Na' beco' ca' ja'acba' jasele'eba' yežo' dan' gwžia cuerp che'na'. <sup>22</sup> Na' got bene' proben' nach angl bene' že' gan' zoa Diosen' besyezi' besyeque'e le' yaban' gan' zoe' na'a len da' xozxta'ocho Abraham. Na' lecze got bene' gwni'ana' na' bosocuaše'ne' <sup>23</sup> na' beyeje' lo yi' gabił. Na' šlac chžaglagüe' na' gwłis lagüen' na' ble'ede' zito'le nita' da' Abraham len Lázaron' yabana'. <sup>24</sup> Nach bene' gwni'an' gwne' zižje gwne': “Xa' Abraham, beyaše'laže'šca neda' na' gwseła' Lázaron' cont yosbise' loža' nga len late' nis da' gwłapa' xbene'na', le leca chžaglagua' lo yi' nga.” <sup>25</sup> Perw na' Abrahanna' gože' le': “Xi'ina', bosa'laže' cate' gwban'o' yežlio zleze da' šagüe' da' güen gota' chio', na' Lázaro nga to zleze da' mal goc che'. Na' ba zoe' mbalaz nga na'a na' le' chžaglaguo'. <sup>26</sup> Bi gac gona' can' chaclažon', le Diosen' bach nze' to bdiñj xen ga nono gac te, cont nono gac sa' nga šeje' gan' zon', neca nono gac sa' gan' zon' na' yide' nga.” <sup>27</sup> Nach bene' gwni'ana' gože' Abrahanna': “Bene' gol dao', chata'yoeda' le' gwseła'šca Lázaron' liž xan'. <sup>28</sup> Nita' gayo' bene' biša' na' che'nda' šjatixjue'ede' legaque' nac yesone' cont Diosen' bi yesele' legaque' latje nga gan' yesežaglagüe'.” <sup>29</sup> Na' Abrahanna' gože' le': “Decze dan' bzoj da' Moisésena' na' dan' bosozoj yezica'chle bene' ca' goso'e xtiža' Diosen' cani'. Cheyała' yosozenague' che da' ca' zjanyojen.” <sup>30</sup> Na' gože' Abrahanna': “Bitw, bene' gol dao'. Še to bene' yebane' ladjo bene' guat na' güe'lene' legaque' diža', nach yesyetinjde' xtoła'gaquen'.” <sup>31</sup> Nach gož Abrahanna' le': “Še bitw

chosozenague' che dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen', la'czla' še yeban to bene' ladjo bene' guat ca', bi yesejle'cze' che Diosen'."

**Bitw cheyała' goncho cont gon bene' da' xinj**

(Mt. 18:6-7, 21-22; Mr. 9:42)

**17** <sup>1</sup> Na' gož Jesúsén' bene' ca' zjanaque' le' txen:  
—Decze da' gonen cont lažo' bene' yesone' da' xinj, perw nyaše'chguaze gac che bene' chone' cont bene' yoble yesone' da' xinj.  
<sup>2</sup> Yejni'a šaca' yosocheje' yene' to yiše na' šjasezale' le' lo' nisdao' cled ca soe' gone' cont to bene' za' gwzolaküe' chejnilaže' neda' lažoe' gone' da' xinj. <sup>3</sup> Da'nán' le gwsaca' cont bi gonle ga lažo' bene' gone' da' xinj.  
<sup>4</sup> Na' še to bene' lježle gonde' le'e mal, le tile' na' še gwše'e xbab na' ne' bich gone' ca', le yezi'xen che'. <sup>4</sup> La'czla' gaž ni'a lao tža gone' da' mal contr bene' lježen', še gaž ni'ate ne': "Ba betinjda' che dan' benan', bezi'xen chia'", na' cheyała' yezi'xene' che'.

**Gosaclaže' yesejle'che' che Diosen'**

<sup>5</sup> Na' gose' postlw ca' Xancho Jesúsén':  
—Gaclenšco' neto' cont šejle'chto' che Diosen'.  
<sup>6</sup> Nach gož Xanchon' legaque':  
—Xsa yag xomdas naquen da' dao' riz, na' la'czla' dan' chejnilaže'le Diosen' naquen ca to xsa xomdas lagüe dan' bi chejnilaže'teclne', še šejnilaže'le', guaque ye'le yag nga: "Gwcuase nga na' jayzoa lo' nisdan'", na' guacze can' nalna'.

**Dan' cheyała' yeson mos ca'**

<sup>7</sup> Le'e še mos chelen' chgua'ane' go'n, o še chyoe' xila', cate' chele'e güeyeban' bitw che'le': "Beyo'o ngale, gwche'edo' gague' xše'." <sup>8</sup> San che'le': "Bsiñi'a da' ye'ej gagua' na' gonon'. Te yedaguan' nach gago'."  
<sup>9</sup> Na' bitw cho'elne' yela' choxcen cate' ba bene' dan' gožlene'. <sup>10</sup> Na' lecz ca' le'e, cate' ba benle yogo'lo' dan' ža Diosen' gonle, cheyała' nale: "Bitw zaca'to' no gon yela' choxcen cheto' ca dan' ba bento', le bento' con da' cheyała'cze gonton'."

**Jesúsén' beyone' ši bene' chese'ede' yižgüe' da' nzi' lepra**

<sup>11</sup> Na' zej Jesúsén' Jerusalénna' len bene' ca' zjanaque' le' txen na' gwdie' gan' ndil distritw Samaria len distritw Galilean'. <sup>12</sup> Na' besežine' to cho'a yež dao' na' besechoj ši bene' chese'e yižgüe' da' nzi' lepra jasešague' Jesúsén'. Na' gosezie' zito' <sup>13</sup> na' gosene' zižje gosene':  
—Maestrw Jesús, beyaše'laže' neto'.  
<sup>14</sup> Na' Jesúsén' cate' ble'ede' legaque' na' gože'ne':  
—Le šjaya'ac lao bxož ca' cont yesene'e le'e še ba beyacle.

Na' goquen' lo neza' besyeyacde'. <sup>15</sup> Nach toe' cate' gocbe'ede' bach beyaque', na' bebi'e na' gwnie' zižje benxene' Diosen', <sup>16</sup> na' bzoa xibe' lao Jesúsén' bi'e le' yela' choxc̄len. Ben' ben ca' naque' to bene' Samaria.

<sup>17</sup> Nach gwna Jesúsén':

—Beyona' ši bene'. ¿Ganxe bene' ca' yega? <sup>18</sup> ¿Toz bene' zito' nga bebi'e chonxene' Diosen'?

<sup>19</sup> Nach gož Jesúsén' bena':

—Bezoža' beyej to šagüe' to güen. Ba beyacdo' da' chejnilažo' neda'.

### Yela' chnabia' che Diosen'

(Mt. 24:23-28, 36-41)

<sup>20</sup> Na' bene' fariseo ca' gosenabde' le' batxen' yid ben' sela' Diosen' nabi'e naciön Israelen'. Nach boži'i Jesúsén' xtiža'gaquen' gwne':

—Ca nac yela' gwnabia' che Diosen', bi naquen da' le'echo. <sup>21</sup> Nono cheyala' güe' diža' ne': "Gwna' nga chnabi'e", o "Gwna' na' chnabi'e." Le ba zoe' len le'e na'a chnabi'e.

<sup>22</sup> Nach gože' bene' ca' zjanaque' le' txen:

—Gwžin ža cate' nale: "Šaca' na'a ba chnabia' ben' gwseła' Diosen'", perw bitw gac can' nablaže'len'. <sup>23</sup> Yesenita' bene' yesi'e le'e: "Gwna'šc nga zoa ben' gwseła' Diosen'", o "Gwna'šc na' zoa ben' gwseła' Diosen'." Perw bitw ga'ole ben' yesi'e le'e ca'. <sup>24</sup> Can' chac cate' chep yes, chsenin' doxen le'e yaban' zejzenez, lecze can' gac cate' žin ža yida' da' yoble, neda' naca' ben' gwseła' Diosen' golja' benach. Yida' zejzenez na' yogo'lol bene' yesele'ede' neda'. <sup>25</sup> Zgua'tec de da' zan da' cheyala' saca'zi'a na' bene' ca' že' na'a bitw yesejle'e chia'. <sup>26</sup> Lecz ca' goc ca' tiemp che da' Noé, lecze ca' gac cate' ba zoa žin ža yida' da' yoble, neda' naca' ben' gwseła' Diosen' golja' benach. <sup>27</sup> Bene' gwnita' ca' tiemp che da' Noén' gosaše' gose'ej gosagüe' goso'elaže' bosošagne'e na' bosošague' na' no xi'in che' cate' bžin ža gwyo'o Noén' lo' barcon'. Nach goc to yejwsio' juisyw. Na' gosebiayi' yogo' bene' ca' bi goso'o lo' barcon'. <sup>28</sup> Lecz ca' goc ca' tiemp che da' Lot, bene' Sodoman' gose'ej gosagüe' gosote' bi da' de chegaque', na' gosezi'e bi da' beseyažjde', na' gosaz gosa'ane', na' goson liže'. <sup>29</sup> Perw na' žan' beza' Loten' Sodoman', Diosen' bene' cont byinj yi' na' azufre yaba na' gosebiayi' yogo'lolē'. <sup>30</sup> Can' gac cate' yida' da' yoble, neda' naca' ben' gwseła' Diosen' golja' benach, na' yogo'lol bene' yesele'ede' neda'.

<sup>31</sup> 'Na' ža caten' yida' še chda to bene' do yichjo'o che liže', na' xšinłaze' žen' lo' yo'o che', bi yeyetje' cont yotoben', con yoxonje'. Na' lecze ca' bene' chda do yixē', bitw gacde' yeyej liže'. <sup>32</sup> Le šjayza'laže' can' goc che no'ol che Loten'. <sup>33</sup> Note'tez bene' chacde' gone' cont cbi saca'zie' o cont nono yesot le', bena' cuiayi'. Na' note'tez bene' chzanlaže' cuine' saca'zie' o gate' ne' chia' neda', ba de yela' mban che' toli tocanē.

<sup>34</sup> 'Chnia' le'e, quinga gac caten' yida' da' yoble. Chope bene' zjadie' chesetase' toz cam. Toe' yeca'a Diosen' na' yetoe' yega'an. <sup>35</sup> Na' chop

no'ole nite' txen chesote', toe' yeca'a Diosen' na' yetoe' yega'an. <sup>36</sup> Na' chope bene' nite' do yixe', toe' yeca'a Diosen' na' lecze yega'an yetoe'.

<sup>37</sup> Cate' gosende' diža' nga gose'e le':

—¿Gan' gac da' qui, Xanto'?

Nach Jesús'en' gože' legaque':

—Nga chonen che ben' že': "Gan' de be guat nan' chesežag šod ca'."

### Jempl che to no'ol güezeb len to juez mal

**18** <sup>1</sup> Na' be'len Jesús'en' legaque' to jempl bsd blo'ede' legaque' cheyala' nita'teze' yesonchachlaže' yosol güiže' Diosen'. <sup>2</sup> Na' gože' legaque':

—Gwche' to ciuda ga gwzoa to juez na' juezen' bi gwdape' Diosen' bala'an na' neca gwche'yichje' še chesazlaže' benachen' can' chonen'.

<sup>3</sup> Na' ciudan' gwzoa to no'ol güezeb, na' goxje cheje' lao juezen' na' che'e le': "Ben yela' justis chia' len bene' chgue'ede' neda'." <sup>4</sup> Ba goc sša bi chzenague' che', perw gwdechle bene' xbab, gwne': "Bitw chapa' Diosen' bala'an na' neca chi'yichja' še chesazlaže' benachen' can' chonan'. <sup>5</sup> Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'."

<sup>6</sup> Nach gož Xanchon' legaque':

—Le gon xbab che dan' gwna juezen' ben' bi zej to licha. <sup>7</sup> Nacchxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' chosol güiže' le' do ža do yel. ¿Gwleze' sša cont yosle' legaque' lo na' bene' ca' chesegue'ede' legaque'? <sup>8</sup> Chnia' le'e, Diosen' bedao'nez yosle' legaque' lo na' bene' ca'. Perw cate' neda' yida' yežlio nga yeto, neda' naca' ben' gwsela' Diosen' golja' benach, ¿ne' nita'ch bene' chesejnlaže' neda'?

### Jempl che to bene' fariseo len to bene' güechixjw

<sup>9</sup> Gwnita' bal' bene' gosacde' zjanaque' bene' güen lao Diosen' neche da' chesone'. Bene' ca' chesacde' bene' ca' yezica'chle bibi zjazaque' len Diosen'. Na' Jesús'en' bi'e jempl nga da' bcuišen bene' ca', gwne':

<sup>10</sup> —Chope bene' ja'ac yodao' blao jasel güiže' Diosen', toe' bene' fariseo na' yetoe' bene' güechixjw. <sup>11</sup> Bene' fariseon' gwzeze' bol' güiže' Diosen' na' con chonxen cuine', gwne': "Dios, neda' chona' yela' choxcen chio' bitw chona' cana' cheson yezica'chle bene'. Bitw chca'a bi da' de che bene' yoble, na' bitw chona' bichle da' mal. Bitw chata'lena' no'ol bi nac no'ol chia', na' neca naca' bene' mal can' nac bene' güechixjw ni.

<sup>12</sup> Chope ni'a to xman chona' gwbas, na' yogo'lol da' chona' gan, chbecan' ši cuen na' chnežjua' to cuen che yodao'." <sup>13</sup> Na' bene' güechixjon' gwzeteze' zito'le, neca cheyaxjde' lis lagüe' yabale. Nach chbaže' lcho'e gwne': "Dios, beyaše'laže' neda' naca' bene' güen da' xinj." Da'na'z da' gwna bene' güechixjon'. <sup>14</sup> Na' chnia' le'e, Diosen' bezi'xene' che bene'

güechixjon' na' beyej liže' bibi xtole' gota'. Perw bi goc ca' len bene' fariseon'. Le note'tez bene' chonxen cuine', Diosa' gone' cont si'e zto', na' note'tez bene' chzexjwlaže' lagüen', Diosen' gone' cont gacxene'.

**Jasesane' bidao' lao Jesúsén'**

(Mt. 19:13-15; Mr. 10:13-16)

<sup>15</sup> Na' jasesane' bidao' lao Jesúsén' cont xoa ne'e yichjgacbe'. Na' cate' bene' ca' zjanaque' le' txen besele'ede' can' chesonen', gosedile' legaque'.

<sup>16</sup> Perw na' Jesúsén' goxe' bene' ca' cont yeside' len bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogüe'. <sup>17</sup> Na' da' li žia' le'e, note'teze bene' bi yosozenague' che Diosen' ca cheson bidao' quinga cate' chosozenagbe' che xaxna'be', gwbat nabia' Diosen' yichjlažda'ogaque'.

**To bene' gwñi'a be'lene' Jesúsén' diža'**

(Mt. 19:16-30; Mr. 10:17-31)

<sup>18</sup> To bene' gwnabia' gože' Jesúsén':

—Maestrw, le' naco' bene' güen. ¿Bi cheyała' gona' cont gata' yela' mban chia' toli tocane?

<sup>19</sup> Nach Jesúsén' gože'ne':

—¿Bixchen' žo' naca' bene' güen? Toz bene' güen zoa, na' len' Dios.

<sup>20</sup> Le' nezdo' da' none' mandadw goncho: “Bi gata'lenle no'ol bi nac no'ol chele o bene' byo bene' bi nac bene' chele. Nono gotle. Bi cuanle. Bi güe'le diža' güenlaže' che bene' lježle. Le gap bala'an xaxna'le.”

<sup>21</sup> Na' gož ben' le':

—Yogo'lol da' quinga gwzolagua' chonczan' cate' ne' nactia' bidao'.

<sup>22</sup> Nach cate' bene Jesúsén' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežjon bene' yaše'. Yeyoža' šejnilažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' chio'.

<sup>23</sup> Perw na' bena' cate' beyož bende' diža' dan' gož Jesúsén' le', gocyaše'chgüede', le bene' gwñi'achgua goque'. <sup>24</sup> Na' Jesúsén' gwñe'e bene' gwñi'ana' na' gože'ne':

—Leca zdebe naquen to bene' gwñi'a gwzenague' che Diosen' cont Diosen' nabi'e yichjlažda'ogüe'. <sup>25</sup> Bedao'ch te to be xen be nzi' camello to lo' nag yeše' clel ca to bene' gwñi'a gwzenague' che Diosen' cont Diosen' nabi'e yichjlažda'ogüe'.

<sup>26</sup> Na' bene' ca' bosozenague' xtiže'na' gose'ene':

—¿Noxen' šjayzoa len Diosen' še ca'?

<sup>27</sup> Na' Jesúsén' gože' legaque':



—Da' bi gac gon benachen', bitw nacho bi gac gon Diosen' len.

<sup>28</sup> Nach Pedroa' gože' le':

—Neto' ba gwlejiychjto' yogo' da' de cheto' cont nacto' le' txen.

<sup>29</sup> Na' gož Jesúsen' legaque':

—Da' li žia' le'e, note'teze bene' ba gwlejiychje' liže', xaxne'e, biše', xo'ole' o xi'ine' neche chzenague' che Diosen' cont Diosen' chnabi'e yichjlažda'ogüe', <sup>30</sup> yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli tocane.

### Da' yoble gosyixjue'e Jesúsen' ba zoa gate'

(Mt. 20:17-19; Mr. 10:32-34)

<sup>31</sup> Na' gwlejiže Jesúsen' bene' šižinw ca' gwleje' cont zjanaque' txen len le' na' gože' legaque':

—Na'a ba zejcho Jerusalénna' gan' gac yogo'lol dan' nyoj chia' dan' bosozoj da' bene' ca' gosoe' xtiža' Diosen' cani', neda' naca' bena' gwseła' Diosen' golja' benach. <sup>32</sup> Gaca' lo na' bene' ca' bi zjanac bene' Israel, na' yesezi'diže' neda', na' yesene' yela' ya' chia', nach yosoži'e xene' cho'alagua'. <sup>33</sup> Yesot yeseyine' neda' na' yesote' neda', perw yeyon ža yebana' ladjo bene' guat ca'.

<sup>34</sup> Perw bene' ca' zjanaque' Jesúsen' txen bi gosejni'ide' dan' gože' legaque', le zjanchol yichjlažda'ogüen', da'nan' bi gosejni'iden'.

### To bene' lchol bene' Jericó bele'ede'

(Mt. 20:29-34; Mr. 10:46-52)

<sup>35</sup> Nach cate' ba zoa yežin Jesúsen' Jericó, to bene' lchol chi'e chanezen' chnabe' yosonežjo bene' le' con gaca' da' chesezande'. <sup>36</sup> Na' bende' chesede bene' zan gan' chi'ena', na' gwñabe' bin' chac. <sup>37</sup> Na' gose'ene':

—Jesús bene' Nazaret chdie' lagu' nga.

<sup>38</sup> Na' bosya'adie' gwne':

—Jesús, xi'in diaža che da' rey David, beyaše'laže'sca neda'.

<sup>39</sup> Nach bene' ca' zjažialao lao Jesúsen' gosedile' bene' lchol'en', gose'e le' cheyala' soe' šize, perw nachle bosya'adiache', gwne':

—Xi'in diaža che da' rey David, beyaše'laže'sca neda'.

<sup>40</sup> Jesúsen' gwleze', nach bene' mandadw šjasexi'e bene' lchol'en' lagüena'. Na' cate' gwbiga' bene' lchol'en' lao Jesúsen', nach gože'ne':

<sup>41</sup> —¿Bi chaclažo' gonda' le'?

Na' bene' lchol'en' gože'ne':

—Xana', benšca cont yele'eda'.

<sup>42</sup> Jesúsen' gože'ne':

—Bele'e. Dan' chejnilažo' neda' bach beyac yejlagon'.

<sup>43</sup> Na' la' bele'ete bene' lchola' na' gwda'ogüe' Jesúsén' benxene' Diosén'. Na' lecze ca' yogo' bene' ca' besele'ede' can' goquen' gosonxene' Diosén'.

### Jesúsén' na' Zaqueo

**19** <sup>1</sup> Nach Jesúsén' gwyo'e yež Jericó na' gwdeze' yešla'a ciudan'. <sup>2</sup> Na' zoa to bene' le' Zaqueo. Naque' bene' gwnabia' che bene' güechixjw ca', na' naque' bene' gwni'a. <sup>3</sup> Gwdiljwlaže' naclen' gone' le'ede' Jesúsén', perw bitw goc, le gwnita' bene' zan len Jesúsén' na' Zaqueon' goque' to bene' bčecw dao'. <sup>4</sup> Da'nán' gwza'sese' gwdie' lao bene' ca' cont gwyepé' to lo yag da' zoa gala'ze gan' te Jesúsén'. <sup>5</sup> Perw na' cate' bžin Jesúsén' xan yaguen', gwne'e lo yaguen' na' gože'ne':

—Zaqueo, bedao'nez beyetj. Cheyala' yega'ana' ližo' na'aže'.

<sup>6</sup> Nach Zaqueon' beyetjsese' chebede'. Nach beče'e Jesúsén' liže'na' na' benxene' le'. <sup>7</sup> Perw na' bene' ca' zjanžague' len Jesúsén' cate' besele'ede' can' goquen', yogüe' gosenie' che Jesúsén' gosene':

—Ba zeje' zjazoe' to liž bene' güen da' xinj.

<sup>8</sup> Nach Zaqueon' gwzeche' na' gože' Xanchon':

—Xana', gašje dan' de chia' gwnežjuan' bene' yaše'. Na' dan' ba gwca'a che bene', gwziya'a legaque' cont goseyixjwche' da' zcha'och ca dan' cheyala' yeseyixjue', yonežjwgaca'ne' tap ca'te'le.

<sup>9</sup> Na' Jesúsén' gože'ne':

—Na'aža ba ben Diosén' yela' mban chio' toli tocane len che bene' lo' yo'o chio'. Na' da' li ba naco' xi'in diaža che da' Abraham lagüe dan' ba chejnilažo' Diosén' can' ben da' xoxzta'ocho Abraham. <sup>10</sup> Ca nac neda', gwsela' Diosén' neda' golja' benach cont zedyediljua' note'tez bene' ba mbiayi', na' gwnežjua' legaque' yela' mban toli tocane.

### Jempl che ši bene' bnežjw xangaque' legaque' mechw xen

<sup>11</sup> Na' šlac ne' zjanžag bene' chosozenague' diža' dan' choe' Jesúsén', be'lene' legaque' to jempl, le ba nite' gala'ze Jerusalénna' na' gosacde' la' solaote nabi'e nación Israelen'. <sup>12</sup> Nach gwne':

—To bene' blao gwyeje' to yež zito' jene' dan' cheyala' gone' cont jaxi' lo ne'e nabi'e yež che', le gosebeje'ne' nabi'e yež chen' cate' yežine'. <sup>13</sup> Na' cate' za' se'e, gwleje' ši mos che' na' bnežjue' to toe' mechw xen. Nach gože' legaque': “Mechw nga gonele negosyw šlac bi zoa”. <sup>14</sup> Perw bene' gualaž chen' besegue'ede' le', nach cate' beyož gwze'e, gosesele' bene' lao xane'na' ben' gwnabia'che' lao yogüe', jaseže'ne': “Bitw chaclaže'to' nabia' benga neto.” <sup>15</sup> Perw la'czla' bi gosaclaže' bene' gualaž chen', bia'cze gwxi' lo ne'e nabi'e. Nach cate' bežin lažen' da' yoble, bene' mandadw šja'ac xmoše' bene' ši ca' lagüe'na', bene' ca' bocua'anlene' xmechuen'. Goclaže' nezde' gaca' gosone' gan len mechw dan' bocua'anlene' to toe'. <sup>16</sup> Bene' nechw bžine' lagüen' na' gože'ne': “Xana', xmecho' dan'

bocua'anleno' neda' benen gan ši ca'te'le ca dan' bocua'anon'." <sup>17</sup> Nach xanen' gože'ne': "Ba beno' da' güen. Naco' mos güen. Beno' can' cheyała' gono' len da' daon' bocua'anlena' le', da'nan' gona' cont nabi'o ši ciuda." <sup>18</sup> Na' bene' gwchopen' bžine' lao xanen' na' gože'ne': "Xana', xmecho' dan' bocua'anleno' neda' benen gan gayo' ca'te'le ca dan' bocua'anon'." <sup>19</sup> Nach gože' le': "Le' nabi'o gayo' ciuda." <sup>20</sup> Nach bžin yetoe' lao xane'na' na' gože'ne': "Xana', nga de xmecho' dan' bocua'anleno' neda'. Ba blažechachan' bay nga. <sup>21</sup> Bžeba' le' dan' naco' to bene' znia. Chono' gan da' bi beno' žin na' chelapo' dan' gosaz bene' yoble." <sup>22</sup> Nach gož xanen' le': "Dan' ba gwnao' ca' chlo'en napo' dola'. Naco' mos mal. Chacdo' naca' to bene' znia, na' nezdo' chona' gan da' bi bena' žin na' chelapa' dan' gosaz bene' yoble. <sup>23</sup> Na' še nezdo' chona' ca', čbichen' bi gwlejo' xmechuan' bene' yoble cont yezian' len yichjen na'a ba bela'a?" <sup>24</sup> Nach gože' bene' ca' zjaze cuite'na': "Yeca'ale xmechuan' dan' bocua'anlena'ne' na' gwnežjwlen ben' ba noxe' ši ca'te' ca dan' bocua'anlena'ne'." <sup>25</sup> Nach gose'e le': "Xanto', ba noxe'cze' ši ca'te' ca dan' bocua'anleno'ne'." <sup>26</sup> Nach gož bene' gwnabian' legaque': "Chnia' le'e, ben' chon güen len dan' chnežjua'ne', gwnežjua'ne' da' zcha'och, perw na' bena' bi chgone' žin dan' chnežjua'ne', yeca'a da' daon' noxe'na'. <sup>27</sup> Na' ca' nac bene' ca' chesegue'ede' neda', bene' ca' bi chesaclaže' nabia'gaca'ne', le šjaxi'e na' gotlene' lagua' nga."

### Gosonxene' Jesúsen' cate' beyo'e Jerusalén

(Mt. 21:1-11; Mr. 11:1-11; Jn. 12:12-19)

<sup>28</sup> Na' cate' beyož be' Jesúsen' jempl nga nach gwze'e zeje' ciuda Jerusalén. <sup>29</sup> Na' cate' ba zoa yesežine' yež ca' da' zjanzi' Betfagé na' Betania do gan' zoa ya'a da' nzi' Ya'a Olivos, na' gwsele' chop bene' ca' mandadw ben' zjanaque' le' txen, <sup>30</sup> gože' legaque':

—Le šja'ac yež dan' chi' gała'ze, na' cate' žinlen' na' yeželele to burr dao' da'ba' yag, be nono na' cuia. Le sežba' na' le che'ba' nga. <sup>31</sup> Še no nab bixchen' chsežleba', na' ye'ne': "Xanto' chyažjde'ba'."

<sup>32</sup> Nach bene' ca' gwseła' Jesúsen' gosa'aque' na' besele'ede'ba' da'ba' gan' gož Jesúsen' legaque' ca'. <sup>33</sup> Nach šlac cheseseže'ba', xamba' ca' gose'e legaque':

—čBixchen' chsežle burr daon'?

<sup>34</sup> Nach bene' ca' gwseła' Jesúsen' gose'e legaque':

—Xanton' chyažjde'ba'.

<sup>35</sup> Nach goseche'eba' lao Jesúsen' na' gosexoa xagaque' cože'ban' nach bosožie' Jesúsen'. <sup>36</sup> Na' šlac zeje' ngüe'e nez bene' ca' zjanžag gosonxene'ne', na' goseyixjw no xagaque' lo nez cont blej burron' len.

<sup>37</sup> Nach ba zja'aque' gała'ze Jerusalénna' na' besežine' gan' yesyeyetje' Ya'a Olivos. Na' bene' ca' zja'aclene' le' gwzolao gosonxene' Diosen', žižje

cheso'e diža' che yogo'lol yela' guac da' ba besele'ede' da' ben Jesúsen'.

<sup>38</sup> Nach gosene':

—iMbalaz rey chechon' ben' ba za' nga gwsela' Xancho Diosen' le' cont nabi'e! Cheyala' gonxencho Diosen' txen len bene' ca' nita' gan' zoe'na', le ba bene' cont benachen' gac yesyenite' binlo len le'.

<sup>39</sup> Na' len bene' zan ca' zja'aclene' Jesúsen' zja'ac bal' bene' fariseo.

Nach to chope' gose'e Jesúsen':

—Maestrw, ben mandadw len bene' ca' za'ac len le' txen cont yesenite' šize.

<sup>40</sup> Nach boži'i Jesúsen' xtiža'gaquen', gwne':

—Chnia' le'e, šaca' bene' quinga nite' šize, yej quinga yesosya'an yesonxenen neda'.

<sup>41</sup> Cate' bžine' gala'ze Jerusalénna', gwne'e ciudan', na' bene' xbab che bene' lo' ciudan' na' gwchežyaše', <sup>42</sup> na' gwne':

—Šaca' la'ch na'aža šejni'ile nac gonle cont soale binlo len Diosen', perw na'a ne' ngašen'. <sup>43</sup> Gwžin ža cate' bene' ca' chesegue'ede' le'e yesone' to yež de yej da' šečhjen ciudan' cont nono gac yoxonj. <sup>44</sup> Na' yesote' le'e len xi'inle ca'. Na' yosyočinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

### Jesúsen' bebeje' bene' ca' cheson ya'a yodao' blaon'

(Mt. 21:12-17; Mr. 11:15-19; Jn. 2:13-22)

<sup>45</sup> Jesúsen' gwo'e chyo'o yodao' blaona' na' gwzologüe' bešaše' bene' ca' chesote' na' bene' chesa'o na'. <sup>46</sup> Na' gože' legaue':

—Nyojczy Xtiža' Diosen' žan: “Ližan' naquen to latje gan' yesol güiž bene' neda'”, perw le'e ba benlen ca to latje ga že' bene' gwban.

<sup>47</sup> Na' bsed blo'ede' bene' ca' že' yodao' blaona' yogo' ža. Na' bxož gwnabia' ca' na' bene' ca' chososed chosolo'e dan' bzoj da' Moisésen' na' nochle bene' blao che bene' Israel ca', goseyljwlaže' nacle yesone' yesote'ne'. <sup>48</sup> Perw bi besyeželde' nacle yesone' le' neche yogo' bene' besyebechgüede' xtiže'na'.

### Yela' gwnabia' che Jesúsen'

(Mt. 21:23-27; Mr. 11:27-33)

**20** <sup>1</sup> To ža šlac chsed chlo'e Jesúsen' bene' ca' chyo'o yodao' blaona' na' chyixjue'ede' diža' güen che Diosen', besežin bxož gwnabia' ca' na' len bene' gol ca' chesenabi'e naciónna' na' bene' ca' chososed chosolo'e dan' bzoj da' Moisés. <sup>2</sup> Na' gose'e le':

—Gwnašč neto' bi yela' gwnabia' napo' chono' da' qui, na' no ben yela' gwnabian' cont chonon'.

<sup>3</sup> Na' boži'e xtiža'gaquen', gwne':

—Lecze de to da' nabda' le'e. Le našč neda' <sup>4</sup> čnon' gwsela' da' Juanna' bzoe' bene' nis? ¿Dios nan' gwsele'ne', še benachen'?

<sup>5</sup> Na' legacze' gose' lježe':

—¿Bi n̄acho? Še ye'chone' Dios gwsela' le', na' ye'e chio': “¿Bixchen' ca' gwyejle'le che'?” <sup>6</sup> Na' bi gac ye'chone' benach gwsela' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' yosožie' chio' yej še ye'chone' ca'.

<sup>7</sup> Na' gose'e Jesús'en':

—Bi nezeto' non' gwsela' da' Juan.

<sup>8</sup> Nach Jesús'en' gože' legaque':

—Lecz ca' neda' bi yapa' le'e bi yela' gwnabian' chonlenda' da' ca'.

### Jempl che mos mal ca'

(Mt. 21:33-44; Mr. 12:1-11)

<sup>9</sup> Na' be'e jempl nga bzejni'ide' bene' ca' chosozenag che', gwne':

—To bene' goze' to cue' xen yag uvas na' bocua'anen' lo na' bene' ca' yesonen' žin na' gwze'e gwyeje' zito' na' jasoe' šša. <sup>10</sup> Cate' bžin ža yosyotobe' cosešen', nach gwsela' to xmose' lao bene' ca' nac lo na'gaque' yag uvasen' cont yosyonežjue'ne' to tlaw coseš dan' yesyezi'en. Na' bene' ca' nac lo na'gaque' yag uvasen' goseyine' mosen' na' to ga'alze bosyose'ene' bibi gosone'. <sup>11</sup> Nach xan yežlion' gwsele' yeto mosen', na' lecze gosot goseyine' le' na' gosonde' le' zgot, na' to ga'alze bosyose'ene' bibi gosone'. <sup>12</sup> Na' xan yežlion' gwsela'che' mos gwyone, na' lecze gosotlate'ne' gosone'ne' güe', na' besyebeje'ne' gan' že' yag uvas ca'.

<sup>13</sup> Na' xan yežlion' gwne': “¿Nacxe gona'?” Nach beyone' xbab gwne': “Sela' xi'ina' ben' chacchgüeda', le šeca güesezi'e xtiža' le'.” <sup>14</sup> Perw bene' ca' nac lo na'gaque' yag uvasen' cate' besele'ede' xi'ine'na', gose' lježe': “Benga yega'anlene' yežlio nga cate' gat xe'. Le da gotchone' cont yega'anlenchon.” <sup>15</sup> Nach besyebeje' le' gan' že' yag ca' na' gosote'ne'.

Nach Jesús'en' gwnabde' bene' ca' zjanžaguen':

—¿Nacxe gon xan yežlion' len bene' ca' bocua'anlene' yežlio chen'?

<sup>16</sup> Šje' šjetue' legaque' na' yodie' yežlion' lo na' bene' yoble.

Na' bene' ca' že'na' cate' gosende' diža' quinga dan' be' Jesús'en' gosene':

—iCatec da' mal juisyw dan' goc!

<sup>17</sup> Na' Jesús'en' gwna'chgüe' legaque' na' gwne':

—¿Bixe zejen da' nga nyojen le'e Xtiža' Diosen'? žan:

Yej dan' bi gosaclačže' güen yo'o ca' yosočhine',

len ba naquen yej squin.

<sup>18</sup> Na' ca' nac yejna', note'tez bene' lažo' lo yeja' na' cue'žošje', na' note'tez bene' chiže' yeja' cate' lažon' na' gwšošjen le'.

**Ca nac dan' cheyała' gaxjw**

(Mt. 21:45-46; 22:15-22; Mr. 12:12-17)

<sup>19</sup> Na' bene' ca' chososed chosolo'e dan' bzoj da' Moisés na' bxož gwnabia' ca' la' besyeyiljwlaže'te nacle yesone' yesezene' Jesús'en', le gosacbe'ede' Jesús'en' be'e jemplna' neche dan' bi chesejnilaže' le'. Perw bibi gosone', le besežebe' bi yeson bene' ca' že'na' bene' chesejle'e che Jesús'en'. <sup>20</sup> Da'n'an' gosesele' bene' yosogüia yesene'e Jesús'en' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab do laže'gaque' chosozenague' che'.

<sup>21</sup> Nach gose'e le':

—Maestrw, nezeto' diža' da' cho'o na' da' chsed chlo'edo' bene' zejen to licha. Nezeto' toz can' chono' len note'tez bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. <sup>22</sup> Na' da'n'an' zedenabeto' le' inaquen binlo no chixjo da' cheyała' chixjwcho che ben' nac la'zelagüe bene' gwnabia' ben' chi' Roma, še bi?

<sup>23</sup> Na' gocbe'e Jesús'en' gague do lažen' chese'ene' ca', san chesaclaže' yesagüe' xya che xtižen'. Na' gože' legaque':

—¿Bixchen' chaclaže'le yoslažo'le neda' len xtižan'? <sup>24</sup> Le gwlo'e neda' to mechw. ¿No lao dan' da' le'e mechw nga? na' ¿no la' dan' nyoj le'en ni?

Nach gose'ene':

—Che César ben' nac la'zelagüe bene' gwnabia' ben' chi' ciuda Roma.

<sup>25</sup> Nach gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios dan' nac che Dios.

<sup>26</sup> Na' bi gosezaque'de' yososlažoe' le' len xtižen' lao bene' ca' že'na'. Na' besyebande' can' boži'e xtiža'gaquen', na' bich bi gose'ene'.

**Cate' yesyeban bene' guat ca'**

(Mt. 22:23-33; Mr. 12:18-27)

<sup>27</sup> Na' lecze besežin bał bene' saduceo gan' zoa Jesús'en'. Bene' ca' chesene' bene' guaten' bi yesyebane'. Nach gosenabde' le', gose'ene':

<sup>28</sup> —Maestrw, da' Moisés'en' bzoje' can' cheyała' goncho, gwne' še to bene' byo gate' na' chzeb no'ol chen' perw na' nono bi güezeb chga'an, na' bene' biše' ben' ba gota' cheyała' yošagna'lene' no'ol güezeba' cont yesenita' xi'in diaža che da' bišen'. <sup>29</sup> Na' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. <sup>30</sup> Na' bene' gwchopen' bošagna'lene' no'ol güezeba', na' lecze gote' nono xi'ine' gwnita'. <sup>31</sup> Na' bene' gwyona' lecze bošagna'lene' no'olen', na' lecz ca' goc len le'. Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. <sup>32</sup> Gwde gosat yogo'lol bene' ca', nach got len

no'ola'. <sup>33</sup> Na' cate' yesyebane' ladjo bene' guat ca', ¿nox bene' ca' soalene' no'ola' ca xo'ole'?, le yogo' bene' gaža' bosošagna'lene' le'.

<sup>34</sup> Na' Jesúsen' boži'e xtiža'gaquen', gože' legaque':

—Bene' ca' nita' lo yežlio nga chosošagne'e na' lecze chosošague' na' no xi'ingaque'. <sup>35</sup> Perw na' bene' ca' chaque Diosen' zjzaque' cont yosbane' legaque' ladjo bene' guat ca' cont šjasyenite' len le' toli tocane, caten' yesyežine' gan' zoa Diosen' bich yosošagne'e neca yosonežjo xi'ine' no'ol yosošagne'e. <sup>36</sup> Bich yesate', le yesaque' ca angl ben' že' yaba, na' yesaque' xi'in Dios lagüe dan' ba bosban Diosen' legaque' ladjo bene' guat ca'. <sup>37</sup> Na' lecze da' Moisésen' bzoje' che dan' chesyeban bene' guat ca'. Bzoje' can' gož Diosen' le' caten' bol güiže'ne' to lo yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob. <sup>38</sup> Na' bene' guat ca' bi chesonxene' Diosen', san bene' zjamban. Na' yogo' bene' ba gosejnilaže' Diosen', ne' zjambane' cont chesonxene' le'.

<sup>39</sup> Na' bal bene' chososed chosolo'ede' ley dan' bzoj da' Moisés gose'e Jesúsen':

—Maestrw, binlo boži'o xtiža'gaquen'.

<sup>40</sup> Na' bich besyeyaxjde' bi yesenabde' le'.

### **Criston' naque' xi'in diaža che da' rey David**

(Mt. 22:41-46; Mr. 12:35-37)

<sup>41</sup> Jesúsen' gože' legaque':

—¿Nacxechen' chesena bene' Criston' ben' yedenabi'e naque' xi'in diaža che da' rey David? <sup>42</sup> Cuin Daviden' bzoje' Xtiža' Diosen' le'e libr da' nzi' Salmos, gwne':

Xancho Dios gože' Xanan':

“Gwche'edo' cuita' nga nabia'cho txen,

<sup>43</sup> na' gona' cont yogo' no chesegue'e le' yosozexjw yichje' yosozengue' chio'.”

<sup>44</sup> ¿Nacxe gac nacho Criston' naque' xi'in diaža che da' rey David? le cuin Davin' gože' le': “Xana”.

### **Xtola' bene' ca' chososed chosolo'e dan' bzoj da' Moisésen'**

(Mt. 23:1-36; Mr. 12:38-40; Lc. 11:37-54)

<sup>45</sup> Bene' zan zjanžag chosozenague' cate' gože' bene' ca' zjanaque' le' txen:

<sup>46</sup> —Le gwsaca' cont bi gonle can' cheson bene' ca' chososed chosolo'e ley dan' bzoj da' Moisés. Legaque' chesyebede' chesaše' zjanyaze' lache' ton. Na' chesyebede' chesonxen bene' legaque' cate' chesyěžague' lagüe ya'a. Chesyebede' chesebi'e gan' chesebe' bene' blao cate' chja'aque' yodao' na' cate' chac lni. <sup>47</sup> Na' chesyequ'e yo'o che no'ole güezeb ca'. Na' cate' chosol güiže' Dios, sša cheso'e diža' cont yesaque' bene' leca

chesonxene' Diosen'. Bene' can' chesacche' castigw clél ca yezica'chle bene' güen da' xinj.

**To no'ole güezebe bnežjue' Diosen' xmechue'na'**

(Mr. 12:41-44)

**21** <sup>1</sup> Šlac zoa Jesúsen' chy'o yodao', gwne'e na' ble'ede' bene' gwni'a ca' gosego'o xmechwgaquen' lo' cajen' gan' chesegüe'e mechw che yodaon'. <sup>2</sup> Na' lecze ble'ede' to no'ol güezebe bene' yaše' gwlo'e chop centav dao' che'na'. <sup>3</sup> Nach Jesúsen' gwne':

—Da' li žia' le'e, no'ol güezebe yaše' nga ba gwlo'oché' mechw da' zaca'ch clél ca yogo' bene' ca' yezica'chle. <sup>4</sup> Le yogo' legaque' chesegüe'e da' checho'onen lo yela' gwni'a chegaquen', perw no'ol nga, lo yela' yaše' yela' zi' che' gwlo'e yogo' da' de che', yogo' da' chacbande'.

**Gwžin ža yosyočinje' yodao' blaona'**

(Mt. 24:1-2; Mr. 13:1-2)

<sup>5</sup> Na' bal bene' ca' chesejnilaže' che dan' chsed chlo'e Jesúsen' goso'e diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo bene'. Nach Jesúsen' gwne':

<sup>6</sup> —Ca nac da' quinga chle'ele ngan', žin ža cate' ne to yej dan' zjancua' nga ca yega'an zjancua' cože' lježen. Yogon' yosyočinje'.

**Dan' gac cate' ba za' bagwze yeyož yežlion'**

(Mt. 24:3-28; Mr. 13:3-23)

<sup>7</sup> Na' gosenabde' Jesúsen' gose'ene':

—Maestrw, ¿do bat gac dan' žo' nga? na' ¿nac gac nezeto' cate' ba zoa gac yogo' da' ca'?

<sup>8</sup> Na' gwne':

—Le gwsaca' cont nono siye' le'e. Le bene' zan yesaš yežlio nga bene' yesaclaže' yosolane' xlatja' nga, yesene': “Nedan' Criston' ben' gwlej Diosen' cont nabi'a”, na': “Ba za' gac juisyw.” Perw le'e bitw gwzenagle xtiža'gaquen'. <sup>9</sup> Na' cate' yenele chac gwdile nile na'le o yenele chi' žaš contr bene' ca' chesenabia', bi žeble, le zgua'tec da' quinga cheyala' gac. Perw gague lenna' nacho na'tec na'a yeyož yežlion'.

<sup>10</sup> Nach gože' legaque':

—Na' yesedile to yež len yeto yež yoble na' to nación len yeto nación yoble, <sup>11</sup> na' zan cuen ga xo'chgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e bene' le'e yaban' da' zaca' yesyebande', na' yesežebchgua benachen' neche dan' chac.

<sup>12</sup> Perw za' gac yogo' da' quinga cate' yesezene' le'e na' yosochi yososaque' le'e na' yesone' le'e lo na' bene' gwnabia' che yodao' chelen', na' yeseyixjue' le'e ližya. Na' yeseche'xoxje' le'e do lao rey na' do lao nochle bene' gwnabia' dan' chejnilaže'le neda'. <sup>13</sup> Na' cate' gac da' quinga



güe'le xtiža'na'. <sup>14</sup> Na' le gon xbab zoacza' chaclena' le'e, nach cate' gacle lo na' bene' ca' bi cuec yichjle nacle yoži'ile xtiža'gaquen', <sup>15</sup> le neda' gona' le'e xbab len yela' sina' chian' cont yoži'ile xtiža'gaque' sin cbi bi gac yesene'. <sup>16</sup> Na' balle xaxna'le na' bene' biše'le na' biše' lježle na' bene' migw chele yesechje' yesone' le'e lo na' bene' chesegue'e le'e. Na' yesote' balle. <sup>17</sup> Na' yogo'ze bene' yesegue'ede' le'e dan' chejnilaže'le neda'. <sup>18</sup> Perw chape Diosen' le'e na' bitw güe'e latje cuiayi'le, <sup>19</sup> na' gone' yela' mban chele toli tocañe še soale gwyo gwchejle yogo'loł dan' yesonde' le'e.

<sup>20</sup> Na' cate' le'ele ba besela'ac soldadw zan cue'ej cuit Jerusalénna' ben' yesedillen le'e, canan' nezele ba zoa cuiayi' ciudan'. <sup>21</sup> Cana' bene' yesenita' Jerusalén cheyala' yosoxonje'. Na' bene' že' yezica'chle yež ga mbane Judea cheyala' šja'aque' do ya'adao'. Na' bene' yesenita' yixe', bi cheyala' yesone' xbab yesyeyo'e lo' ciuda. <sup>22</sup> Cana' gwnežjo Diosen' castigw che xtoła' bene' ca' že' Judean', cont gac can' nyojen le'e Xtiža' Diosen'. <sup>23</sup> iNyaše' zjanac no'ol ca' zjanao' xi'in na' no'ol ca' ne' chosoguaže' bidao' lo ža ca'! Leca yesesaca'zi bene' ca' že' doxen Judean', le Diosen' ža'achgüe' legaque'. <sup>24</sup> Soldadw ca' yesote' bale' lo gwdile na' yebale' yeseche'xoxje' nación ca' dan' zjachi' doxen yežlion'. Na' bene' ca' bi zjanaque' bene' Israel yosyočinje' yo'o ca' dan' že' Jerusalénna' na' yosolej yosošojen'. Perw ba bžia' Diosen' bia' žin ža cate' bene' ca' bi zjanaque' bene' Israel bich yesenabi'e nación Israel.

### Yid Jesucriston' da' yoble

(Mt. 24:29-35, 42-44; Mr. 13:24-37)

<sup>25</sup> Ca nac gwbiž, bio' na' beljw ca', gac da' yebanecho len legaquen. Na' bene' že' yežlion' yesaque' tole na' yesacžejlaže' catec sšag gon nisdaon' chas chata' gaquen. <sup>26</sup> Na' bene' že' yežlio nga yesatte' šlat yesežebchgüe' dan' gaquen, le yogo' da' chle'echo le'e yaban' yesaquen ca' chac yežlion' cate' chxo'. <sup>27</sup> Na' cana'ch bene' že' yežlion' yesele'ede' neda' naca' ben' gwsela' Dios golja benach, za'a to lo' bejw len yela' guac xen na' yela' bene' zaca' juisyw chia'. <sup>28</sup> Na' cate' solao gac da' quinga, le gonchach laže'le na' le yebe. Ba zoa žin ža yida' da' yoble yebeja' le'e lo da' malen'.

<sup>29</sup> Na' Jesús'en' be'lene' legaque' to jempl, na' gože' legaque':

—Le na'šc can' chon yag yixgüigw na' bite'teze yag yoble, <sup>30</sup> cate' chle'ele ba chebian laga' che'en' dao' nach nezele bach zoa yela' tiemp ba. <sup>31</sup> Ca'czen' cate' le'ele ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

<sup>32</sup> Da' li žia' le'e, bina' yenit diaža' che le'e nita'le na'a cate' yeyož gac yogo'loł da' ca'. <sup>33</sup> Le'e yaba na' yežlion' yesede' chen, perw ca' nac xtižan', gague da' te cbi gac can' žanna'.

<sup>34</sup> Na' le gon xbab cont bi gacle bene' lia na' bene' borrašw na' cont bi soale yela<sub>l</sub> yežejele. Bene' ca' yesac bene' lia na' borrašw na' bene' ca' yesyela<sub>l</sub> yesyežejde' bi yesebeze' batcan' gac yogo' da' quinga. <sup>35</sup> Na' toz can' gac che bene' že' doxen yežlion', yesac yogo' da' quinga cate' nono chon xbab. <sup>36</sup> Perw yogo' ža le soa le cuez batcan' gac da' quinga na' le yo<sub>l</sub> güiž Diosen' cont bibi gac chele na' gac yedyesoale len neda' naca' ben' gwse<sub>l</sub>a' Diosen' golja' ben<sub>ach</sub>.

<sup>37</sup> Yogo' ža gwzoa Jesúsen' bsd blo'ede' bene' yodao' blao, na' yogo' že' beyeje' lo ya'a da' nzi' Ya'a Olivos. <sup>38</sup> Na' yogo' zil besežin bene' zan bosozenague' che' šlac bsd blo'ede' legaque' chyo'o yodao' blao.

### Bosoxi'e cont yesezene' Jesúsen'

(Mt. 26:1-5, 14-16; Mr. 14:1-2, 10-11; Jn. 11:45-53)

**22** <sup>1</sup> Na' ba zoa ga<sub>l</sub>a' l<sub>ni</sub> pascw caten' chesagüe' yetextil da' bibi levadura yo'on. <sup>2</sup> Na' b<sub>x</sub>oz gwnabia' ca' na' bene' ca' chososed chosolo'e ley dan' bzoj da' Moisésen' besejiljue' nacle yesone' na' bi da' yosode'ede' cont yesezene' Jesúsen' na' yesote'ne', le besežebe' še cate' bi yesone yezica'chle bene' legaque'.

<sup>3</sup> Nach Satanásen' dan' chnabia' da' xigüe' ca' gwyo'o gwyazen lo' yichjlaždao' Judas Iscarioten' ben' goque' txen len bene' šižinw ca' zjanaque' Jesúsen' txen, <sup>4</sup> na' gwyeje' jan'e b<sub>x</sub>oz gwnabia' ca' na' bene' gwnabia' che bene' ca' chesape' yodao'na' cont bosoxi'e nacle gone' gwdie' Jesúsen' lo na'gaque'. <sup>5</sup> Na' leca besyebede' na' gose'e le' yosonežjue'ne' mechw. <sup>6</sup> Na' Judasen' gw<sub>x</sub>enlaže' len legaque', na' gwzola<sub>g</sub>üe' gw<sub>d</sub>iljwlaže' nacle gone' gwdie' Jesúsen' lo na'gaquen' cate' bi že' bene' zan.

### Jesúsen' blo'ede' legaque' can' cheya<sub>l</sub>a' yesone' šjasyeza'laže' dan' gaten'

(Mt. 26:17-29; Mr. 14:12-25; Jn. 13:21-30; I Co. 11:23-26)

<sup>7</sup> Na' bžin ža ga<sub>l</sub>a' l<sub>ni</sub> caten' chesagüe' yetextil dan' bibi levadura yo'o. Naquen ža cate' chesote' xila' dao' cont šjasyeza'laže' can' bosla Diosen' da' xozxta'ogaquen' lo na' bene' Egipto ca'. <sup>8</sup> Na' Jesúsen' gwleje' Pedroa' len Juanna' na' gože' legaque':

—Le šja'ac na' le šjasin<sub>i</sub>'a dan' gagwcho lo l<sub>ni</sub>n'.

<sup>9</sup> Na' gose'ene':

—¿Ga che'ndo' šjasin<sub>i</sub>'ato'?

<sup>10</sup> Nach gože' legaque':

—Le šja'ac na' cate' ba gwyo'ole ciudan' na' yežagle to bene' byo no'e to che'e nis. Na' šejlen<sub>l</sub>ne' na' gan' yežinen' <sup>11</sup> le ye' x<sub>an</sub> yo'on': “Maestron' že': Gonšco' to yo'o ga gagua' xše' že' l<sub>ni</sub> nga len bene' ca' zjanaque' neda' txen.” <sup>12</sup> Nach gwlo'ede' le'e to cuart xen dan' zoa yichjen na'ale gan' de yogo' da' chyažjecho. Na' le gwsin<sub>i</sub>'a cont gagwcho na'.

<sup>13</sup> Na' gosa'aque' na' yogo' can' gož Jesúsen' legaque' goc. Nach bososini'e xše' že' l̄ina'.

<sup>14</sup> Na' cate' bach gwchi'e cho'a mesen' len postlw che' ca', <sup>15</sup> na' gože' legaque':

—Leca gwzelaža' gagua' yela' guagw che l̄ni nga len le'e na'a za' saca'zi'a na' gata'. <sup>16</sup> Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

<sup>17</sup> Na' gwxi'e vas gan' yože nis uvasen', na' beyož be'e yela' choxc̄len che Dios, nach gwne':

—Le sin', na' le ye'ej yogo'le late' güeje dan' yože lo' vas nga. <sup>18</sup> Chnia' le'e na'a zelao che'aja' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

<sup>19</sup> Nach gwxi'e yetextilen' na' be'e yela' choxc̄len che Diosen' na' bzojxen' na' bnežjuen' legaque'. Na' gože' legaque':

—Da' nga cuerp chia' chzanlaža' neche le'e. Quinga gonle cont šjayze'ele bi zejen len le'e dan' yesote' neda'.

<sup>20</sup> Na' lecze bexue' vassen' cate' ba beyož gosagüe' xšen' na' gože' legaque':

—Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gwlaļj xchenan' neche le'e.

<sup>21</sup> Na' da' li ben' gwdie' neda' lo na' bene' ca' chesegue'e neda' nga chagwlene' neda' txen. <sup>22</sup> Na' gac chia' can' nžia bia' gac, neda' naca' bena' gwsela' Diosen' golja' benach, perw nyaše'chguaze nac ben' gwdie' neda' lo na' bene' ca'.

<sup>23</sup> Nach gosezolagüe' gosenabe lježgaque' noen' gon da' malen' nac ca'.

### Gosacyože' noe' nacch blao

<sup>24</sup> Na' lecze gosezolagüe' gosacyože' noe' nacch blao. <sup>25</sup> Na' Jesúsen' gože' legaque':

—Nita' bene' gwnabia' che to to nación ca' na' chesone' byen chosozenag bene' chegaque', na' bene' gwnabia' ca' chesaclaže' yesoe' bene' diža' chegaque' zjanaque' bene' güenchgua. <sup>26</sup> Perw le'e gague can' cheyala' gonle. Še no le'e nacchle bene' blao, cheyala' gwzexjwlaže'le len bene' lježle na' gonle ca' bene' xcuide' ben' bibi na' neze. Na' še no le'e chnabia'le, cheyala' soale gaclen lježle. <sup>27</sup> Le gon xbab noe' nacch bene' blao, še bena' chi' cho'a mesen' o še xmosen' ben' chon mandadw che'. Nacbia'cze ben' chi' cho'a mesen' naccze' bene' blaoch. Perw neda', zoa' cont gaclena' le'e la'cze naca' Xanle.

<sup>28</sup> Le'e bina' cuejyichjle neda' la'czla' bene' zan ba chesegue'ede' neda'.

<sup>29</sup> Na' ca' nac Xan' ba none' chia' cont nabi'a txen len le', lecze neda' ba nona' chele cont nabi'a'le txen len neda'. <sup>30</sup> Na' gona' cont ye'ej gagwle

txen len neda' cate' yela'le gan' nabi'a, na' cue'le cuita'na' nabia'le šižinw  
cuen bene' ca' zjanaque' xi'in diaža che da' Israel.

**Jesúsen' gwne' Pedroa' bi chebe' še nombi'e le'**

(Mt. 26:31-35; Mr. 14:27-31; Jn. 13:36-38)

<sup>31</sup> Nach Jesúsen' gwne':

—Simón, ben xbab chio', Satanásen' dan' chnabia' da' xigüe' ca' ba  
gwñaben gaco' lo ne'en cont gonen cuejyichjo' bich šejnilažo' neda'. Na'  
dan' gonen len le' naquen ca dan' chon bene' caten' chdie' trigon' lo' rner.

<sup>32</sup> Perw na' neda' ba gwñaba' gaclen Diosen' le' cont bi cuejyichjo' dan'  
chejnilažo' neda'. Na' cate' ba betinjdo' xto'lo'na', gono' chach laže' bene'  
lježo' quinga.

<sup>33</sup> Nach Pedroa' gože'ne':

—Ba bechoglaža' sa'alena' le', gague ližya na'ze, san gatlencza' le'.

<sup>34</sup> Na' Jesúsen' gože'ne':

—Pedro, žia' le', bina' cuež jean' na'aže' cate' gac šon ni'a bi chchebo'  
še nombi'o neda'.

**Gwne' ba zoa yosoči yososaca' bene' legaque'**

<sup>35</sup> Na' gože' bene' ca' zjanaque' le' txen:

—¿Byažjele bi da' byažjele cate' gwse'la' le'e jatixjue'ele xtiža'na'?  
Gwse'la' le'e sin cbi bia'le mechw, ne bzod, na' neca bia'le xelle.

Na' gose'ene':

—Bitw bi byažjeto'.

<sup>36</sup> Na' gože' legaque':

—Perw na'a še naple mechw, cheya'la' gua'len, na' lecze ca' gua'le  
bzod. Na' še bitw bi spada chele de, le gote' xadon chelen' cont si'le to  
spada. <sup>37</sup> Chnia' le'e gonle ca', le gac chia' can' nyojzen le'e Xtiža' Diosen'  
žan: “Gosone'ne' ca' bene' güen da' xinj.” Na' cheya'la' gac yogo'lo' dan'  
nyojen.

<sup>38</sup> Nach gose'ene':

—Xanto', gwña'sc nga noa'to' chope spada.

Na' gože' legaque':

—Güesaqueczen.

**Jesúsen' chol güiže' Diosen' latje gan' nzi' Getsemaní**

(Mt. 26:36-46; Mr. 14:32-42)

<sup>39</sup> Nach gwze'e gweje' Ya'a Olivos can' ba yolagüe' chone', na' bene'  
ca' zjanaque' le' txen zjana'ogüe' le'. <sup>40</sup> Nach cate' besyežine' latjen' na'  
gože' legaque':

—Le yol güiž Dios cont bi gon gwxiyen' le'e gan.

<sup>41</sup> Na' gwle'e len legaque' zito' ca gan' zelao žin to yej da' gwzala'cho,  
na' bzoa xibe' na' bol güiže' Dios, <sup>42</sup> gwne':

—Xa', benšca cont bi saca'zi'a na' bi yesote'nda' še ca' chazlažo', perw bi chnaba' gac da' žia' neda', san gac can' nao' le'.

<sup>43</sup> Na' to angl bene' za' yaba blo'elagüe' le' na' be'e le' fuerz valor. <sup>44</sup> Na' šlac chžaglaochgüe' len yichjlažda'ogüe'na' gwzolao chžaglaoch' chol güiže' Diosen' beyačlojite' yes. Na' nis yes che'na' beyaquen ca' tlabā' güeje chen dan' zjanaquen chelson, besyeyinjten lo yo. <sup>45</sup> Na' bezeche', na' beyeje' gan' nita' bene' ca' zjanaque' le' txen, ble'ede' zjanite' chesetase' dan' leca gosacyaše'chgüede'. <sup>46</sup> Na' gože' legaque':

—¿Bixchen' chtasle? Le chas, le yol güiž Dios cont bi gon gwxiyen' le'e gan.

### Gosezene' Jesúsen'

(Mt. 26:47-56; Mr. 14:43-50; Jn. 18:2-11)

<sup>47</sup> Ne' choe'te Jesúsen' diža' cate' besežin bene' zan gała'ze gan' zoen'. Na' ben' le' Judas, ben' goque' txen len bene' šižinw ca' gwlej Jesúsen' cont zjanaque' le' txen, žialagüe' laogaque'. Na' gwbigue' gan' zoa Jesúsen' na' bnope' xague', perw gague do lažen' bene' ca'. <sup>48</sup> Na' Jesúsen' gože' le':

—Judas, ¿chnopo' neda' cont gw dio'nda' lo na' bene' quinga? neda' naca' bena' gwseła' Diosen' golja' benačh.

<sup>49</sup> Na' cate' bene' ca' zjanaque' Jesúsen' txen besele'ede' can' gac che'na' nach gose'ene':

—Xanto', ¿gwyinto' bene' quinga spada cheton'?

<sup>50</sup> Na' toe' gw dinen' mos che bxož blaon', gwchogtechgüe' nague' licha. <sup>51</sup> Perw Jesúsen' gože'ne':

—Bich gonle ca'.

Nach gw dane' nag mosen' na' beyone' le'. <sup>52</sup> Jesúsen' gože' bxož gwnabia' ca' na' bene' ca' chesenabi'e bene' ca' chesape' yodao', na' bene' gole blao ca' chesenabia' nación Israelen' ben' zja'ac zjasexi'e le', gože'ne':

—¿Bixchen' nonle neda' ca to bene' gwban za'acle zedexi'le neda' len spada na' len yag? <sup>53</sup> Yogo' žaze gwzao' len le'e chyo'o yodao' blaon' na' bitw gwzenle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásen' dan' chnabia' bene' ca' chesaš lo cholen'.

### Pedroa' bi gwchebe' še nombi'e Jesúsen'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Nach gosoxe' Jesúsen' na' goseche'ene' liž ben' naque' bxož blao che nación Israelen'. Nach Pedroa' na'ogüe' Jesúsen' zito' zito'le. <sup>55</sup> Na' bosoxene' yi' chyo'o che bxož blaona' na' gosebi'e cho'a yi'na'. Na' gwche' Pedroa' len legaque'. <sup>56</sup> Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len bengā naque' txen len Jesúsen'.

<sup>57</sup> Perw Pedroa' bitw gwchebe' še nombi'e Jesúsen'. Gože'ne':

—No'ole, bitw nombi'ane'.

<sup>58</sup> Na' gocze šlož, yeto bene' ble'ede' Pedroa' gože'ne':

—Lenczo' naco' txen len bene' ca'.

Na' Pedroa' gože'ne':

—Bitw lena' len legaque'.

<sup>59</sup> Gwde to hor yetoe' gwne':

—Da' licze nac benga txen len Jesúsen', le naque' bene' Galilea.

<sup>60</sup> Na' Pedroa' gože'ne':

—Bene', bi nezda' bi dižan' cho'o.

Na' ne' choe'te Pedroa' dižan' ca', gwchež to jea. <sup>61</sup> Na' Xancho Jesúsen' gwyečhje' gwne'e Pedroa' na' jayze'e Pedroa' diža' dan' gož Xanchon' le' caten' gwne': “Bina' cuež jean' na'aže' cate' gac šone ni'a bi chebo' še nombi'o neda'.” <sup>62</sup> Na' Pedroa' beze'e leca gwchežyaše'.

### Gosezi'diže' Jesúsen'

(Mt. 26:67-68; Mr. 14:65)

<sup>63</sup> Na' bene' ca' goseche'e Jesúsen' gosezi'diže' le', na' gosot goseyine' le'. <sup>64</sup> Na' bosocheje' to lache' lao Jesúsen' na' goseyine' le' na' gose'ene':

—Gwneya'ašč non' chyin le'.

<sup>65</sup> Na' zanch diža' da' gosene' gosezi'diže' Jesúsen'.

### Goseche'e Jesúsen' lao bene' ca' chesenabia' nación Israelen'

(Mt. 26:59-66; Mr. 14:55-64; Jn. 18:19-24)

<sup>66</sup> Na' cate' gwyeni', bene' gole blao ca' chesenabia' nación Israelen' na' bxoz gwnabia' ca' na' bene' ca' chososed chosolo'e ley dan' bzoj da' Moisés besežague' na' gosone' mandadw gwyej Jesúsen' laogaque' gan' chesenabi'ena', nach gose'ene':

<sup>67</sup> —Gwnašč neto' še le' naco' ben' gwlej Diosen' cont nabi'o nación chechon'.

Nach gože' legaque':

—Šaca' nia' le'e neda' naca' Criston' ben' gwlej Diosen' cont nabia' nación chechon', bitw šejle'le chia'. <sup>68</sup> Na' šaca' bi nabda' le'e, neca yoži'ile xtižan', neca gwsanlenda. <sup>69</sup> Neda' naca' ben' gwsela' Diosen' golja' benach. Na' na'a cui'a cuit Diosen' nabi'a txen len le', Dios ben' chnabia' doxen.

<sup>70</sup> Nach yogüe' yose'ene':

—¿Len' naco' dogualje Xi'in Diosen'?

Na' gože' legaque':

—Le can' žale nan' naca'.

<sup>71</sup> Na' gosene':

—iNoch no chyažje no gagw xya che! Chio' ba benecho na'a chne' che Diosen' dan' že' ca'.

**Bosocuiše' Jesúsen' lao Pilaton'***(Mt. 27:1-2, 11-14; Mr. 15:1-5; Jn. 18:28-38)*

**23** <sup>1</sup> Na' yogo'lo<sub>l</sub> bene' ca' gosezože'e na' goseche'ene' lao Pilaton' ben' nac gobernador. <sup>2</sup> Na' gwzola<sub>o</sub> bosocuiše' Jesúsen' gosene':  
 —Ba gwchoglaoto' che benga cheyala' gate' dan' chde' chgo'oye<sub>l</sub>e' nación Israelen' cont yesej<sub>l</sub>e'e che' na' lecze chžone' chixjwto' da' cheyala' chixjwto' lao rey César. Na' lecze že' len' naque' Criston' ben' gwlej Diosen' cont nabi'e nación cheton'.  
<sup>3</sup> Nach Pilaton' gwnabde'ne' gože'ne':  
 —¿Len' naco' rey che bene' Israel?  
 Nach Jesúsen' boži'e xtižen', gwne':  
 —Can' gwnao'na', can' naquen.  
<sup>4</sup> Nach Pilaton' gože' b<sub>x</sub>oz ca' len yogo'lo<sub>l</sub> bene' ca' zjanžag lagüe'na':  
 —Bibi n<sub>l</sub>a'lagüe' še bi do<sub>l</sub>a' nap benga.  
<sup>5</sup> Perw na' goseneche', gosene':  
 —Chde' chgo'oye<sub>l</sub>e' yogo' bene' že' distritw Judea nga yesej<sub>l</sub>e'e dan' chsed chlo'ede'. Gwzolaogüe' bsed blo'ede' distritw Galilean' perw lencze nga ba<sub>h</sub> chsed chlo'ede' na'a.

**Pilaton' gwse<sub>l</sub>e' Jesúsen' lao Herodes**

<sup>6</sup> Cate' bene Pilaton' can gosene', nach gwnabe' še Jesúsen' naque' bene' Galilea. <sup>7</sup> Na' cate' gocbe'ede' Jesúsen' ze'e Galilean' gan' chnabia' gobernador Herodes, na' gwse<sub>l</sub>e'ne' lao Herodes, le ca hora' zoa Herodes Jerusalénna'. <sup>8</sup> Cate' Herodes ble'ede' le' bebede', le ba goc sša che'nde' le'ede' le'. Ba bende' xtiža' Jesúsen' na' zoe' lez le'ede' gone' to da' zaca' yebande'. <sup>9</sup> Nach da' zan da' gwnabde' Jesúsen', perw ne to xtižen' ca boži'i Jesúsen'. <sup>10</sup> B<sub>x</sub>oz gwnabia' ca' na' bene' ca' chososed chosolo'e ley dan' bzoj da' Moisés gosezeche' ga<sub>l</sub>a'ze na' bosocuiše'ne' len zan diža'. <sup>11</sup> Na' Herodes len zan soldadw che' ca' gosezolaogüe' gosezi'diže'ne' na' goson<sub>l</sub>e' che'. Nach cate' beyož bosoguacue'ne' to lache' xdan juisyw, gosesel<sub>l</sub>e'ne' da' yoble lao Pilaton'. <sup>12</sup> Na' žana' Pilaton' len Herodes gwzola<sub>o</sub> gosaque' migw, la'cz<sub>l</sub>a' cate' za' gac ca' besegue'e lježe'.

**Gosechoglagüen' gat Jesúsen'***(Mt. 27:15-26; Mr. 15:6-15; Jn. 18:39 - 19:16)*

<sup>13</sup> Nach Pilaton' botobe' b<sub>x</sub>oz gwnabia' ca' na' bene' ca' chesenabia' nación Israelen' len yezan bene' yež, gan' chesone' ye<sub>l</sub>a' justisen'. <sup>14</sup> Nach gože' lega<sub>q</sub>ue':  
 —Le'e bedesan<sub>l</sub>e benga lagua' nga, na' gwnale chde' chgo'oye<sub>l</sub>e' bene' Israelen' yesone' contr gobiernna'. Neda' ba<sub>h</sub> gwnabyožda'ne' lao le'e ca xyan' dan' chagwle che', ne to da' xin<sub>j</sub> ca chželda' še bi dan' none'. <sup>15</sup> Na' lecze ca' Herodes bitw bi xto<sub>l</sub>e' bželde', na' bese<sub>l</sub>e' le' laoto' nga. Na'

nacbia' bibi ben benga da' cheyala' gate'. <sup>16</sup> Na' na'a con gona' mandadw yeseyine' le' na' gwsana'ne'.

<sup>17</sup> Gwne' ca', le yogüiz chsane' to bene' pres lo lni pascw chegaque'.

<sup>18</sup> Na' yogo' bene' ca' že' bososye'e toz ca gosene':

—Chojtega benga gate' na' gwsano' Barrabásen'.

<sup>19</sup> Na' Barrabásen' goseyixjue'ne' ližya da' bxie' gwdile lo' ciudan' na' goque' to bene' güet bene'. <sup>20</sup> Na' da' yoble Pilaton' gwnabde' legaque' še gwsane' Jesúsen', <sup>21</sup> perw bososye'e zižzech gosene':

—iBde'e le'e yag cruz! iBde'e le'e yag cruz!

<sup>22</sup> Da' gwyon ni'a gož Pilaton' legaque':

—¿Bixe da' xinj nonen'? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

<sup>23</sup> Perw gosone' byen bososye'e yelate' zižzech gosenabe' gwde'ene' le'e yag cruz. Nach Pilaton' bzenague' chegaquen' <sup>24</sup> na' gwchoglagüe' che' gac can' gosenabde' le'. <sup>25</sup> Nach bsane' Barrabás ben' zjanyixjue' ližyan', ben' gosenabe' gwsane', la'czla' Barrabásna' goque' ben' bxie' gwdile na' bene' güet bene'. Na' Pilaton' bodie' Jesúsen' lo na'gaque' cont yesone' len le' ca chesaclaže'.

### Bosode'e Jesúsen' le'e yag cruz

(Mt. 27:32-44; Mr. 15:21-32; Jn. 19:17-27)

<sup>26</sup> Na' šlac zjanche'ene' gan' yesote'ne' besyežague' to bene' yež Cirene le' Simón, za' zeze'e yixe'. Na' bosogüe'ene' yag cruz che Jesúsen' na' gwyeje' gwda'ogüe' Jesúsen'.

<sup>27</sup> Na' bene' zan zjana'ogüe' le' na' zjalen zan no'ole. Na' no'ol ca' gwzolao bososye'e gosebeže' che'. <sup>28</sup> Na' Jesúsen' gwychje' na' gože' legaque':

—No'ole Jerusalén, bitw cuežle chia'. Yejni'a le cuež chele na' che xi'ñle. <sup>29</sup> Da' li gwžin ža cate' yesene': “Mbalaz nita' no'ole güiž no'ole cono gwxa' na' nono bguaže'.” <sup>30</sup> Cana' yesenablaže' yesebixe ya'a ca' cont chenen legaque'. Yesenablaže' che' bdiñj goten legaque'. <sup>31</sup> Še yesot bene' neda' len bibi xtoła' de, inacchxe yesonde' le'e nacle bene' güen da' xinj!

<sup>32</sup> Na' lecze goseche'e chop bene' güen da' xinj cont bosode'e legaque' le'e yag cruz can' gosone' len Jesúsen'. <sup>33</sup> Na' cate' besežine' latje gan' nzi' Latje che Žit Yichj Bene' Guat, bosode'e Jesúsen' le'e yag cruzen'. Na' lecze bosode'e bene' mal ca' chop le'e yag cruzen' len le', toe' gwda' cuit Jesúsen' licha, na' yetoe' gwda' cuiten' robes. <sup>34</sup> Na' Jesúsen' gwne':

—Xa', bezi'xen che bene' quinga chesegue'ede' neda'. Gague zjanezde' bin' chesone'.

Na' gosone' rifa cate' besyele'e xalane' cont gota'bia' noe' yechelen.

<sup>35</sup> Na' bene' zan besyežejde' le'. Na' bene' gwnabia' chegaque' ca' gosonle' che', gosene':



—Yezica'chle bene' bosle'. Še da' li naque' Criston' ben' gwlej Diosen' yedenabi'e, ¿bixchen' bi chosla cuine'?

<sup>36</sup> Nach soldadw ca' lecz ca' gosonle' che'. Gosebigue' gala'ze gan' zoa yag cruzen' na' bosonežjue'ne' vino zichj. <sup>37</sup> Nach gosene':

—Še len' naco' rey che bene' Israel, bosla cuino'.

<sup>38</sup> Na' yichj yag cruz che'na' gwzoa to dan' nyojen, žan: “Bengan' rey che bene' Israel.” Na' byojen diža' griego, diža' latín na' diža' hebreo.

<sup>39</sup> Na' to bene' mal ben' da' le'e yag cruz cuit Jesúsen' lecze gwzi'diže'ne', gože'ne':

—Še le' naco' ben' gwlej Diosen' cont yedenabi'o nación chechon', bosla cuino' na' lecze bosla neto'.

<sup>40</sup> Na' ben' yeto gwdile' bene' lježen' gože'ne':

—¿Bi chžebo' Diosen'? Chio' ba da'cho le'e yag cruz cont gatcho can' da' le', <sup>41</sup> na' dan' gat chio' naquen licha cont si'cho castigw che xtoła'chon'. Perw benga, bitw bi doła' nape'.

<sup>42</sup> Nach gože' Jesúsen':

—Jesús, šjayza'laže'go' neda' cate' žin ža nabi'o.

<sup>43</sup> Na' gož Jesúsen' le':

—Da' li chnia' le', na'aža soaczo' len neda' gan' zoa Diosen'.

### Can' goc caten' got Jesúsen'

(Mt. 27:45-56; Mr. 15:33-41; Jn.19:28-30)

<sup>44</sup> Na' cate' bžin guagwbiž goc chol doxen lo yežlion' bžinte do cheda šone. <sup>45</sup> Bitw bseni' gwbižen'. Na' ca nac lache' dan' ze lo' yodao' blaona', bcheza' gacholen. <sup>46</sup> Nach Jesúsen' bosye'e zižje gwne':

—Xa', chon cuina' lo nao', bezi' spiritw chia'na'.

Na' beyož gwne' ca' gote'.

<sup>47</sup> Na' cate' ble'e xan soldadon' can' goquen', benxene' Diosen' na' gwne':

—Da' licze benga goque' bene' gwyej to licha.

<sup>48</sup> Na' bene' zan bene' besežag besele'ede' can' goc na' yogo'lóle' besyeya'aque' chesebaže' lcho'e gosacde' da' juisyw ba goc. <sup>49</sup> Na' yogo' bene' ca' zjanombia' Jesúsen', na' len no'ol ca' zjanao' le' caten' beze'e Galilean', gosezeche' zito'le besele'ede' da' ca' goquen'.

### Bosocuaše' Jesúsen'

(Mt. 27:57-61; Mr. 15:42-47; Jn. 19:38-42)

<sup>50</sup> Na' zoa to bene' ciuda Arimatea gan' mbane Judean' na' le' José. Naque' txen len bene' ca' chesenabia' nación Israel, na' naque' to bene' güen bene' zej to licha. <sup>51</sup> Ba zoe' chbeze' batcan' solao nabia' ben' sela' Diosen'. Bitw bene' txen len bene' ca' gosechoglagüen' yesote' Jesúsen'. <sup>52</sup> Bena' gwyeje' lao Pilaton' jaynabe' cuerp che Jesúsen'. <sup>53</sup> Na' beletje'ne' le'e yag cruzen' na' btobe' le' to lache' xen na' la' bcuaše'te' le' to lo' bloj

da' nche'ene' le'e yej. Na' naquen to ba cobe ga nono na' yosocuaše'.

<sup>54</sup> Na' yogo' da' ca' goc ža cate' chososiñi'e che ža che Dios. Na' ba bžin hor cate' cheyała' yosocueze' bite'teze žin o mandadw da' chesone'.

<sup>55</sup> Na' no'ol ca' za'aclene' Jesúsen' cate' gwze'e distritw Galilean' ja'aclene' Josén' cont besele'ede' ba che Jesúsen' gan' gwxa cuerp che'na'. <sup>56</sup> Nach gosa'aque' na' gosone' to da' chla' zix da' yeseyebe' cuerp che Jesúsen'. Na' ža che Diosen' gosenita'cze can' ža ley chegaquen', bibi žin gosone'.

### Jesúsen' bebane' ladjo bene' guat

(Mt. 28:1-10; Mr. 16:1-8; Jn. 20:1-10)

**24** <sup>1</sup> Bał dmigw ja'ac no'ol ca' da' yoble cho'a bloj gan' bosocuaše' Jesúsen' na' gosoxe' da' ca' ba gosone' da' chla' zix, na' yebał no'ole ja'aclene' legaque'. <sup>2</sup> Na' cate' besežine' na' besele'ede' ba bga'a yejen' dan' bosode'e cho'a blojen'. <sup>3</sup> Na' goso'e, na' bitw besyeželde' cuerp che Xancho Jesúsen'. <sup>4</sup> Šlac zjanite' chesyebande' che da' quinga, besele'ede' chope bene' zjazecha cuitgaquen' zjanyaze' lache' da' chactitchgua. <sup>5</sup> Na' no'ol ca' besežebe' na' bosocheque' yichjgaquen' gosene'e lo yole. Nach bene' ca' gose'e no'ol ca':

—¿Bixchen' cheyiljwle to bene' mban nga ladjo bene' guat? <sup>6</sup> Notoch no nla' nga. Ba bebane' ladjo bene' guat na' mbancze'. Le šjayza'laže' can' gwne' cate' ne' zoale Galilean'. <sup>7</sup> Gwne' le' naque' ben' gwsela' Diosen' golje' benach. Na' gwne' cheyała' gaque' lo na' bene' mal ca' cont yesote' le' yosode'ene' le'e yag cruz, na' yeyon ža yebane' ladjo bene' guat.

<sup>8</sup> Na' no'ol ca' jasyeze'ede' xtiže'na'. <sup>9</sup> Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle bene' ca' nita' txen len legaque'. <sup>10</sup> Na' no'ol ca' jasedixjue'ede' postlw ca' zjanaque' bene' quinga: María bene' Magdala, na' Juana, na' María xna' Jacobo, na' len yebałe no'ole. <sup>11</sup> Na' postlw ca' bitw gosejle'e che no'ol ca', gosacde' chesenazen'.

<sup>12</sup> Perw na' Pedroa' la' gwzoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo yo. Na' beze'e bebanchgüede' che da' ca' ble'ede'.

### Blo'elao Jesúsen' chop bene' ca' šlac zja'aque' Emaús

(Mr. 16:12-13)

<sup>13</sup> Na' lecze ža dmigwna' chop bene' ca' gosaque' Jesúsen' txen ja'aque' yež dan' nzi' Emaús, do šnej mil metr zito' par Jerusalénna'. <sup>14</sup> Na' legacze' bosošalje' che yogo' da' ca' ba goquen'. <sup>15</sup> Ne' chesone' xbab na' ne' chesoete' diža' chen cate' Jesúsen' gwbigue' len legaque' na' gwza'lene' legaque' txen, <sup>16</sup> perw bitw gosacbe'ede' noxen' zejlen legaque'. <sup>17</sup> Nach gože' legaque':

—¿Bi dižan' choe'le šlac ngo'ole nezen'? ¿Bixchen' chacyaše'le?

<sup>18</sup> Na' toe' le' Cleofas boži'e xtižen' gože'ne':

—¿Nacxe chaquen' gwza'o Jerusalén na' bina' gacbe'edo' da' ca' ba goc lo' ciudan'? iTozo' le' zo' Jerusalén na' bina' gacbe'edo'!

<sup>19</sup> Na' Jesús'en' gože' legaque':

—¿Bi goquen' žale ca'?

Nach gose'ene':

—Dan' goc che Jesús bene' Nazaret. Goque' to bene' gwsela' Dios cont be'e xtižen', na' Diosen' len benachen' besyebede' yela' guac chen' dan' blo'e na' diža' dan' be'e. <sup>20</sup> Perw na' bxoz gwnabia' checho ca' len bene' ca' chesenabia' nación chechon' gosone' le' lo na' bene' ca' gosechoglagüe' che' cheyala' gate', na' bosode'e le' le'e yag cruz. <sup>21</sup> Ba goc šone ža na'a goc da' quinga. Na' neto' gwzoato' lez Diosen' gwsele' le' cont yebeje' nación checho lo da' malen'. <sup>22</sup> Na' no'ol ca' zjanac txen len neto', bale' goso'e diža' da' chebaneto', ja'aque' cho'a ban' be'e <sup>23</sup> na' bitw besyeželde' cuerp che'na'. Cate' besyela'aque' gosene' besele'eda'ogüede' angl bene' gose'e legaque' ba bebane' ladjo bene' guat ca'. <sup>24</sup> Na' lecze to chop bene' byo bene' ca' zjanaque' txen len neto' ja'aque' cho'a ban' na' besele'ede' cayanen' gosena no'ol ca' naquen, perw bi besele'ede' Jesús'en'.

<sup>25</sup> Na' gož Jesús'en' legaque':

—Nyaše'chguaze le'e bi chejni'ile na' bi chejle'le yogo' dan' bosozoj bene' ca' gwsela' Diosen' goso'e xtižen' cani'. <sup>26</sup> ¿Cahaquele bi cheyala' gac dan' ba goca'? Cristo ben' gwlej Diosen' cont yedenabi'e, benen byen gwzaca'zi'e yogo' da' quinga ba goc, perw yeyoža' la'laon naque' bene' zaca' juisyw.

<sup>27</sup> Na' be'e diža' len legaque' bsed blo'ede' legaque' yogo' dan' nyoj che'na' le'e Xtiža' Diosen', gwzolaoteque' len dan' bzoj da' Moisés na' len dan' bosozoj yezica'chle bene' gwsela' Diosen' goso'e xtižen' cani'.

<sup>28</sup> Na' besežine' gala'ze yežen' gan' zja'aquen', na' Jesús'en' bene' ca' chon bene' šejch yelate' zito'ch. <sup>29</sup> Perw bene' ca' gosone' byen yega'ane' len legaque', gose'ene':

—Yega'anczo' len neto', le ba chal na' ba nac bagwže' par šejo'.

Na' gwyo'e cont yega'anlene' legaque'. <sup>30</sup> Na' šlac zjachi'e cho'a mesen' txen, Jesús'en' gwxi'e yetextilen' na' be'e yela' choxcen che Diosen' na' bzojjen' bnežjuen' legaque'. <sup>31</sup> Cana'ch gosacbe'ede' le'na'. Na' šlac ne' nite' ca' con benite'. <sup>32</sup> Nach gose' lježgaque':

—Leca bebe lažda'ochon' cate' be'lene' chio' diža' chanez na' bsed blo'ede' chio' can' nyojen che' le'e Xtiža' Diosen'.

<sup>33</sup> Na' la' besyeya'actie' jaya'aque' Jerusalénna' na' besyežine' gan' zjandop zjanžag postlw ca' šnej len bene' ca' yezica'chle. <sup>34</sup> Na' bene' šnej ca' gose'e bene' ca' za' besyežin:

—Da' licze ba beban Xanchon'. Ba blo'elagüe' Simónna'.

<sup>35</sup> Nach bene' ca' chop gose'e legaque' dan' goc šlac zjangüe'e nezen', na' gose'e legaque' besyeyombi'e le' cate' bzojje' yetextilen' cont yesagüen'.

### Jesúsen' blo'elagüe' bene' ca' zjanaque' le' txen

(Mt. 28:16-20; Mr. 16:14-18; Jn. 20:19-23)

<sup>36</sup> Ne' chesoe'te' dižan' ca', cate'cze gwzecha Jesúsen' gachol. Nach gože' legaque':

—Le soa binlo len xbab dan' yo'o lo' yichjlažda'olen'.

<sup>37</sup> Perw leca besežebe' na' besyebande', gosacde' še chesele'ede' bxin che da' bene' guata'. <sup>38</sup> Nach Jesúsen' gože' legaque':

—¿Bichen' chacle tole? na' ¿bichen' chonle xbab ca' lo' yichjlažda'olen'? <sup>39</sup> Le na'šc ni'a na' nga cont gacbe'ele nedan'. Le can neda' cont gacbe'ele. Šaca' naca' bene' guat, bi nac žit bela' chia' ca dan' chle'ele nga.

<sup>40</sup> Beyož gwne' ca', blo'ede' legaque' ni'a ne'e ca'. <sup>41</sup> Na' legaque' bina' yeyož yesejle'e catec chesyebande' na' catec chesyebede'. Nach Jesúsen' gože' legaque':

—¿De late' da' gagua'?

<sup>42</sup> Nach bosonežjue'ne' late' yid bel gagüe' na' late' chixe beser da' yože šina'ba'. <sup>43</sup> Gwxilen na' gwdagüen' laogaquen'. <sup>44</sup> Nach gože' legaque':

—Ba gwnia' le'e cate' ne' zoalena' le'e cheyała' gac yogo'loł da' ca' bsi' Diosen' xneze zjanyoj chia' le'e ley dan' bzoj da' Moisés, na' le'e dan' bosozoj bene' ca' goso'e xtiža' Diosen' cani', na' lecz ca' da' nyoj le'e Salmos ca'.

<sup>45</sup> Nach ben Jesúsen' cont gosejni'ide' da' ca' zjanyoj che' le'e Xtiža' Diosen'. <sup>46</sup> Na' gože' legaque':

—Benen byen goc da' quinga cont goc can' nyojen žan neda' gata' na' yebana' ladjo bene' guat yeyon ža, neda' naca' Cristo ben' gwlej Diosen' yedenabia'. <sup>47</sup> Na' le'e cheyała' güe'le xtiža'na' len bene' že' yogo' nación. Solaotecle güe'len Jerusalén. Güe'le xtižan' nale cheyała' yesyetinje benachen' xtoła'gaquen' cont Diosen' yezi'xene' chegaque'. <sup>48</sup> Le'e cheyała' güe'le diža' che da' quinga ba ble'ele dan' ba goc chia'. <sup>49</sup> Na' lecze sela' Spiritw che Xa' Diosen' yedesoan len le'e can' gwnen'. Na' le yega'an lo ciuda nga na'a cuzle gon Xa' Diosen' le'e yela' guac da' za' yaba.

### Beyep Jesúsen' yaba

(Mr. 16:19-20)

<sup>50</sup> Na' Jesúsen' gwche'e legaque' ja'aque' gan' chi' yež dan' nzi' Betania na' gwlis ne'e gwnabde' Diosen' gone' cont nite' mbalaz. <sup>51</sup> Na' ca beyoža' beyepe' yaban'. <sup>52</sup> Na' bene' ca' gosaque' le' txen besyega'ane' yešlož dao'

gosonxene' Jesúsén' nach jaya'aque' Jerusalénna', chesyebéchgüede'.  
<sup>53</sup> Na' gwnita'teze' lo' yodao' blaona' chesonxene' Diosén'. Da' na'ze  
chzoja' na'a.